

CIRADENW TA KEWALEW

Kitabu faamucogo

Nin kitabu seɓɓbaga ye Luka ye, min ka Yesu ta ko Kibaro Diman* kitabu sabanan seɓɓe. A ka nin kitabu fana seɓɓe a terice Tehofili le togo ra, i n'a fo kitabu folo.

A be kitabu damina ni Yesu ta yelenko ye ka taga sankolo ra. O ko, Yesu ta karamogodenw ka wagati min ke Zeruzalemu, sani Yesu ta layiri ye dafa, a be o fo. Pantekotilon na, Yesu taganin ko tere tan na, Ala Nin Saninman* jigira karamogodenw kan, ka Ala ta sebagaya di o ma. O ka Yesu ta ko waajuri ke, ka Kibaro Diman fo. Lanabagaw cayara, Kibaro Diman ko bora Zeruzalemu ka se fo Zude mara yoro tow ra, ani Samari, ani dunuɓa yoro caman na. O kera ka kapa ni Yesu yere ta cifonin ye, ko: «Nin Saninman bena jigi aw kan; o cogo ra aw bena sebagaya soro ka ke ne seerew ye, ka kuma ne ta ko ra k'a damina Zeruzalemu, ani Zude mara bee, ani Samari mara, fo ka taga se dunuɓa dan bee ma» (1.8).

Nin kitabu damina ra, an b'a ye ko Piyeri le be i n'a fo lanabagaw ta jenkuru pamogo. Nka ka damina sura kononton na, kitabu seɓɓbaga be Poli ta baaraw le lakari. Poli ka tagama caman ke ka taga Kibaro Diman fo dugu caman na. O tagamaw tagara laban fo Romu dugu konon. Poli ka tooro caman sonmina, ani sege caman, ka kasorabla caman muju. Nka foyi si ma se ka Ala

ta kuma bari. Nin Saninman ka Ala ta mɔgɔw demɛ janko o ye kɛ Yesu seerew ye dunuɓa kɔnɔ fɔ bi.

Kitabu kɔnɔkɔw

Nin Saninman nacogo (1-2)

Karamɔgɔdenw ta waajuri (3-7)

Kibaro Diman ko sera fɔ Samari (8)

Yahudiyaw ka lanabagaw tɔɔɔ Zeruzalemu (9-12)

Pɔli ta tagama fɔlɔ (13-15)

Pɔli ta tagama flanan (16-18)

Pɔli ta tagama sabanan (19-21)

Pɔli minana ka taga fɔ Rɔmu (22-28)

Ala ka Nin Saninman min layiri ta karamɔgɔdenw ye

¹ Ne balemace Tehofili, ne ta kitabu fɔlɔ ra, Yesu tun ka ko minw kɛ, ani a tun ka mɔgɔw karan fɛn minw na kabini a ta kow damina ra fɔ ka taga se a kɔrɔtalɔn ma ka taga sankolo kɔnɔ, ne tun kɔnna ka o bɛɛ fɔ i ye. ² Nka sani Yesu ye taga sankolo ra, a tun ka karamɔgɔden minw janawoloma, olugu tun ka kan ka ko minw kɛ, a ka o karan o bɛɛ ra Nin Saninman* baraka ra. ³ Yesu ta tɔɔɔ bannin kɔ, a janaman ka a yere yira a ta karamɔgɔdenw na; a ka o kɛ ka se fɔ tere binaani, janko o y'a lɔn ko sigiya t'a ra, ko ale janaman lo. Ala bɛna a ta Masaya* sigi cogo min na, a ka o jafɔ o ye. ⁴ Lon dɔ, ka Yesu ni a ta karamɔgɔdenw to domuni na jɔgɔn fɛ, a k'a fɔ o ye k'a gbɛɛya, ko: «Aw kana aw yɔɔɔ janya Zeruzalemu na; ne tun ka ne Fa ta layiri min ko fɔ aw ye, aw ye o makɔnɔ. ⁵ Sabu Yuhana ka

mogow batize ji le ra, nka sani tere dama ce Ala bena aw batize ni Nin Saninman ye.»

Yesu yelenna ka taga sankolo kono

⁶ Ayiwa, ka Yesu ni a ta karamogodenw lajennin to, karamogodenw k'a jininka ko: «Matigi, i bena Izirayeli* ta masaya sigi kokura o wagati le ra wa?» ⁷ Yesu ka o jaabi ko: «Ne Fa Ala ka wagati min latige, ani a ka tuma min latige ni a yere ta fanga ye, aw man kan ka o lon. ⁸ Nka Nin Saninman* bena jigi aw kan; o cogo ra aw bena se bagaya soro ka ke ne seerew ye, k'a damina Zeruzalemu, ani Zude mara bee, ani Samari mara, fo ka taga se dunuɗa dan bee ma.» ⁹ Yesu ka o kumaw fo ka ban minke, ka karamogodenw ja lonin to a ra o b'a flera, a korotara ka bo o ce ra ka taga sankolo ra; sankaba do k'a dogo o ma. ¹⁰ Ka karamogodenw ja lonin to sankolo ra ka Yesu tagato fle, o barara ka ce deregegbetigi fla ye o koroo; ¹¹ o ce fla ka o jininka ko: «Aw Galilekaw, mun le koson aw lonin be yan ka to ka sankolo fle? Yesu min korotara aw ja na ka taga sankolo kono, ale kelen le bena kosegi ka na, i ko aw ka a tagato ye cogo min na.»

Matiyasi blara Zudasi no ra

¹² Ayiwa, karamogodenw bora kuru kan ka seko ka na Zeruzalemu; o kuru be wele ko Oliviyesunw kuru, a be Zeruzalemu kere fe, kilo kelen jagon lo. ¹³ O sera Zeruzalemu minke, o tun be to ka lajen sankaso min kono kakoro, o tagara don o bon kono. O tun ye Piyeri ye, ani Yuhana, ani Yakuba, ani Andere, ani Filipe,

ani Toma, ani Baritelemi, ani Matiyu, ani Alife dence Yakuba, ani Simon min be wele ko faso kanubagaba*, ani Yakuba dence Zude. ¹⁴ O bee tun lajennin be ni miiriya kelen ye ka to ka Ala daari; muso dow fana tun be o ra, ani Yesu bamuso Mariyamu, ani Yesu balemacew.

¹⁵ Ayiwa, o lonw do ra, lanabagaw tun lajenna ka se moggo keme ni mugan jogon ma; Piyeri wurira ka lo o ce ma, k'a fo o ye ko: ¹⁶ «Ne balemaw, Dawuda tun ka min fo Nin Saninman* baraka ra kakoro, jagboya lo o kow tun ye ke. A tun kumana Zudasi ta ko le ra; ale le tun blara mogow na ka taga Yesu mina. ¹⁷ Zudasi tun kera an ta jenkuru moggo do ye, an bee tun be baara kelen le ke. ¹⁸ A ka wari min soro a ta kojugu sara ye, a tagara o wari ke ka foro san. O ko fe, a ka a yere kan don juru ra; a su nana ben fo ka yerege, ka a nogow bee bo kene ma. ¹⁹ Zeruzalemukaw bee ka o ko lon, fo o ka o foro togo la o ta kan na ko: <Hakelidama>, o koro ye ko <jori foro>. ²⁰ K'a soro a sebera Zaburuw kitabu konso, ko:

<A ta bon lakolon ye to,

moggo si kana ke a konso>.

Zaburuw kitabu ko tuun ko:

<Moggo were ye a ta baara ke a no ra†.>

²¹ «O le koson moggo kelen ka kan ka fara an kan, o ye ke an seere ye k'a yira ko Matigi Yesu kununa ka bo saya ra. O tigi ka kan ka ke moggo do ye min tun be ni an ye, ²² ka a damina

* **1:13** 1.13 Faso kanubagaba: Kitabu dow b'a fo ko Zeloti.

† **1:20** 1.20 Nin kuma fora Zaburu 69.26 ani 109.8.

Yesu batize wagati ra Yuhana fe, fo ka taga se a korotalon ma ka bo an ce ra ka taga sankolo ra.»

²³ Lanabagaw ka mogɔ fla yira, Yusufu min be wele ko Barisabasi, ani min togɔlara ko Yutusi, ani Matiyasi. ²⁴ O ko, lanabagaw ka Ala daari, ko: «Matigi, ele min be mogɔ bee jusukun lon, i ka kelen min panawoloma nin mogɔ fla ra, o yira an na, ²⁵ janko o ye ke baaraden ni ciraden* ye, ka bla Zudasi no ra, sabu Zudasi bora o ciradenya ra ka taga yoro were ra, a ka kan ni yoro min ye.» ²⁶ O ka kara la, kara ka Matiyasi le yira; ale farara ciraden tan ni kelen kan.

2

Nin Saninman jigira lanabagaw kan

¹ Pantekoti* lon na Yesu ta lanabagaw bee tun lajennin be yoro kelen na. ² Mankanba do barara ka bo sankolo ra; a be i ko fɔɔɔba mankan. Lanabagaw tun siginin be bon min kono, a nana o bon kono fa. ³ O ka nenden dow ye, o be i ko tasumamana. O tarantaranna ka na sigisigi o bee kelen kelen kan. ⁴ Lanabagaw bee fara Nin Saninman* na, o bee ka ke kuma ye kan werew ra; ni Nin Saninman ka kan min don min da ra, o be o kan fo.

⁵ Ayiwa, Yahudiya Alapasiranbaga dow tun bora dunupa jamanaw bee ra, ka na to Zeruzalemu. ⁶ O mankanba bora minke, o mogow camanba borira ka taga lajen o yoro ra. O bee kononobanna, sabu o bee kelen kelen tun be o yere ta kan menna lanabagaw da ra. ⁷ O mogow bee kabakoyara, fo ka o kononoban. O tun b'a fora jigon ye ko: «Mogɔ minw be kumana tan,

o bæε τε Galilekaw le ye wa? ⁸ Mun koson an bæε kelen kelen bæ an yere ta kan menna o da ra? ⁹ Anw minw ye Paritikaw ye, ani Medikaw, ani Elamukaw, ani minw bora Mesopotami, ani Zude, ani Kapadosi, ani Pɔn, ani Azi jamanaw ra, ¹⁰ ani Firizi, ani Panfli, ani Misiran jamanaw ra, ani Libi jamana yoro minw bæ Sireni dugu kere fe, ani minw bora Romu*, ani Yahudiyaw, ani minw donna Yahudiyaya ra, ¹¹ ani Keretikaw, ani Arabuw, an bæ Ala ta kobaw lakarito menna o fe an yere ta kanw na!»

¹² O mogow bæε kononobanna; o m'a lon o bena min fo tuun. O tun b'a fora nogon ye ko: «Nin ye mun ye sa?» ¹³ Nka dow tun bæ lanabagaw logobora k'a fo ko: «O ka duvendiman do le min ka fa.»

Piyeri ka mogow waaju

¹⁴ O le ra Piyeri wurira ka lo ni karamogoden to tan ni kelen ye, ka kuma ni kanba ye, k'a fo ko: «Aw Yahudiyaw, ani aw minw bæε siginin bæ Zeruzalemu, aw ye aw toro malo ka ne ta kuma lamen, ka nin faamu! ¹⁵ Nin mogow ma duven min ka fa, i ko aw b'a miirira cogo min na, sabu sogomada lo. ¹⁶ Nka cira Yoweli tun ka kuma min fo, o le bæ kera sisan tan; a ko:

¹⁷ <Ala ko: Dunupa labanwagatiw ra,

ne bena ne Nin* lajigi adamadenw bæε kan.

Ne bena kuma don aw dencaw ni aw denmusow da ra, ka mogow waaju.

Ala bena ko dow yira aw ta kanbelenw ra;

aw ta cekorobaw bena Ala ta kow ye siko ra.

¹⁸ Can lo, a bena ke ten o lonw na;

ne bena ne Nin lajigi ne ta joncɛw ni ne ta
jonmusow kan;

ne bena kuma don o da ra ka mɔgɔw waaju.

¹⁹ Ne bena kabakofɛn dɔw yira san fɛ, sankolo
ra,

ka tagamasiyɛn dɔw yira dugukolo kan:
jori, tasuma, ani bugun sisiman.

²⁰ Tere bena kɛ dibi ye,

karo bena wulen i ko jori.

O bɛɛ le kɔ fɛ Matigi ta lon bɛ se.

O bena kɛ lonba le ye, lon min nɔɔɔ ka bon.

²¹ O wagati ra ni mɔgɔ o mɔgɔ ka Matigi tɔgɔ
wele,

o tigi bena kisi.>

²² «Ayiwa, aw Izirayɛlimɔgɔw, aw ye aw toro
malɔ ka ne ta kuma lamɛn. Yesu Nazaretika
tun kɛra mɔgɔ dɔ ye, Ala ka a ta sebgaya yira
aw ra min fɛ; a ka kobaw, ani kabakow, ani
tagamasiyɛnw kɛ aw cɛ ra, i ko aw yɛrɛ k'a lon
cogo min na. ²³ Nka ka kɛna ni Ala ta latigɛ ni a
ta lonniya ye ale ta ko ra, aw ka a mina k'a don
mɔgɔjuguw boro; o k'a gbengben yiri ra k'a faga.

²⁴ Nka Ala k'a kisi ka bɔ saya ra k'a lakunu, sabu
saya tun tɛ se ka Yesu mina ka to a ta fanga kɔɔɔ.

²⁵ Sabu Dawuda tun k'a fɔ Yesu ta ko le ra, ko:

<Ne tun bɛ ne Matigi yera tuma bɛɛ ne ja kɔɔɔ,
sabu a bɛ ne kɛrɛ fɛ ka ne dɛmɛ, janko ne baraka
kana dɛsɛ.

²⁶ O koson nagari bɛ ne jusu ra, ne da bɛ
ninsɔndiyakumaw fɔ.

Hali ne farisogo fana bena laganfiya ni o jigiya
ye.

27 Sabu i tena sɔn ka ne nin to saya dibi ra yi.
I tena sɔn fana k'a to i ta mɔgɔ saninman farisogo
ye tori kaburu ra.

28 Sabu sira minw bɛ taga janamanyakura ra, i
ka o yira ne ra.

I bɛna ne jusu fa jagari ra, sabu ne bɛna kɛ ni i
ye.>

29 «Ayiwa, ne balemaw, aw y'a to ne ye an
bɛmace Dawuda ta ko gbɛya k'a fɔ aw ye bi: Ale
sara, a su donna; hali bi a ta kaburu bɛ an fɛ yan.

30 Dawuda tun ye cira le ye; a tun k'a lon fana
ko Ala karira a ye ko lon do a bɛna a mamaden
do sigi a ta masasiginan kan a no ra. 31 Ayiwa,
Kirisita*, min ye Ala ta mɔgɔ janawolomanin ye,
ale tun bɛna kunu ka bo saya ra cogo min na, Ala
tun konna ka o le yira Dawuda ra. O le koson a
ko:

<A tena to saya dibi ra,
a farisogo tena tori kaburu kono.>

32 Ne bɛ Yesu min ko fora, Ala ka ale le lakunu
ka bo saya ra; an bɛɛ ye o ko seerew ye. 33 A
korotara ka taga sigi Ala kininboroyanfan fɛ
tuma min na, a tun ka Nin Saninman* min layiri
ta an ye, a Fa Ala ka o di a ma. A fana ka o Nin
Saninman le lajigi ka na an kan, i ko aw b'a yera,
ani aw b'a menna cogo min na. 34 Dawuda yere
ma korota ka taga sankolo ra, nka o bɛɛ n'a ta, a
ko:

<Matigi Ala k'a fɔ ne Matigi ye ko:
Na i sigi ne kininboroyanfan fɛ,

2:28 2.28 Nin kuma fora Zaburu 16.8-11. **2:30** 2.30 Nin kuma
fora Zaburu 132.11. **2:31** 2.31 Nin kuma fora Zaburu 16.10.

³⁵ fɔ ne ye na i juguw mina ka o bla i sen kɔrɔ.»

³⁶ «O kosɔn aw Izirayelimɔgɔw bɛɛ ka kan k'a lon bi, ko sigiya t'a ra, ko Yesu min gbengbenna yiri ra aw fɛ, ko Ala ka ale le kɛ Matigi ni Kisibaga* ye.»

³⁷ Ayiwa, o mɔgɔw ka o kumaw men tuma min na, o kumaw ka o jusu sɔgɔ kosebɛ. O ka Piyeri ni karamɔgɔden tɔw jininka ko: «An balemaw, an ka kan ka mun le kɛ sisan?» ³⁸ Piyeri ka o jaabi ko: «Aw ka kan ka nimisa aw ta jurumunw na; aw bɛɛ kelen kelen ka kan ka batize Yesu Kirisita tɔgɔ ra, ka aw ta jurumun yafa sɔrɔ. Ni o kera, Ala bɛna Nin Saninman di aw ma. ³⁹ Sabu Nin Saninman layiri tara aw fana ye, ani aw ta den minw bɛna na aw kɔ, ani siyamɔgɔ minw bɛ yɔrɔjan, ani an Matigi Ala bɛna mɔgɔ minw bɛɛ wele fana.» ⁴⁰ Piyeri ka o mɔgɔw waaju ka mɛɛn, k'a fɔ o ye k'a gbɛɛya ko: «Aw ka kan ka jija ka faran bi mɔgɔjuguw ra, janko aw ye kisi.» ⁴¹ Mɔgɔ minw sɔnna Ala ta Kuma ma, o ka olugu bɛɛ batize. O lon na, mɔgɔ minw farara lanabagaw kan, o tun bɛ mɔgɔ waga saba bɔ.

Lanabagaw ta jɛnɔgɔnya

⁴² Kabini o lon na o mɔgɔw tun bɛ lajɛn wagati bɛɛ ka ciradenw* ta karan lamɛn. O tora lanabagaw ta jɛnɔgɔnya ra. O tun bɛ buru tarantaran o ni jɔgɔn cɛ, ka o jimi, ka o hakiri jigi Matigi ta kuma ra, ka to ka Ala daari jɔgɔn fɛ. ⁴³ Alapasiran tun bɛ o bɛɛ ra, sabu ciradenw tun bɛ kabako caman ani tagamasiyen caman kera. ⁴⁴ Lanabagaw bɛɛ tun bennin lo. Mɔgɔ si

tun tɛ a borofɛn jate a kelen ta ye. O tun bɛ o ta fɛnw bɛɛ taran o ni ɲogɔn cɛ. ⁴⁵ Tuma dɔw ra, dɔw tun bɛ o ta foro, walama o borofɛn dɔw fiyeere, ka o wari tarantaran ɲogɔn cɛ ka kapa ni o bɛɛ ta makɔnata ye. ⁴⁶ Lon o lon o tun bɛ lajɛn Alabatosoba kɔnɔ ɲogɔn fɛ ni miiriya kelen ye ka Ala bato. O tun jijara o ra kosebɛ. O tun bɛ lajɛn o ta sow kɔnɔ ka buru tarantaran ɲogɔn cɛ k'a ɲimi, ka o hakiri jigi Matigi ta kuma ra. O tun bɛ domuni kɛ ɲogɔn fɛ ni ninsɔndiya ani jusukun gbɛnin ye. ⁴⁷ O tun bɛ Ala tando wagati bɛɛ. O ko tun ka di mɔgɔw bɛɛ ye.

Matigi tun bɛ minw kisi, a tun bɛ olugu fara lanabagaw ta jenkuru* kan lon o lon.

3

Piyeri ka nabara keneya

¹ Lon dɔ, Piyeri ni Yuhana tun bɛ tagara Alabatosoba ra ɲogɔn fɛ ka taga Ala daari; wulada wagati tun lo. ² O y'a sɔrɔ cɛ dɔ tun bɛ yi, o nabaraman le tun worora; lon o lon o tun bɛ o cɛ ta ka taga a sigi Alabatosoba donda dɔ ra, min bɛ wele ko «Donda cɛɲuman», janko mɔgɔ minw bɛ don Alabatosoba kɔnɔ, a ye olugu daari. ³ A ka Piyeri ni Yuhana dontɔ ye Alabatosoba kɔnɔ minke, a ka o daari. ⁴ Piyeri ni Yuhana ka o ɲa lo a ra k'a fɛ; Piyeri ko a ma ko: «An fɛ.» ⁵ Cɛ fana ka o lalaga ka o fɛ; a tun b'a hakiri ra ko o bɛna fɛn dɔ le di a ma. ⁶ O tuma Piyeri ko a ma ko: «Wari tɛ ne fɛ, sanin tɛ ne fɛ, nka min bɛ ne fɛ, ne bɛ o di i ma: Yesu Kirisita Nazaretikacɛ togo baraka ra, wuri ka tagama!» ⁷ Piyeri ka a mina a

kininboro ma k'a lawuri. O yorɔnin kelen bee a senw ni a senkuruw ka baraka sɔrɔ. ⁸ A panna ka wuri ka lo a sen kan ka ke tagama ye. A donna ni Piyeri ni Yuhana ye Alabatosoba kɔnɔ; a be tagama, a be panpan ka Ala tando. ⁹ Mɔgɔ bee k'a tagamato ye, a be Ala tandora. ¹⁰ O tun k'a lon ko ce min tun be to ka sigi Alabatosoba Da Cɛɓuman na ka daariri, ko ale yere lo. O ce sera ka tagama cogo min na, o barara o bee ra, fo ka o bee kɔnɔnɔban.

Piyeri ka waajuri ke Alabatosoba kɔnɔ

¹¹ Ce tun te bɔra Piyeri ni Yuhana ko tuun minke, mɔgɔw bee kabakoyara; o borira ka taga lajen Piyeri ni Yuhana kɔrɔ, Alabatosoba bolon do kɔnɔ, min be wele ko «masace Sulemani ta bolon». ¹² Piyeri ka jama ye minke, a k'a fo o ye ko: «An balema Izirayelimɔgɔw, mun koson nin ko ka aw kabakoya? Mun koson aw be aw ja lo anw na, k'a ke i n'a fo anw yere ta sebgaya walama an ta Alapasiran le k'a to nin ce sera ka tagama? ¹³ Ibrahimima ni Isiyaka ni Yakuba ta Ala, an bemaw ta Ala, o le ka a ta baarden Yesu togo bonya; aw ka ale le labla fagamaw ye, ka ban a ra Pilati ja kɔrɔ, k'a sɔrɔ ale tun k'a latige ko a be a bla. ¹⁴ Aw banna mɔgɔ saninman ni mɔgɔ terennin na, ka Pilati daari ko a ye mɔgɔfagabaga do le labla a no ra aw ye. ¹⁵ Aw ka janamanya banbari tigi faga, nka Ala ka a lakunu ka bo saya ra; anw ye a seerew ye. ¹⁶ Anw lara Yesu togo min na, o togo le ka baraka don nin ce ra; aw ja b'a ra, aw k'a lon fana.

Lanaya, Yesu tɔgɔ ra, o le ka kenɛya dafanin di nin cɛ ma aw bɛɛ na na.

¹⁷ «Nka o bɛɛ n'a ta, ne balemaw, ne k'a lon ko kolonbariya le k'a to aw ni aw ta kuntigiw ka nin ko kɛ. ¹⁸ Ala tun ka ko minw fɔ kakɔrɔ a ta ciraw bɛɛ da ra, a ka o le kɛ; ko Kirisita*, Ala ta mɔgɔ janawolomanin ka kan ka tɔrɔ. ¹⁹ O le koson aw ye nimisa aw ta jurumun na, ka son Ala ma, janko aw ta jurumunw ye ko ka bo yi. ²⁰ Ni o kera, Matigi bɛna laganfiya di aw ma, ani Kirisita min ta ko latigera aw ye, min ye Yesu ye, a bɛna o ci ka na aw fɛ. ²¹ Nka sisan Yesu ka kan ka to sankolo ra fɔ fɛn bɛɛ ye yeɛma ka kɛ kura ye fɔlɔ; Ala tun ka o le fɔ kabini wagatijan a ta cira saninmanw da ra. ²² Musa tun k'a fɔ ko: <Aw Matigi Ala bɛna cira do lana aw ye ka bo aw yere balemaw cɛ ra, i n'a fɔ ne. Ni o cira ka fɛn o fɛn fɔ aw ye, aw ye o lamɛn. ²³ Ni mɔgɔ o mɔgɔ ma son k'a lamɛn, o tigi bɛna halaki ka bo Ala ta mɔgɔw cɛ ra.> ²⁴ Sabu cira minw bɛɛ kumana, k'a damina cira Samawilu ra, o bɛɛ kelen kelen kumana nin wagati kow ra fana. ²⁵ Ayiwa, Ala ka ko minw bɛɛ yira ciraw ra, o bɛɛ fora aw le ye. Ala ka jɛnɔgɔnya min don ni an bɛmaw ye, aw fana bɛ o jɛnɔgɔnya ra. Ala ka o le fɔ Iburahima ye ko: <Dugukolo ta gbaw bɛɛ bɛna baraka sɔrɔ ne fɛ ele ta duruja sababu le ra.> ²⁶ O le koson Ala k'a ta baarden janawoloma tuma min na, a konna k'a ci aw le fɛ fɔlɔ, janko a ye baraka don aw ra, ka aw bɛɛ kelen kelen kisi ka bo aw ta sirajuguw kan.»

3:23 3.23 Nin kuma fora Sariya 18.15,18,19.

kuma fora Damina 22.18; 26.4.

3:25 3.25 Nin

4

O ka Piyeri ni Yuhana mina

¹ Ayiwa, ka Piyeri ni Yuhana to kuma ra jama fe, sarakalasebagaw* ni Alabatosoba korosibagaw kuntigi ni Sadusiw* nana bara ka bo o kan. ² O k'a ye ko Piyeri ni Yuhana be mogow karanna minke, k'a fo ko Yesu kununa ka bo saya ra, ko suw bena kunu fana, o ma diya o ye fiyewu. ³ O ka o mina ka o bla kaso ra fo o dugusagbe, sabu su tun kora ka ban. ⁴ Nka o bee n'a ta, mogow minw tun ka Ala ta kuma lamɛn, olugu caman lara Yesu ra; lanabagaw cayara ka se mogow waga looru jogonna ma.

⁵ Ayiwa, o lon dugusagbe, Yahudiyaw kuntigiw ni cekorobaw ni sariya karamogow* ka jogon lajen Zeruzalemu. ⁶ Sarakalasebagaw kuntigiba Ane yere tun be yi, ani Kayife, ani Yuhana, ani Alesandiri, ani ce minw bee ye sarakalasebagaw kuntigiba ta somogow ye. ⁷ O ka Piyeri ni Yuhana lo o ce ma, ka o jininka ko: «Sebagaya juman le sababu ra, walama togow juman le sababu ra aw ka nin ke?» ⁸ O tuma, Piyeri fanin Nin Saninman* na, a ko o ma ko: «Aw jamana kuntigiw, ani a cekorobaw! ⁹ An ka kojuman min ke nin nabara ye, ani a keneyara cogo min na, aw be an jininkara o le ra bi. ¹⁰ Ayiwa, aw ni Izirayelimogow bee ka kan k'a lon ko nin ce keneyara Yesu Nazaretikace togow baraka le ra; aw ka ale le gbengben yiri ra k'a faga, nka Ala ka a lakunu ka bo saya ra. Ale le baraka ra nin ce keneyanin lonin be aw na korow. ¹¹ Yesu ta ko le fora Kitabu konow ko:

«Aw bonlobagaw banna kabakuru min na ko a man ji,

o le kera bon kabakuru folo sobeman ye.»

¹² «Kisiri te soro togo were ra; sabu Ala ma togo were di mogow ma dugukolo kan yan, an be se ka kisi min sababu ra.»

¹³ Yahudiyaw kuntigiw, ani cekorobaw k'a ye ko Piyeri ni Yuhana be kumana minke hali siranya te o ra, o kabakoyara; sabu o tun k'a lon ko mogow gbansanw lo, minw ma karan. O k'a lon ko o tun be ni Yesu ye. ¹⁴ Nka o ja tun be ce keneyanin lonin na o korow minke, o tun te se ka foyi fo.

¹⁵ Ayiwa, o ka o labo kititigejama mogow ce ra. O ko, o ka jogon jininka ko: «An bena mun le ke nin mogow ra? ¹⁶ Sabu o ka kabakoba min ke Zeruzalemu, o ma dogo mogow si ma; an fana te se ka o soso. ¹⁷ Nka o bee n'a ta, an ye o wele ka kankari la o ye k'a gbeleya kosebe, ko o kana Yesu togo fo mogow si ye tuun, janko o ko kana na yerege ka taga jamana yoro bee ra.»

¹⁸ O ko fe, o ka o wele ka na a fo o ye k'a gbeleya ko o kana Yesu togo fo mogow si ye, o kana mogow si karan a ra fana. ¹⁹ Nka Piyeri ni Yuhana ka o jaabi ko: «Ayiwa, aw yere y'a fe, yala a bennin lo Ala ja korow wa, ko anw ye aw kan mina, ka Ala kan bla? ²⁰ Anw koni ka min ye, ani an ka min men, an te se ka to o fobari ye.»

²¹ O ka kankari la Piyeri ni Yuhana ye tuun k'a gbeleya kosebe, ka sorow ka o labla; mogow nasiran koson o ma cogo sorow ka kiti ben o kan

ka o tɔɔɔ, sabu kabako min tun kera, mɔgɔw bɛɛ tun bɛ Ala tandora o kosɔn. ²² Cɛ min fana keneyako kera kabako ye, o si tun ka ca ni san binaani ye.

Lanabagaw ta Aladaari

²³ O ka Piyeri ni Yuhana labla minke, o tagara karamɔgɔden tɔw fɛ; sarakalasebagaw* kuntigiw, ani cɛkɔɔɔbaw ka min fɔ o ye, o ka o bɛɛ lase karamɔgɔden tɔw ma. ²⁴ Lanabagaw ka o kuma mɛn minke, o bɛɛ jenna ka o miiriya kɛ kelen ye, ka o kan kɔɔɔta k'a fɔ Ala ye ko: «Matigi, ele min ka sankolo ni dugukolo dan, ani kɔgɔji ni a kɔnɔfɛnw bɛɛ, ²⁵ ele le ka nin kuma don i ta baaraden, an bɛmace Dawuda da ra i ta Nin Saninman* baraka ra, ko:

«Mun kosɔn siyaw bɛ muruti dɛ?

Mun kosɔn miiriya gbansanw bɛ jamana mɔgɔw kɔnɔ dɛ?

²⁶ Dugukolo masacew wurira ka lɔ;

kuntigiw ka jɔgɔn lajen

Matigi ni a ta mɔgɔ panawolomanin kama.»

²⁷ Sabu masace Herodi* ni Ponse Pilati ka jen siri ni siya wɛɛ mɔgɔw* ye, ani Izirayelimɔgɔw, nin dugu kɔnɔ yan; o wurira i ta baaraden saninman Yesu kama, i ka min panawoloma. ²⁸ O cogo ra i tun ka ko minw latige ka kapa ni i ta sebgaya ni i ta hakiritigiya ye kakɔɔ, o ka o le kɛ. ²⁹ Nka Matigi Ala, sisan, o ka kankarigbelen min la an ye, i ka o mɛn. O kosɔn jagbeleya di i ta baaradenw ma, janko o ja siginin ye i ta kuma fɔ.

³⁰ I ta sebgaya di o ma, janko o ye banabagatɔw

keneɓa, ka tagamasiiyenw ni kabakow ke i ta baaraden saninman Yesu togo ra.»

³¹ O ka Ala daari ka ban tuma min na, o tun lajennin be yoro min na, o yoro dugukolo yereyerera. O bee fara Nin Saninman na. K'a ta o wagati ra, o ja siginin tun be Ala ta Kuma fo ni jagbeleya ye.

Lanabagaw ta jennogonya

³² Lanabagaw ta jenkuru* bee tun bennin be kelen ma; o tun ka o jusukun ke kelen ye, ka o ta miiriya ke kelen ye fana. O ra mogo si tun te a borofen jate a kelen ta ye, nka o tun be o borofenw bee tarantaran o ni jagon ce.

³³ Sebagayaba tun be ciradenw* fe. O tun be Matigi Yesu kunuko fo mogow ye. Ala ta neema fana tun cayara lanabagaw kan. ³⁴ O koson janibagato tun te o ce ra: sabu forow, ani bonw tun be minw fe, olugu tun be o dow fiyeere, ³⁵ ka na o wari di ciradenw ma. O tun be wari tarantaran lanabagaw ra, ka kapa ni bee kelen kelen ta mako ye.

³⁶ Ayiwa, Yusufu, tun ye Levi* ta mogo do ye, min be bo Sipere; ciradenw tun ka ale togo le la ko Barinabasi, o koro ye ko mogo jagbeleyabaga.

³⁷ Foro do tun be ale fe; ale ka o fiyeere ka na o wari di ciradenw ma.

5

Ananiyasi ni Safira ta ko

¹ Ayiwa, ce do tun be yi, a togo ye ko Ananiyasi; ale ni a muso Safira benna kelen ma ka foro do fiyeere. ² Nka a ka wari taran kelen kelen dogo, ka taga

ni a taran kelen ye ka taga o di ciradenw ma; a ni a muso tun benna o ma.

³ Piyeri k'a jininka ko: «Ananiyasi, a kera cogo di ko Setana ka i jusukun fa ni miiriyajugu ye fo k'a to i ka foro wari do dogo ka na faninya fo Nin Saninman* ye? ⁴ Ni i tun ma i ta foro fiyeere o, a tun tena ke i ta bla le ra wa? A fiyeerera minke fana o, a wari bee tun te i ta bla le ra wa? Mun na i sonna ka o kojugu jagon latige i yere konon? I ma faninya tige mogon ye de, i ka a tige Ala le ye.»

⁵ Kabini Ananiyasi ka o kuma men, a benna dugu ma ka sa. Mogon minw ka o ko kibaro men, siranya ka olugu bee mina. ⁶ Kanbelen dow wurira ka Ananiyasi su ta k'a kasanke ka taga a su don.

⁷ Wagati dama temenin ko, a muso nana; min kera a ce ra, a tun ma o lon. ⁸ Piyeri k'a jininka ko: «Safira, can fo ne ye, yala aw ka aw ta foro fiyeere warida min na, o le ye nin ye wa?» Safira ko: «Onhon, a fiyeerera o le ra.» ⁹ Piyeri ko a ma ko: «O tuma a kera cogo di, aw fla benna a ma ko aw be Matigi Nin Saninman* korobon? Ayiwa, mogon minw ka i ce su don, olugu fle nin ye da ra, o bena taga ni ele fana ye.» ¹⁰ O yoronin kelen bee, muso benna dugu ma Piyeri sen koron ka sa. Kanbelenw donna bon konon k'a ye ko a sara; o k'a ta ka taga a su don a ce kere fe. ¹¹ O ko ka siranya bla lanabagaw ta jenkuru* mogon bee ra, ani minw bee ka o ko men.

Ciradenw ka kabako caman ke

¹² Ciradenw* tun be tagamasiyen caman ni kabako caman kera mogon ce ra. Lanabagaw

tun be to ka ɲoɲon lajen Sulemani ta bolon kɔnɔ. ¹³ Mɔɲo si tun te son ka kori o ra; o beɛ n'a ta, mɔɲow tun be o tando kosebe. ¹⁴ Mɔɲo caman tun be lara Matigi ra, cew, ani muso, ka fara lanabagaw kan. ¹⁵ A nana ke fo mɔɲow tun be na ni banabagatow ye ka na o lala sira kan, kalagaw ni debew kan, janko Piyeri temeto, hali ni a te se ka maga o ra, a ja dama ye yeɛ o dow kan doron ka o keneya. ¹⁶ Jama caman tun be bo Zeruzalemu kerɛfeduguw ra ka na ni banabagatow ni jinatow ye. O beɛ tun be keneya.

Yahudiyaw ta ɲamɔɲow ka ciradenw tɔɔɔ

¹⁷ Ayiwa, sarakalasebagaw kuntigiba* ni a nofemɔɲow, minw ye Sadusiw* ta jenkuru mɔɲow ye, ciradenw ɲangboya ka olugu mina. ¹⁸ O ka ciradenw* mina ka o bla kasobonba kɔnɔ. ¹⁹ Nka su fe, Matigi ta meleke do nana kasobon dondaw dayeɛ, ka ciradenw labo, k'a fo o ye ko: ²⁰ «Aw ye taga lo Alabatosoba kɔnɔ ka ɲanamanyakura ko kibaro fo mɔɲow ye.»

²¹ Meleke ka min fo, o ka o ke; o dugusagbe soɲomada jona fe, o tagara Alabatosoba kɔnɔ ka taga ke mɔɲow karan ye.

Sarakalasebagaw kuntigiba ni a nofemɔɲow nana; o ka kititigejama ni Izirayeli* cekorobaw beɛ lajen. O ka sorasi dow ci ko o ye taga ciradenw labo kasobon na ka na ni o ye. ²² Sorasiw tagara se yi minke, o ma ciradenw sorɔ kasobon kɔnɔ. O sekora ka na o ɲafo kititigejama mɔɲow ye. ²³ O ko: «An tagara a sorɔ ko kasobon dasoɲonin lo ka ɲa; kasobon korosibagaw lolonin be kasobon dondaw ra, o be

kasobon kōrosira. Nka an ka da yeɛ minke, an ma mōgo si ye kasobon kōno.»

²⁴ Alabatosoba kōrosibagaw kuntigi ni sarakalasebagaw kuntigiw ka o kuma men minke, ciradenw ta ko ka o hakiri jagami; o ka ke o yeɛ nininka ye ko: «An bena nin ko ke di le sa?» ²⁵ Ka o to o miiri ra, mōgo dō nana a fō o ye ko: «Aw ka mōgo minw bla kaso ra, o lonin ye Alabatosoba kōno, o be mōgow karanna.»

²⁶ O tuma ra Alabatosoba kōrosibagaw kuntigi ni sorasi dōw wurira ka taga ciradenw wele ka na jususuma ra; o m'a ke fangako ye, sabu o tun be siranna ko mōgow kana na olugu bon ni kabakuruw ye.

²⁷ O nana ni o ye ka na o lo kititigejama ja fe; sarakalasebagaw kuntigiba ka o nininka ko:

²⁸ «An tun m'a fō aw ye k'a gbɛɛya ko aw kana mōgo si karan Yesu tōgo ra tuun wa? A fe, aw ka Zeruzalemu dugumōgow beɛ hakiri yeɛma ni aw ta karan ye; aw fana b'a fe ka Yesu fagari kunko ben anw kan.» ²⁹ Piyeri ni ciraden tōw ka o jaabi, ko: «An ka kan ka Ala kan le mina, sani an ye mōgow kan mina!

³⁰ Aw ka Yesu min gbengben yiri ra k'a faga, an bemaw ta Ala ka o le lakunu ka bō saya ra. ³¹ Ala k'a kōrota a ta sebagaya ra ka a ke Kuntigi ye, ani Kisibaga*, janko Izirayelimōgow ye nimisa ka o ta jurumunw yafa soro ale baraka ra. ³² Anw le kera nin kow seerew ye, ani Nin Saninman*, Ala be o Nin Saninman min di a kanminabagaw ma.»

³³ Kititigejama ka o kuma men minke, o dimina, k'a ke i n'a fō o bena ciradenw faga. ³⁴ Nka

Farisiw* ta sariya* karamogoba do tun be yi, o togo ye ko Gamaliyeli; mogow bee tun be a bonya. Ale wurira ka lo kititigejama ce ma k'a fo ko o ye ciradenw labo kene ma folo. ³⁵ Ciradenw bonin ko a ko kititigejama mogow ma ko: «Ne balema Izirayelimogow, aw b'a fe ka ko min ke nin mogow ra, aw ye aw yere korosi o ra de! ³⁶ Sabu a ma meen folo, ce do tun wurira yan, min togo tun ye ko Tedasi. Ale tun k'a yere ke kolonbagaba ye, fo mogo keme naani jagon tugura a ko. Nka a laban o k'a faga, a ta mogow bee janjanna; o ko banna o yoro ra yi. ³⁷ O ko fe, Galilekace do fana wurira tuun, ko Zudasi. Ale ta ko kera jamana mogow jatewagati ra. Ale fana ka mogo caman nege ka o tugu a yere ko. Nka o ka ale fana faga, a ta mogow bee janjanna. ³⁸ O le koson, sisan, ne be nin le fo aw ye: aw kana nin mogow ta kopna siri aw nin kan tuun; aw ye o to o ye taga. Ni a kera ko o miiriya ni o kow bora mogow le ra, a bena cen a yere ma lon do. ³⁹ Nka ni a kera ko a bora Ala yere le ra, aw tena se k'a cen fiyewu. Aw ye aw yere korosi, aw kana ban ka kere ke ni Ala yere ye.»

⁴⁰ Ayiwa, kititigejama mogow sonna Gamaliyeli ta kuma ma. O ka ciradenw wele. O ka o bugo ni gbepe ye, k'a fo o ye ko o kana Yesu togo fo mogo si ye tuun; o ko, o ka o labla ko o ye taga. ⁴¹ Ciradenw tagara ka bo kititigejama koro, o be nagarira k'a ye ko Ala ka o bonya la olugu kan, k'a to o ye olugu dogoya Yesu togo koson. ⁴² O bee n'a ta, o tun be mogow karan lon bee, Alabatosoba konɔ, ani sow konɔ, k'a fo o ye ko

Yesu le ye Kisibaga ye.

6

Baarakɛbaga wolonfla farara ciradenw kan

¹ Ayiwa, o wagati ra lanabagaw tun bɛ caya-
yara. Yahudiya gɛrɛkikanfɔbagaw ka Yahudiya
heburukanfɔbagaw kɔrɔfɔ, ko o tɛ olugu ta
muso cɛ saninw jatera kosɛbɛ domuni ko ra.

² Karamɔgɔden tan ni fla ka o mɛn minke, o ka
lanabagaw bɛɛ lajennin wele k'a fɔ o ye ko: «Ni
an ka Ala ta Kuma waajuri dabra, ka an ta baara
kɛ domuni taran dɔrɔn ye, o tɛ bɛn. ³ O le kosɔn,
an balemaw, aw ye mɔgɔ wolonfla janawoloma
aw cɛ ra, o ye kɛ mɔgɔsɔbɛw ye, minw hakiri
ka bon, ani minw fanin lo Nin Saninman* na;
an bɛna olugu bla domuniko janabɔri ra. ⁴ An
kɔni bɛna an ta baara kɛ Aladaari ni Ala ta Kuma
waajuri ye.»

⁵ O kuma diyara jama bɛɛ ye. O ka mɔgɔ
minw janawoloma, olugu flɛ: Etiyeni, ale tun ye
lanamɔgɔ ye, a fanin bɛ Nin Saninman na, ani
Filipe, ani Porokori, ani Nikanɔri, ani Timon, ani
Parimenasi, ani Nikola min tun bɔra Antiyɔsi; ale
tun bɛ Yahudiyaw ta diina le ra folɔ. ⁶ O nana o
mɔgɔ wolonfla yira ciradenw* na. Olugu ka Ala
daari o ye, ka o boro la o kan ka dugawu kɛ o ye.

⁷ Ala ta Kuma tun bɛ sera yɔrɔ caman
na. Lanabagaw tun bɛ cayara Zeruzalemu
kosɛbɛ. Sarakalasebaga* caman fana tun bɛ
sonna Kibaro Diman* kuma ma.

Yahudiyaw ka Etiyeni mina

⁸ Etiyeni fanin tun be Ala ta neema ni a ta seba-gaya ra. A tun be kabakobaw ni tagamasiyenw kera mogow ce ra. ⁹ Mogow dow bora karanso do ra min be wele ko jon kunmaboninw ta karanso. O mogow tun ye Sirenikaw, ani Alesandirikaw le ye; dow fana tun bora Silisi, ani Azi mara ra; o mogow nana ke Etiyeni soso ye. ¹⁰ Nka Etiyeni tun be kumana Nin Saninman* baraka ra ni hakiritigiya min ye, o tun temena olugu ta hakiri dan kan, fo o ma se ka kuma ke ni Etiyeni ye. ¹¹ O kera minke, o ka mogow dow kononosu ni wari ye Etiyeni kama. Olugu ko: «A ka kumajuguw fo cira Musa ma, ani Ala yere ma!»

¹² O cogo ra, o ka jama ni cekorobaw ni sariya karamogow* lawuri Etiyeni kama. O ka Etiyeni mina fanga ra ka taga ni a ye kititigejama ja fe. ¹³ O nana ni mogow dow ye; olugu ka faninya la Etiyeni na k'a fo ko: «Tuma bee ce nin le be kumajuguw fora Alabatosoba saninman ni cira Musa ta sariya* kama. ¹⁴ Sabu an k'a men a da ra ko Nazaretikace Yesu bena Alabatosoba ci, ani ko cira Musa ka landa minw di an ma, ko a bena o bee yelema.»

¹⁵ Kititigejama mogow ka o ja lo Etiyeni na, a pada kera o ja na i ko meleke do ta.

7

Etiyeni ta waajuri

¹ Sarakalasebagaw kuntigiba* ka Etiyeni nininka ko: «Mogow ka min fo, yala a kera ten?» ² Etiyeni k'a jaabi ko: «Ne faw, ani ne balemaw, aw ye lamenni ke! Ncorotigi Ala

ka a yeɛ yira an bemace Iburahima ra, k'a to Mesopotami jamana ra, sani a ye taga sigi Karan mara ra. ³ A k'a fo Iburahima ye ko: <Bo i ta jamana ra, ani i ta gbamogow ce ra. Ne bena jamana min yira i ra, i ye taga o yoro ra.> ⁴ Ayiwa, Iburahima wurira ka bo Kalidekaw ta mara ra, ka taga sigi Karan mara ra. A face sara tuma min na, Ala k'a labo Karan; an be jamana min na yan bi, a nana sigi o ra. ⁵ Nka Ala tun ma yoro si di a ma nin jamana konko k'a ke a ta ye, hali senlayoro. Nka Ala ka layiri ta a ye ko nin jamana bena ke a denw ta ye ale ko fe, k'a soro den tun te Iburahima yeɛ fe o wagati ra. ⁶ Ala k'a fo a ye ko: <I ta duruja bena taga to lonanya ra jamana weɛ ra. O jamana mogow bena o bla jonya ra ka o tooro fo san keme naani. ⁷ Nka o bena ke siya min ta jonw ye, ne yeɛ le bena kiti ben o siya mogow kan. O ko fe, o bena bo ka na Ala bato nin yoro ra yan*.> ⁸ O ko, Ala ka kenesisgiri yira Iburahima ra, ka o ke ale ni Iburahima ta jɛnɔgonya tagamasiyen ye. O koson Iburahima nana Isiyaka soro minke, a ka a kenesisgi a worolon tere seeginan. Isiyaka nana Yakuba soro, ale fana ka o kenesisgi. Yakuba ka an bemace tan ni fla soro, ale fana ka olugu kenesisgi.

⁹ «An bemace Yusufu jangboya ka an bema tow soro; o k'a fiyeere mogow dow ma, olugu tagara ni a ye Misiran. ¹⁰ Nka Ala tora Yusufu fe ka a bosu o toorow bee ma. Ala ka hakiritigiya di

7:3 7.3 Nin kuma fora Damina 12.1.

* **7:7** 7.6-7 Nin kuma

fora Damina 15.13-14, ani Bori 3.12.

a ma k'a ko diya Farawona ye, Misiran masace. Farawona k'a sigi Misiran jamana kuntigiya ra, k'a ke masaso jamogo ye. ¹¹ O wagatiw ra kongoba benna Misiran jamana bee kan, ani Kanaana* jamana bee. Sege tun bonyara kosebe. An bemaw tun te foyi sorora k'a domu.

¹² «Ayiwa, Yakuba nana a men ko domuni be sorora Misiran. A ka an bemaw ci ko o ye taga siman do san; o kera a sinaga folo ye. ¹³ A sinaga flanan na, Yusufu k'a yere yira a balemaw ra. O wagati le ra masace Farawona sorora ka Yusufu boyoro lon. ¹⁴ O ko, Yusufu ka mogo dow ci ka taga a face ni a somogow bee ta ka na ni o ye. O tun be mogo biwolonfla ni looru. ¹⁵ Yakuba tagara o cogo le ra Misiran. A tora Misiran fo ka na sa; an bemaw bee nana sa fana. ¹⁶ O sara minke, Iburahima tun ka kaburu min san Hamori dencew fe Sikemu, o nana ni o ye ka na o suw don o yoro ra.

¹⁷ «Ayiwa, i n'a fo Ala tun ka layiri min ta Iburahima ye, o kewagati tun be surunyara; an ta siya bonyara, o cayara Misiran jamana ra. ¹⁸ O wagati le ra masace do were nana sigi Misiran jamana kunna; ale tun ma do lon Yusufu ta ko ra. ¹⁹ O masace ka an ta siyamogow janfa ni ceguya ye, ka an bemaw toro; a tun be o jagboya k'a to o ye o ta denw to kene ma, janko denw ye faga. ²⁰ O wagati le ra cira Musa worora. A tun ce ka ni kosebe, k'a ko diya Ala yere ye. A face ni a bamuso k'a dogo k'a lamo bon konjo fo karo saba. ²¹ O ko, o k'a bla kene ma fana; nka Farawona denmuso nana a ye, a ka a ta ka taga a lamo, k'a ke i ko a yere dence. ²² O cogo ra, Musa karanna

Misirankaw ta lonniya bæe ra. Baraka tun bæ a ta kumaw, ani a ta kewalew bæe ra.

²³ «Musa si nana san binaani sorɔ wagati min na, a k'a latige ko a bæ taga a balema Izirayelimogow fle. ²⁴ A tagara a ye ko Misirankace do bæ a balema do bugora. Musa ka a balemacɛ demɛ ka Misirankace bugo k'a faga ka a balemacɛ dimibo. ²⁵ A tun bæ Musa hakiri ra ko o cogo ra a balemaw bɛna a faamu ko Ala bɛna o kisi ale sababu le ra; nka a balemaw ma o faamu. ²⁶ O dugusagbɛ Musa tagara a balema dow sorɔ kerera. A ko a bæ olugu sorona o ye bɛn kelen ma; a ko: <Aw ye ɲogon balemaw le ye; mun koson aw bæ ɲogon kere?> ²⁷ Nka min tun bæ a tɔɲogon bugora, ale ka Musa mafiyenya, k'a fo ko: <ɲon le ka ele sigi anw kunna ka i ke anw ta kititigebaga ye? ²⁸ Koni i t'a fe ka ne faga le fana i n'a fo i ka Misirankace faga cogo min na kunu?> ²⁹ Cɛ ka o kuma fo minke, Musa borira ka taga to fo Madiyan jamana ra. A ka dence fla sorɔ o yoro ra.

³⁰ «San binaani temenin ko, ka Musa to kongolon konɔ Sinayi kuru kere fe, meleke do ka a yere yira a ra yiritunin tasumaman do ra. ³¹ Musa ka o ye minke, o ko ka a kononoban. A gbarara ko a b'a fle ka na minke, Matigi Ala kumana a fe k'a fo a ye ko: ³² <Ne le ye i bɛmaw ta Ala ye, Iburahima, ani Isiyaka, ani Yakuba ta Ala.> Musa siranna fo a bæ yereyerɛ, a ma son ka a na korota k'a fle tuun. ³³ O ko, Matigi Ala ko Musa ma ko: <I ta sanbara bo i sen na, sabu i lonin bæ yoro min na nin ye, o ye yoro saninman

le ye.> ³⁴ Ala k'a fɔ a ye tuun ko: <Ne ta mɔgɔw tɔɔrɔnin bɛ cogo min na Misiran, ne ka o ye, ne ka o nɔnakan mɛn fana. Ne jigira ka na o kisi ka bɔ jɔnya ra. Na, sisan ne bɛ i ci ka taga Misiran.>

³⁵ «Ayiwa, Izirayelimɔgɔw tun banna o Musa min na k'a fiyɛnya ko: <Jɔn le ka ele sigi anw kunna ka i ke anw ta kititigɛbaga ye,> Ala nana o Musa le ci k'a ke o kuntigi ye, ani ka o kisi ka bɔ Misiran jɔnya ra mɛlɛkɛ sababu ra, mɛlɛkɛ min tun ka a yɛrɛ yira a ra yiritunin tasumaman ra.

³⁶ Ale Musa kelen le ka o labɔ Misiran jɔnya ra, ka tagamasiyɛnw ni kabakow ke Misiran jamana kɔnɔ, ani o tɛmɛtɔ Kɔgɔjiwulen cɛ ma, ani kongo kɔnɔ ka se fɔ san binaani. ³⁷ O Musa kelen le k'a fɔ fana Izirayelimɔgɔw ye ko: <Ala bɛna cira dɔ lana aw fɛ ka bɔ aw yɛrɛ balemaw cɛ ra, i n'a fɔ ne.> ³⁸ Ala ka kuma barakamanw fɔ ale Musa le ye k'a lase an bɛmaw ma; o wagati ra mɔgɔw lajennin tun bɛ kongo kɔnɔ, mɛlɛkɛ tun bɛ kumana ale ni an bɛmaw fɛ Sinayi kuru kan.

³⁹ «Nka an bɛmaw ma sɔn a ta kuma ma, o banna a ra, ka o hakiri yɛlɛma Misiran ta fɛnw fɛ; ⁴⁰ o k'a fɔ Haruna ye ko: <Batofɛn dɔw lalaga an ye, minw bɛna bla an ɔa ka taga; sabu nin Musa min ka an labɔ Misiran jamana ra, an tɛ a yera, an ma o lɔn fɛn min k'a sɔrɔ.> ⁴¹ O cogo ra o ka misiden dɔ bisigiya lalaga, ka saraka bɔ o batofɛn ye, ka ɔagari o yɛrɛ boro ta fɛn lalaganin kosɔn. ⁴² Nka Ala dimina o kɔrɔ ka a kɔ di o ma,

7:33 7.27-33 Nin kuma fɔra Bɔri 2.14-3.10. **7:37** 7.37 Nin kuma fɔra Sariya 18.15,18. **7:40** 7.40 Nin kuma fɔra Bɔri 32.1,23.

k'a to o ye tere ni karo ni lolow bato, i n'a fo a sebera ciraw ta kitabuwa ra cogo min na ko:

<Aw Izirayelimogow, aw be miiri ko aw ka began sarakaw

ni saraka to minw bee bo kongokolon konso san binaani konso,

ko aw ka o bo ne le ye wa?

⁴³ Aw ma o sarakaw bo ne ye de,

nka aw ta jo min togo ye ko Moloki, aw ka o ta fanibon le ta,

ani lolo min togo ye ko Refan, aw ka olugu bisigiya le lalaga ka o bato.

O le koson ne bena aw bla ka taga fo Babiloni ko fe†.>

⁴⁴ «Ayiwa, ka an bemaw to kongokolon konso, jernogonya kesu ta fanibon tun be o boro; Musa tun ka o lalaga i n'a fo a tun fora a ye cogo min na, ko Ala ka min yira a ra, a ye a lalaga ka kapa ni o ye. ⁴⁵ O ko fe an bemaw nana o fanibon di o ta denw ma. Yosuwe le kera olugu jamogo ye ka taga ni o fanibon ye siya werew ta jamana ra; Ala tun ka o siyaw ghen ka bo o ta jamana ra, k'a di Izirayelimogow ma. Fanibon tora o fe fo ka na se Dawuda ta wagati ma. ⁴⁶ Dawuda ka neema sorso Ala fe fo a ka Ala daari ko a y'a to ale ye bon do lo Yakuba ta Ala ye. ⁴⁷ Nka Dawuda dence Sulemani le nana ke o bon lobaga ye.

⁴⁸ «O bee n'a ta, mogo boro ka bon min lo, Ala Korotaninba te sigi o konso; i n'a fo cira k'a fo cogo min na ko:

† **7:43** 7.43 Nin kuma fora Amosi 5.25-27. Moloki tun ye Kanaanakaw ta batofen do togo ye. Refan tun ye Babilonikaw ta batofen do ye.

49 <Sankolo ye ne ta masasiginan ye,
dugukolo ye ne senblayɔɔ ye;
aw bɛ se ka bon juman le lɔ ne ye,
walama yɔɔ juman le bɛ yi tuun,
min bɛ se ka kɛ ne laganfiyayɔɔ ye?

50 Ne le ma o fɛnw bɛɛ dan ni ne ta se bagaya ye
wa?>

51 «Ayiwa, aw mɔgɔ murutininw, mɔgɔ
jusukungbɛlɛnw, ani mɔgɔ torokungbɛlɛnw, aw
bɛ Nin Saninman* sɔsɔ tuma bɛɛ, aw ni aw
bɛmaw bɛɛ ka kan. 52 Cira juman le bɛ yi, aw
bɛmaw ma min tɔɔɔ? Minw ka Ala ta mɔgɔ
terennin nako kibaro fɔ, aw ka olugu faga. Sisan
aw nana o mɔgɔ terennin fana janfa k'a faga.

53 Aw le tun ka Ala ta sariyaw* sɔɔ melekew
sababu ra, o bɛɛ n'a ta, aw ma sɔn ka tagama o
sariyaw kan.»

Etiyeni fagacogo

54 Yahudiyaw ka o kumaw men minke, o
dimina fɔ o bɛ o ɲin ɲimi Etiyeni kama. 55 Nka
Etiyeni fanin Nin Saninman* na, a k'a ɲa lɔ
sankolo ra ka Ala nɔɔɔ ye, ka Yesu lɔnin ye Ala
kininboroyanfan fɛ. 56 A ko: «Ne ɲa bɛ sankolo
dayɛlɛnin na, Min kɛra Adamaden ye*, ne ɲa bɛ
o lɔnin na Ala kininboroyanfan fɛ.»

57 Kabini Etiyeni ka o fɔ, mɔgɔw ka kulekanba
ci, ka o torow datugu; o kɔ, o bɛɛ girinna ka na
ton Etiyeni kan, 58 k'a mina k'a sama ka taga ni
a ye dugu kɔ fɛ, ka taga a bon ni kabakuru ye
k'a faga. A fagabagaw tun ka o ta deregew bɔ
ka o bla kanbelen dɔ kɔɔ, min tɔgɔ tun ye ko

Soli. ⁵⁹ Wagati min na o tun be Etiyeni bonna ni kabakuru ye, a ka Ala daari, ko: «Matigi Yesu, ne nin mina.» ⁶⁰ O ko, a ka a kinbiri gban ka peren k'a fo ko: «Matigi, i kana nin jurumun jate o kun.» Etiyeni ka o fo minke, a sara.

8

Soli ka lanabagaw tɔɔɔ

¹ Soli fana tun sonna Etiyeni fagako ma.

O lon na, koni tɔɔɔɔba sera lanabagaw be ma Zeruzalemu; o tɔɔɔɔ bonyakojugu fe, lanabagaw be janjanna ka taga Zude mara ni Samari mara ra. Ciradenw* dɔɔɔɔ le tora Zeruzalemu.

² Alapasiranbaga dɔw ka Etiyeni ta ka taga a su don; o kasira kosebe Etiyeni ta saya koson.

³ Nka Soli koni tun b'a fe ka lanabagaw ban le pewu. A tun be taga don bonw konɔ, ni a ka lanabaga fen o fen ye, ce o muso o, a be o be mina fanga ra ka taga o bla kaso ra.

Filipe ka Kibaro Diman fo Samari

⁴ Lanabaga minw tun borira ka bo Zeruzalemu, olugu tun be yaalayaala yorow ra, ka Ala ta Kibaro Diman* waajuri ke. ⁵ O ra, Filipe tagara Samari dugu do ra, ka taga Kisibaga* Yesu Kirisita ta ko waajuri ke o mogow ye. ⁶ Filipe tun be kabako minw kera, o dugumogow ka o kow men minke, ani dow nana a ye fana minke, jama caman nana o toro malɔ ka Filipe ta kumaw lamɛn kosebe. ⁷ Sabu Filipe tun be jinatow ta jinaw gben ka bo o ra; jinaw tun be kulekanba ci ka bo jinatow ra. A ka muruguw ni nabara caman keneya. ⁸ O kera nagariba ye o dugu konɔ.

9 Cε dɔ tun bε o dugu kɔnɔ kakɔrɔ, o tɔgɔ tun ye ko Simɔn. A tun bε jinamoriya kε fɔ ka Samarikaw bεε kɔnɔnɔban. A tun bε a yere kera kolɔnbagaba ye. 10 Mɔgɔ fitini fara mɔgɔba kan, bεε tun b'a flera, k'a lamɛn; o tun b'a fɔra ko: «Nin kɔni ye Ala ta sebagaya yere le ye, sebagayaba.» 11 O bεε tun b'a flε, k'a lamɛn, sabu kabini wagatijan a tun bε jinamoriyako minw kera, o tun ka o kɔnɔnɔban. 12 Nka Filipe ka Ala ta Masaya* ko ni Yesu Kirisita tɔgɔ kibaro Diman fɔ o ye minke, o mɔgɔw sɔnna Filipe ta kuma ma; cε fara muso kan, o bεε batizera. 13 Hali Simɔn yere sɔnna Ala ta Kuma ma. A batizera minke, a tora ni Filipe ye. Filipe tun bε tagamasiyenw ni kabako minw kera, o tun k'a kɔnɔnɔban kosebε.

Ciradenw ka Ala daari Samari lanabagaw ye

14 Ciradenw* tora Zeruzalemu k'a mɛn ko Samarika dɔw sɔnna ka la Ala ta Kuma ra; o ka Piyeri ni Yuhana ci o fε. 15 Piyeri ni Yuhana sera Samari tuma min na, o ka Ala daari Samari lanabagaw ye, janko o ye Nin Saninman* sɔrɔ. 16 Sabu Nin Saninman* tun ma jigi o mɔgɔw si kan fɔlɔ; o tun batizera Matigi Yesu tɔgɔ le ra dɔrɔn. 17 O ra, Piyeri ni Yuhana ka o boro la o kan minke, o ka Nin Saninman sɔrɔ.

18 Ayiwa, Simɔn k'a ye ko lanabagaw ka Nin Saninman sɔrɔ ciradenw ta borolari fε minke, a ka wari di o ma, 19 k'a fɔ o ye ko: «Aw ye nin sebagaya di ne fana ma, janko ni ne ka ne boro la mɔgɔ o mɔgɔ kan, o tigi ye Nin Saninman sɔrɔ.» 20 Piyeri ko a ma ko: «Ele ni i ta wari bεε ye halaki jɔgɔn fε, sabu i b'a miiri ko Ala bε fen min di gbansan, i bε se ka o sɔrɔ ni wari ye.»

²¹ O kɔ, Piyeri k'a fɔ a ye ko: «Ele kɔni nin tɛ nin ko ra, i ta sɔrɔta fana t'a ra, sabu i jusukun ma teren Ala na kɔrɔ. ²² Nimisa i ta miirijuguw ra, ka Matigi daari, janko ɲaninyajugu minw bɛ i jusukun na, a ye o yafa i ma, ni a bɛ se ka kɛ; ²³ sabu ne k'a ye ko ele kɔnɔ fanin lo pangboya ni kojugu ra, fɔ ka i siri ka i bla jurumun ta jɔnya ra.» ²⁴ Simɔn ko Piyeri ni Yuhana ma ko: «Aw yɛrɛ ye Matigi daari ne ye, janko aw ka min fɔ, o si kana ne sɔrɔ.»

²⁵ Piyeri ni Yuhana ka seereya kɛ, ka Matigi ta Kibaro Diman fɔ mɔgɔw ye minkɛ, o sekɔra ka taga Zeruzalɛmu; o tagato ka Kibaro Diman fɔ Samari dugumisenw caman na ka taga.

Filipe ni Etiyopikace fagama

²⁶ Matigi ta meleke dɔ kumana Filipe fɛ, ko: «Wuri ka taga woroduguyanfan fɛ. Sira min bɛ bɔ Zeruzalɛmu ka taga Gaza, i ye o sira ta; mɔgɔ tɛ tɛmɛna o sira kan tuun.» Filipe wurira o yɔrɔnin bɛɛ ra ka sira ta. ²⁷ K'a tagato to, a ka Etiyopikace dɔ ye; o cɛ tun ye Etiyopi jamana masamuso Kandasi ta fagamaba dɔ le ye. Ale le tun siginin bɛ masamuso ta naforo bɛɛ kunna. O cɛ tun tagara Zeruzalɛmu ka taga Ala bato. ²⁸ A sekɔto tun siginin bɛ a ta sowotoro kɔnɔ, a bɛ cira Ezayi ta kitabu karanna. ²⁹ Nin Saninman* k'a fɔ Filipe ye ko: «Gbara sowotoro nin na.» ³⁰ Filipe borira ka gbara wotoro ra minkɛ, a k'a ye ko o Etiyopikace bɛ cira Ezayi ta kitabu karanna. Filipe k'a ɲininka ko: «I bɛ min karanna, i ka o kɔrɔ lɔn wa?» ³¹ O cɛ ka Filipe jaabi ko: «Ne bɛ se k'a kɔrɔ lɔn cogo di, ni mɔgɔ m'a yira ne ra?»

A k'a fɔ Filipe ye ko a ye yelen ka sigi ale koro sowotoro kono. ³² A tun be yoro min karanna, o fle nin ye, ko:

«A tun kera i ko saga min minana ka taga a fagayoro ra,

i n'a fɔ sagaden min te kasi a si kanbagaw boro, a ma foyi fɔ.

³³ O k'a mafiyenya, o ma son ka lo a ra ko jo b'a fe.

Jon be kuma a ta duruja ko ra?

Sabu o k'a faga k'a ta siya tunu dunuja ra.»

³⁴ Ayiwa, ce ka kuma ta, k'a fɔ Filipe ye ko: «Ne be i daari, a fɔ ne ye, cira be kumana jontigi ta ko le ra? A yere ko lo wa, walama mogo wera ko lo?» ³⁵ O tuma Filipe ka kuma ta; a k'a damina o kuma yere ra ka Yesu Kirisita ko Kibaro Diman* fɔ a ye.

³⁶ Ka o tagato to, o tagara se ko do ma. Ce k'a fɔ Filipe ye ko: «Ji ye nin ye! Mun le be ne bari ka batize?» ³⁷ [Filipe k'a fɔ a ye ko: «Ni i be la Yesu ra ni i jusukun bee ye, i be se ka batize.» Ce ka Filipe jaabi ko: «Ne lara a ra ko Den min bora Ala ra* ko Yesu Kirisita lo.»] ³⁸ A ka sowotoro lalo; o fla bee jigira ji ra. Filipe k'a batize. ³⁹ O bora ji ra wagati min na, Matigi Nin ka Filipe ta ka taga ni a ye. Ce ma Filipe ye tuun, nka a ka sira ta ka taga, a ninsondiyanin.

⁴⁰ Filipe koni nana a yere soro Azoti dugu le kono. A bora yi ka taga Sezare. A tagato, a temena dugu o dugu ra, a ka Kibaro Diman fɔ o bee ra ka taga.

9

Yesu k'a yere yira Söli ra

(Kewalew 22.3-16; 26.9-20; Galasikaw 1.1-16)

¹ Ayiwa, o wagati ra Söli belen tun be kankari lara Matigi Yesu ta karamogodenw ye, ko ni a ka min o min mina, a be o faga. A tagara sarakalasebagaw kuntigiba* fe, ² ko a ye sebe do di ale ma; a tun b'a fe ka taga o sebe di Yahudiyaw ta karanso kuntigiw ma Damasi dugu konö, janko ni a ka mogö o mogö sorö yi min be o sirakura kan, ce fara muso kan, a ye o bee mina ka o siri ka na ni o ye Zeruzalemu.

³ Ka Söli tagato, a surunyanin Damasi ra, yee-lenba do barara ka bo sankolo ra ka manamana ka Söli lamini. ⁴ Söli bora ka ben dugu ma. A ka kumakan do men, ko: «Söli, Söli, mun koson i be ne toora?» ⁵ Söli ko: «Ele ye jon ye, Matigi?» Kumakan ko: «I be min toora, o ye ne Yesu le ye. ⁶ Ayiwa, wuri ka taga dugu konö; i ka kan ka min ke, o bena o fo i ye yi.»

⁷ Söli tagamanogonw ja tigeninba lonin tora, o ma se ka kuma; olugu tun be kumakan mena, nka o tun ma mogö si ye. ⁸ Söli wurira ka lo; a ja tun yelenin lo, nka a tun te foyi yera. O k'a boro mina ka taga ni a ye Damasi dugu konö. ⁹ Söli ka tere saba ke, a tun te yeri ke, a ma domuni ke, a ma ji min.

Ala ka Ananiyasi ci Söli fe

¹⁰ O wagati ra Yesu ta karamogoden do tun be Damasi, o togö tun ye ko Ananiyasi. Matigi k'a yere yira a ra, k'a wele ko: «Ananiyasi.» A ko: «Naamu, Matigi.» ¹¹ Matigi ko a ma ko:

«Wuri sisan ka sira ta, o be sira min wele ko Sira Terennin. I be taga Zuda ta so konɔ. Ni i sera yi, i be ce do kopininka, a togo ye ko Soli, a bora Tarisi. A be Ala daarira sisan yere. ¹² K'a to Aladaari ra, Ala ka ce do yira a ra min togo ye ko Ananiyasi. A k'a ye ko o ce donna a fe bon konɔ k'a boro la a kan, janko a ye yeri ke tuun.» ¹³ Ananiyasi ko: «E, Matigi, ce nin ka i ta mogo saninmanw tooro cogo min na Zeruzalemu, mogo caman ka o lakari ne ye. ¹⁴ A nana ni sebe do ye yan ka bo sarakalasebagaw* kuntigiw fe, ko mogo o mogo be i togo fora yan, a ye o bee mina ka o siri ka taga ni o ye.»

¹⁵ Nka Matigi k'a fo Ananiyasi ye ko: «Taga, sabu ne ka nin ce panawoloma k'a ke ne ta baarakeminan le ye, janko a ye ne togo waajuri ke siya were mogow* ni o ta masacew ye, ani Izirayelimogow ye. ¹⁶ Tooro minw bena se a ma fana ne koson, ne bena o bee yira a ra.»

¹⁷ Ayiwa, Ananiyasi tagara; a tagara don bon konɔ minke, a k'a boro la Soli kan, k'a fo a ye ko: «Ne balemace Soli, Matigi Yesu min k'a yere yira i ra sira kan, ka i nato to yan, ale ka ne ci i fe, janko i ye yeri ke tuun, ani ka fa Nin Saninman* na.» ¹⁸ O yoronin kelen bee fen dow bora Soli nadenw na ka benben, i n'a fo jegefara; a na yelera. A wurira, ka batize. ¹⁹ O ko, a ka domuni ke, ka baraka soro.

Soli tora Damasi ka tere dama ke ni Yesu ta karamogodenw ye.

Soli ka waajuri ke Damasi

²⁰ O wagati yere ra Soli ka ke waajuri ke ye karansow kono, k'a fo o ye ko Den min bora Alara*, ko o ye Yesu le ye. ²¹ Mogo minw tun be a lamenna, olugu bee kononobanna; o tun b'a fora ko: «Nin ce yere le tun te Yesu togo fobagaw toorora Zeruzalemu wa? A nakun yere tun te yan, janko ka o mogow mina ka o siri ka taga ni o ye sarakalasebagaw* kuntigiw fe Zeruzalemu wa?»

²² O bee n'a ta, do le tun be farara Soli ta lanaya baraka kan ka taga na; a ta waajuri cogo tun ka Yahudiyaw kononofiri Damasi, sabu a tun b'a fora k'a gbeya ko Yesu ye Kisibaga* ye; o tun te se ka foyi soro k'a jaabi tuun.

²³ Ayiwa, tere dama temenin ko, Damasi Yahudiyaw ka janfa siri ko o be Soli faga; ²⁴ nka Soli bora o ta janfa koro ma. O tun be dugu dondaw bee korosi su ni tere, janko k'a soro k'a faga. ²⁵ Nka lon do su fe, Yesu ta karamogodenw ka Soli don segi do kono k'a lajigi dugu kogo ko fe ni juru ye.

Soli tagara Zeruzalemu

²⁶ Ayiwa, Soli sera Zeruzalemu minke, a tun b'a fe ka kori karamogoden tow ra, nka olugu bee tun be siranna a na, sabu o tun ma la a ra ko a kera Yesu ta karamogoden do ye can ra. ²⁷ O ra, Barinabasi tagara ni Soli ye ciradenw* fe; Soli ka Matigi ye Damasi sira kan cogo min na, ani Matigi kumana a fe cogo min na, ani Soli ka Yesu togo fo k'a gbeya mogow bee na na ni jagbeleya ye cogo min na Damasi, Barinabasi ka o bee lakari ciradenw ye.

28 K'a ta o wagati ra, Soli kera ciradenw tagamaɓogon ye Zeruzalemu; a tun be kuma kene kan, ka mogow waaju Matigi togo ra. 29 Soli tun be to ka kuma, ani ka sosori ke ni Yahudiya gerekikanfobagaw fana ye; nka olugu fana tun b'a fagayoro pinina. 30 Lanabaga tow nana bo o ko kala ma minke, olugu ka Soli lataga Sezare; o ko, o k'a lataga Tarisi.

31 Ayiwa, o wagati ra lanabagaw ta jenkuru* mogow tun be hera ra Zude ni Galile ni Samari. O baraka tun be bonyara, o tun be tagama Matigi nasiran na; dow fana tun be farara o kan lon o lon Nin Saninman* baraka ra.

Piyeri ka Ene keneya

32 Ayiwa, Piyeri tun be yorow bee yaalara ka lanabagaw fle; lanabaga minw be Lida, a tagara olugu fana fe. 33 A tagara a soro ce do lanin be bana ra kabini san seegi, a togo ye ko Ene; a tun murugunin lo. 34 Piyeri ko a ma ko: «Ene, Yesu Kirisita be i keneya! I wuri ka i ta lanan lalaga i yere ye.» Ene wurira o yoronin kelen bee ra. 35 Lida dugumogow bee, ani Saron kenegbe mogow bee ka o ye minke, o sonna Matigi ma.

Piyeri ka Tabita su lakunu

36 Ayiwa, lanabagamuso do tun be Zafa dugu konɔ, a togo tun ye ko Tabita, walama Dorikasi, gerekikan na; o koro ye ko dagbe. O muso tun be kopuman caman ke, ka fagantanw deme. 37 Tabita nana bana, fo ka na sa. O k'a su ko, k'a ta ka taga a la bon do konɔ sankaso san fe. 38 In'a fo Zafa ni Lida ce man jan, Zafa karamogodenw k'a men ko Piyeri be soro Lida. O ka mogo fla ci

ka taga Piyeri daari, k'a fɔ a ye ko: «Sabari ka na an fɛ sisan.» ³⁹ Piyeri wurira ka taga ni o ye. A sera yi minke, o tagara ni a ye bon kɔnɔ sankaso san fɛ. Muso cɛ saninw bɛɛ nana Piyeri lamini, ka to ka kasi. Ka Tabita janaman to ni o ye, a tun bɛ derege fitiniw ni deregeba minw lalaga, o ka o bɛɛ yira Piyeri ra. ⁴⁰ O tuma Piyeri ka mɔgɔw bɛɛ labɔ kenɛ ma, k'a kinbiri gban dugu ma ka Ala daari. O ko, a k'a ja yeɛma su fan fɛ k'a fɔ ko: «Tabita, i wuri!» Tabita k'a ja yeɛ; a ka Piyeri ye minke, a wurira ka sigi. ⁴¹ Piyeri k'a mina a boro ma k'a demɛ k'a lawuri. O ko, Piyeri ka lanabagaw ni muso cɛ saninw wele, ka Tabita janaman yira o ra. ⁴² Zafa dugumɔgɔw bɛɛ bɔra o ko kala ma. Mɔgɔ caman lara Matigi ra. ⁴³ Piyeri tora Zafa ka wagatijan ke; a tun bɛ cɛ dɔ ta so kɔnɔ, min tɔgɔ ye ko Simɔn, o tun ye gbolologiba le ye.

10

Mɛɛkɛ kumana Kɔrinɛli fɛ

¹ Cɛ dɔ tun bɛ Sezare, min tɔgɔ tun ye ko Kɔrinɛli; sorasikuru min bɛ wele ko Itali sorasikuru, ale tun ye o sorasikuru kuntigiba dɔ ye. ² O cɛ tun ye Alapasiranbaga ye, ani Ala batobaga, a ni a ta somɔgɔw bɛɛ. A tun bɛ saraka caman bɔ ka Yahudiya fagantanw sɔn, ka Ala daari tuma bɛɛ.

³ Ayiwa, lon dɔ wulada fɛ, Kɔrinɛli k'a ye ko Ala ta mɛɛkɛ dɔ nana don ale fɛ bon kɔnɔ, ka a wele ko: «Kɔrinɛli!» ⁴ Kɔrinɛli k'a ja lɔ mɛɛkɛ ra; a siranna. A ko: «Mun lo, Matigi?» Mɛɛkɛ k'a fɔ a ye ko: «I ta Aladaariw ni i ta sarakaw

diyara Ala ye; Ala ka a hakiri to i ra. ⁵ Ayiwa, mɔgɔ dɔw ci sisan ka taga Zafa, ka taga cɛ dɔ wele ka na, min tɔgɔ ye ko Simɔn, ani a bɛ wele fana ko Piyeri. ⁶ A bɛ gbolologibaga dɔ ta so, o fana tɔgɔ ye ko Simɔn; o ta bon bɛ kɔgɔjida ra.»

⁷ Mɛlɛkɛ min kumana Kɔrinɛli fɛ, o tagara minke dɔrɔn, Kɔrinɛli ka a ta baarden fla wele, ani sorasice kelen, min tun ye a jɛnɔgɔn ye; o fana tun ye Alapasiranbaga ye. ⁸ Ayiwa, mɛlɛkɛ ka kuma min fɔ, a ka o bɛɛ lakari olugu ye, ka o ci ka taga Zafa.

Ala ka ko minw yira Piyeri ra

⁹ O lon dugusagbɛ, o mɔgɔ saba tagatɔ, o surunyara Zafa ra minke, o wagati ra Piyeri tun yelenna biribon konna ka Ala daari; o y'a sɔrɔ tere tun bɛ kuncɛ. ¹⁰ Kɔngɔ nana Piyeri sɔrɔ, a ko a bɛ domuni kɛ. Ka o to domuni labɛn na, Ala ka fɛn dɔ yira Piyeri ra. ¹¹ A ka sankolo dayɛlɛnin ye, ka fɛn dɔ ye i ko faniba dɔ, a sirinin bɛ a kun naani na, a bɛ jigira ka na dugu ma. ¹² Began suguya bɛɛ, ani dugukolo fɛn fofotaw, ani kɔnɔ suguya bɛɛ tun bɛ o fani kɔnɔ. ¹³ Kumakan dɔ ko Piyeri ma ko: «Piyeri, wuri ka dɔ faga k'a domu.» ¹⁴ Piyeri ko: «Ɔn-ɔn, Matigi, sabu ne ma fɛn nɔgɔnin, walama fɛn saninyabari si domu ka ye*.» ¹⁵ Piyeri ka o kumakan mɛn tuun a sɔnaga flanan na, ko: «Ala k'a latige ko fɛn min saninyara, ele man kan ka o jate fɛn nɔgɔninw ye.» ¹⁶ O kuma fɔra ka se fɔ sɔnaga saba; o kɔ,

* **10:14** 10.14 Piyeri ka nin kuma fɔ ka kapa ni cira Musa ta sariya le ye (Sarakalasebagaw 11.1-47).

o yorɔnin bɛɛ o faniba korɔtara ka taga sankolo kɔnɔ.

¹⁷ Piyeri hakiri tun pagamina; a ka fen minw ye, a tun bɛ miirira o korɔ ra. O wagati ra, Korineli tun ka mɔgɔ minw ci, olugu nana se Zafa, ka Simɔn ta yɔrɔ kopininka; o ka yɔrɔ yira o ra minke, o tagara lɔ luda ra. ¹⁸ O ka weleri ke, ka jininkari ke ko: «Simɔn min bɛ wele ko Piyeri, ale bɛ yan le wa?» ¹⁹ Piyeri ka fen minw ye, a belen tun bɛ miirira o korɔ ra minke, Nin Saninman* k'a fɔ a ye ko: «A fle, mɔgɔ saba bɛ i kopininkara kene ma. ²⁰ Wuri ka jigi, ka taga ni o ye, i kana sigiya; sabu ne le ka o ci i fe.» ²¹ Piyeri jigira ka na o nɔ fe; a ko: «Aw bɛ mɔgɔ min yɔrɔpinina, ne lo. Aw nakun ye juman le ye ne fe?» ²² O mɔgɔw ka Piyeri jaabi ko: «Sorasikuntigi Korineli le ka an ci; mɔgɔ terennin lo, a bɛ siran Ala ja fana. Yahudiyaw bɛɛ bɛ a tɔgɔnuman fɔra. Ala ta meleke saninman dɔ ka a yere yira a ra k'a fɔ a ye ko a ye i wele ka na a ta so, janko ka i ta kumaw lamɛn.» ²³ Piyeri ka o ladon so kɔnɔ, ka siyɔrɔ di o ma. O dugusagbɛ a tagara ni o ye. Zafa lanabaga dɔw tagara ni o ye fana.

²⁴ O lon dugusagbɛ, o sera Sezare. O y'a sɔrɔ Korineli tun k'a ta somɔgɔw ni a teri janamanw lajen a ta so kɔnɔ, ka Piyeri makɔnɔ. ²⁵ Piyeri dontɔ so kɔnɔ, Korineli nana a kunben, ka a kinbiri gban Piyeri korɔ. ²⁶ Nka Piyeri ka a lawuri k'a fɔ a ye ko: «I wuri, ne fana ye adamaden le ye.» ²⁷ Ka Piyeri to kuma ra ni Korineli ye, a donna bon kɔnɔ ka mɔgɔ caman lajennin yi. ²⁸ Piyeri k'a fɔ o ye ko: «Aw k'a lon ko

ka kapa ni an ta sariya* ye, Yahudiya si man kan ka jɛnɔgɔnya kɛ ni siya wɛrɛ mɔgɔ* ye, walama ka don a ta so kɔnɔ. Nka Ala k'a yira ne ra ko ne man kan ka mɔgɔ si jate mɔgɔ nɔgɔnin ye, walama mɔgɔ saninyabari. ²⁹ O le kosɔn aw ka mɔgɔw ci ka taga ne wele minkɛ, ne nana, hali ne ma sɔsɔri kɛ. Ayiwa, sisan ne bɛ aw jɛninka: <Aw ka ne wele ka na kun juman le ra?> »

³⁰ Kɔrineli ka Piyeri jaabi ko: «Bi ye a tere naani ye, ka ne to Aladaari ra ne ta bon kɔnɔ wulada fɛ nin wagati jɔgɔn na, ne barara ka cɛ dɔ lɔnin ye ne ja kɔrɔ, deregegbɛ bɛ a kan na, a bɛ manamanana. A ko ne ma ko: ³¹ <Kɔrineli, i ta Aladaari minana; i ka kopuman o kopuman kɛ, Ala hakiri tora o bɛɛ ra fana. ³² Mɔgɔ dɔw ci ka taga Zafa, ka taga Simɔn wele, min tɔgɔ lara fana ko Piyeri. A bɛ cɛ dɔ ta lu kɔnɔ, o fana tɔgɔ ye ko Simɔn, a bɛ gbolobaara kɛ, a ta lu bɛ kɔgɔjida ra.> ³³ O yɔrɔnin kelen bɛɛ ne ka mɔgɔ dɔw ci ka taga i wele; i nako jana. Ayiwa, sisan an bɛɛ lajennin fɛ yan Ala ja kɔrɔ; Matigi ka fɛn o fɛn yira i ra, an b'a fɛ ka o lamɛn.»

Piyeri ka waajuri kɛ Kɔrineli ta so kɔnɔ

³⁴ O tuma Piyeri ka kuma ta k'a fɔ ko: «Can ra, ne k'a lɔn sisan ko Ala tɛ mɔgɔ bɔ mɔgɔ ra, ³⁵ nka siya o siya ra, mɔgɔ min bɛ siran Ala ja, ka tagama terenninya kan, o tigi ko ka di Ala ye. ³⁶ Ala ka a ta kuma lase Izirayelimɔgɔw ma, ka hɛra Kibaro Diman* fɔ o ye Yesu Kirisita baraka ra. Ale le ye mɔgɔ bɛɛ Matigi ye; ³⁷ Yesu ta kopaw kɛra cogo min na Zude jamana yɔrɔ bɛɛ ra, k'a damina Galile, aw yɛrɛ ka o kow

bɛɛ lɔn. O kow kera Yuhana ta waajuri ni a ta batizeri* kɔ fɛ. ³⁸ Ayiwa, Ala ka Yesu Nazaretikace panawoloma cogo min na k'a fa Nin Saninman* na, ka sebagaya di a ma, aw ka o lɔn. A tun bɛ yɔrɔw yaalayaala, ka koɲuman kɛ mɔgɔw ye, ani minw bɛɛ tun bɛ Setana ta jɔnya ra, a tun bɛ olugu bɛɛ kisi ka bɔ o jɔnya ra, sabu Ala tun bɛ ni a ye. ³⁹ Yesu ka ko o ko kɛ Yahudiyaw ta jamana ra, ani Zeruzalemu dugu yere kɔnɔ, anw ye o kow seerew ye. O k'a mina k'a gbengben yiri ra k'a faga. ⁴⁰ Nka a saya tere sabanan, Ala ka a lakunu ka bɔ saya ra, k'a to a ye a yere yira mɔgɔw ra. ⁴¹ Mɔgɔw bɛɛ m'a ye, nka Ala tun ka anw minw panawoloma kakɔrɔ ka kɛ a seerew ye, anw le k'a ye, an minw ka domuni kɛ, ani ka minnin kɛ ni a ye, a kununin kɔ ka bɔ saya ra. ⁴² Yesu ka nin ci di anw ma ko an ye mɔgɔw waaju, k'a fɔ k'a gbɛleya ko Ala ka Yesu le sigi k'a kɛ suw, ani panamanw ta kititigɛbaga ye. ⁴³ Ciraw bɛɛ kera seerew ye k'a fɔ ko ni mɔgɔ o mɔgɔ ka la Yesu ra, o tigi bɛ jurumun yafa sɔrɔ a tɔgɔ baraka ra.»

Nin Saninman jigira siya wɛrɛ mɔgɔw kan

⁴⁴ Ka Piyeri to o kuma ra, Nin Saninman* jigira a lamɛnbagaw bɛɛ kan. ⁴⁵ Yahudiya lanabaga minw tun ka Piyeri blasira, olugu kabakoyara k'a ye ko Ala ka Nin Saninman di, k'a lajigi siya wɛrɛ mɔgɔw* fana kan. ⁴⁶ Sabu o k'a ye ko o mɔgɔw bɛ kumana kan wɛrɛw ra, ka Ala bonya. ⁴⁷ O tuma Piyeri ko: «Mɔgɔ minw ka Nin Saninman sɔrɔ i ko anw fana k'a sɔrɔ cogo min na, yala an bɛ se ka olugu bari ko o kana batize ji ra wa?»

48 O ra, Piyeri k'a latige ko o mɔgɔw ye batize Yesu Kirisita tɔgɔ ra.

O kɔ, o ka Piyeri daari ko a ye tere dama ke o fe.

11

Piyeri ka Kɔrineli ta ko jafɔ Zeruzalemu lanabagaw ye

1 Ciradenw* ni lanabaga minw be Zude, olugu k'a men ko siya were mɔgɔw* fana sɔnna Ala ta Kuma ma. 2 O koson tuma min na Piyeri kɔsegira ka na Zeruzalemu, Yahudiya lanabagaw ka Piyeri jaraki, ko: 3 «Ele sɔnna ka taga don siya kenɛsigibariw ta so kɔnɔ, fɔ ka domuni ke ni o ye!»

4 O tuma, kow temena cogo min na, Piyeri ka o beɛ jafɔ o ye kelen kelen. 5 A ko: «Tuma min ne tun be Zafa dugu kɔnɔ, lon dɔ, ka ne to Aladaari ra, Ala ka fen dɔ yira ne ra: ne ka fen dɔ ye, o fen tun be i ko faniba dɔ, a sirinin be a kun naani na, a be jigira ka bɔ san fe; a nana se ne kɔrɔ. 6 Ne k'a lalaga k'a fle minke, ne ka dugukolo beganw ni kongosogow ni fen fofotaw ni kɔnɔw ye o faniba kɔnɔ. 7 Ne ka kumakan dɔ men; a ko ne ma ko: <Piyeri, wuri ka dɔ faga k'a domu.> 8 Ne ko: <ɔn-ɔn, Matigi, sabu fen nɔgɔnin walama fen saninyabari si ma don ne da ra ka ye fiyewu.> 9 Nka kumakan bɔra sankolo ra tuun a sijaga flanan na, ko: <Ala k'a latige ko fen min saninyara, ele man kan ka o jate fen nɔgɔninw ye.> 10 A kera ten ka se fɔ sijaga saba; o kɔ, o

faniba ni a kɔnɔfenw yelenna ka taga sankolo kɔnɔ.

¹¹ «O wagati kelen yere ra, ne tun be lu min kɔnɔ, mɔgɔ saba nana lo o lu donda ra, ko o ka olugu ci ne fe ka bo Sezare. ¹² Nin Saninman* k'a fo ne ye ko ne ye taga ni o mɔgɔw ye, ko ne kana sigiya. Balemace wɔɔɔ minw fle nin ye, olugu tagara ne blasira. An tagara don Korineli ta bon kɔnɔ. ¹³ Ayiwa, Korineli k'a fo an ye ko ale ka meleke lonin ye a ta bon kɔnɔ, ko meleke k'a fo a ye ko: <Mɔgɔ do ci ka taga Zafa ka taga Simon wele, min togo lara ko Piyeri; ¹⁴ ele ni i ta gbamogow bee bena kisi cogo min na, ale le bena o sira yira aw ra.> ¹⁵ Ayiwa, ne ka kuma damina minke doron, Nin Saninman jigira o mɔgɔw kan i n'a fo a tun jigira anw kan cogo min na a damina ra. ¹⁶ O tuma, ne hakiri sorora ka jigi Matigi ta kuma ra, ko: <Yuhana ka mɔgɔw batize ji le ra, nka aw koni aw bena batize ni Nin Saninman le ye.> ¹⁷ Ayiwa, anw minw lara Matigi Yesu ra, Ala ka fen min di anw ma, ni a nana o fen kelen di olugu fana ma, o tuma ne ye jon le ye k'a fo ko ne be ban Ala sago ma?»

¹⁸ Ciradenw ni lanabaga tow ka Piyeri ta kuma men minke, o jusu sorora ka suma, o ka Ala tando; o ko: «Can lo, Ala sonna k'a to siya were mɔgɔw* fana ye nimisa o ta jurumunw na, janko o ye panamanya sorɔ.»

Antiyosi ta lanabagaw ta jenkuru

¹⁹ Etiyeni faganin ko, o ka lanabagaw tooro kosebe. Lanabaga minw borira ka janjan o toorow wagati ra, olugu dow tagara fo Fenisi, ani Sipere maraw ra; dow tagara Antiyosi. Nka

olugu tun tɛ Ala ta Kuma fɔ mɔgɔ wɛrɛ ye ni Yahudiyaw dɔrɔn tɛ. ²⁰ O bɛɛ n'a ta, o mɔgɔ dɔw tun bɔra Sipere ni Sireni ka na Antiyɔsi; olugu kumana siya wɛrɛ mɔgɔw* fana fɛ, ka Matigi Yesu ta Kibaro Diman* fɔ o ye. ²¹ Matigi ta sebgaya tun bɛ o lanabagaw kan; mɔgɔ camanba lara Matigi ra, ka sɔn Matigi ma.

²² O ko kibaroya sera Zeruzalemu lanabagaw ta jenkuru* mɔgɔw ma minke, o ka Barinabasi ci ka taga Antiyɔsi. ²³ Barinabasi sera Antiyɔsi minke, a ka Ala ta baraka ye lanabagaw kan minke, o ka a jusu diya. A ka lanabagaw ja gbɛlɛya ko o ye jija ka to Matigi ta sira kan. ²⁴ Barinabasi tun ye mɔgɔɔnuman le ye; a tun fara Nin Saninman* na, lanaya tun b'a jusu ra fana. Jama caman fana sɔnna Matigi ma.

²⁵ O ko, Barinabasi tagara Tarisi, ka taga Sɔli yɔrɔɔnini. ²⁶ A ka Sɔli ye minke, a nana ni a ye Antiyɔsi. O ka san kelen dafanin ke, o bɛ to ka taga lajen ni lanabagaw ye; o ka mɔgɔ caman karan Matigi ta sira ra. Ka lanabagaw wele ko Kirisita* ta mɔgɔw*, o dabɔra Antiyɔsi ta lanabagaw le ra.

²⁷ O lonw na, cira dɔw tun bɔra Zeruzalemu ka na Antiyɔsi. ²⁸ O ra kelen tɔgɔ tun ye ko Agabusi; ale wurira k'a fɔ Nin Saninman baraka ra ko kongɔba dɔ bɛna ben dunuɔa yɔrɔ bɛɛ kan. O kuma nana ke can ye; o kongɔba kera Rɔmu* masaceba Kolodi ta tere ra. ²⁹ O ra, Antiyɔsi ta lanabagaw k'a latige ka kaɓa ni o bɛɛ kelen kelen seko ye, ka o balemaw demɛ, minw ye

* **11:26** 11.26 Kirisita ta mɔgɔw: Tubabukan na o ye keretiyenw ye.

Zude lanabagaw ye. ³⁰ O ka o le ke; o ka o fenw don Barinabasi ni Söli boro, ka taga o di Zude lanabagaw ta cekorobaw ma.

12

Yakuba fagako ani Piyeri minako

¹ O wagati ra, masace Herodi* ka lanabaga dow mina ka o tōro. ² A ka Yuhana balemace Yakuba faga ni muru ye. ³ A k'a ye ko o diyara Yahudiyaw ye minke, a ko o ye Piyeri fana mina. O tun kera burufunubari janagbe* wagati ra. ⁴ Ayiwa, o ka Piyeri mina k'a bla kaso ra, ka sorasice naani sigiyoroma naani bla k'a korosi; a tun b'a fe ka Piyeri ta kiti tige jama ja korō Jonyaban janagbe* temenin ko. ⁵ Piyeri koni tora kasobon konō yi; nka lanabagaw tun jijara Aladaari ra a ye.

Piyeri bocogo kaso ra

⁶ Ayiwa, Herodi* tun labenna, ko ni dugu gbera, a bena Piyeri ta kiti tige jama ja korō. O su fe, Piyeri tun be sunogora sorasi fla ce ma, k'a sirinin to ni negejoroko fla ye. Sorasi dow tun lolonin be da ra, o be kasobon korosira. ⁷ Matigi ta meleke do donna kasobon konō; yeelen do manamanana kasobon konō. Meleke ka Piyeri bugobugō a keren na k'a lakunu, k'a fo a ye ko: «Wuri jooona!» Negejoroko tigeria ka bo a boro ra ka ben dugu ma. ⁸ Meleke ko: «I yere cesiri, ka i ta sanbara don!» Piyeri ka o ke. Meleke ko a ma ko: «I ta deregeba don ka tugu ne ko!» ⁹ Piyeri bora ka tugu meleke ko. A tun m'a lon ko meleke be min kera ko o ye can le ye; a tun b'a miiri

ko siko lo. ¹⁰ O tagara se kasobon korosibagaw ta jenkuru folo ma; o temena o ra ka taga se jenkuru flanan ma, ka teme o fana ra ka taga se dondaba ma; o tun ye negekon le ye, a nasinna dugukonoyoro ma. O donda yelera a yere ma o na. O bora ka sira do ta; ka o tagato to, meleke barara ka tunu Piyeri ma.

¹¹ Ayiwa, o tuma Piyeri hakiri sigira; a ko: «Sisan ne k'a ye ko can ra, Matigi le ka a ta meleke ci ka na ne bosi Herodi boro, ani Yahudiyaw tun be kojugu minw jate minana, ka ne kisi o bee ma.»

¹² Piyeri hakiri sigira minke, a tagara Mariyamu ta so konon; Yuhana min be wele ko Marika, o bamuso lo. Lanabaga caman tun lajenna o yoro ra, o be Ala daarira. ¹³ Piyeri ka da gbasi; baardenmuso min togo tun ye ko Roda, ale nana ko a bena da ye. ¹⁴ A k'a ye ko Piyeri kan lo minke, ninsondiya koson, sani a ye da ye Piyeri ye, a borira ka taga a fo tow ye ko Piyeri lonin be da ra kene ma. ¹⁵ Mogo ko a ma ko: «Ele kunkolo te yi!» Nka Roda k'a fo k'a gbeleya ko can yereyere lo. O ko: «I b'a soro a ta meleke lo.» ¹⁶ Piyeri koni tun be da gbasira ye. O nana da ye ka Piyeri ye minke, o bee kononobanna.

¹⁷ Piyeri ka a boro korota, k'a fo ko o ye je. Matigi ka a labo kaso ra cogo min na, a ka o nafa o ye; a ko: «Aw ye taga a fo Yakuba* ni an balema tow ye.» O ko, a bora ka taga yoro were ra.

* **12:17** 12.17 Yakuba: ale ye Matigi Yesu balemace ye.

18 Ayiwa, dugu nana gbɛ minke, sorasiw bɛɛ hakiri pagamininba tun bɛ ɲɔgɔn ɲininkara ko Piyeri kera cogo di le? 19 Herodi ka mɔgɔ dɔw ci ka taga Piyeri yɔrɔɲini, nka o m'a ye. A ka sorasiw wele ka o ɲininka; o kɔ, a ko o ye olugu bɛɛ mina ka o faga. O kɔ, Herodi bɔra Zude ka taga Sezare, ka taga tere dama ke yi.

Herodi sacogo

20 Herodi* tun diminin lo Tiri dugumɔgɔw ni Sidon dugumɔgɔw kɔrɔ kɔsɛbɛ. O kɔsɔn olugu ka ɲɔgɔn ye, ka bɛn kelen ma ka teriya don ni masacɛ ta bon kunnasigibaga ye, min ye Bilatusi ye; o tagara masacɛ fɛ ka taga a daari ko a ye sabari ka kerɛ ban; sabu olugu ta jamana tun bɛ domuni sɔrɔra ka bɔ masacɛ ta jamana le ra.

21 O tun ka lon min sigi o kow ɲanabɔri kama, o lon na Herodi ka a ta masaderege don, ka sigi masasiginan kan, ka kumabaw fɔ jama bɛɛ ɲa na. 22 Jama bɛɛ pɛrɛnna, ko: «Nin ye Ala yɛrɛ kan le ye, mɔgɔ kan tɛ!» 23 O yɔrɔnin kelen bɛɛ ra, Matigi ta mɛlɛke dɔ ka bana bla Herodi ra, sabu a ma bonya la Ala kan; tumu donna a ɲanaman na k'a faga.

24 Ala ta Kuma kɔni tun bɛ tagara ɲa.

25 Barinabasi ni Sɔli ka o ta cira ke ka ban tuma min na, o bɔra Zeruzalɛmu ka kɔsɛgi Antiyɔsi. O tagatɔ, o tagara ni Yuhana ye, min bɛ wele ko Marika.

13

Ala ka Barinabasi ni Sɔli ɲanawoloma

¹ Ciraw ni karamogow tun be Antiyosi lanabagaw ce ra: o tun ye Barinabasi ye, ani Simeyon min togo lara ko Cefin, ani Lusisi min bora Sireni, ani Manaheni min ni jamanatigi Herodi lamona jogon fe, ani Soli. ² Lanabagaw tun be sun don, ka Matigi bato; ka o to o ra, Nin Saninman* k'a fo o ye ko: «Aw ye Barinabasi ni Soli bla ne ye danna, janko ne ka o wele baara min kama, o ye o ke.» ³ Ayiwa, lanabagaw ka sun don, ka Ala daari, ka o boro la Barinabasi ni Soli kan ka soro ka o bla ka taga.

Barinabasi ni Soli ka waajuri ke Sipere

⁴ Nin Saninman* ka Barinabasi ni Soli ci o cogo le ra. O tagara Selesi; o ko, o donna kurun do konso o yoro ra ka taga Sipere. ⁵ O sera Salamisi minke, o ka Ala ta kuma waajuri ke Yahudiyaw ta karansow* konso. Yuhana min be wele ko Marika, ale tun be ni o ye ka o dema.

⁶ O ka Sipere jamana bee cetige ka taga se fo Pafosi. O ka Yahudiyace do ye, min tun be jinamoriya ke, k'a fo ko ale ye Ala ta cira ye; a togo tun ye ko Bari Yesu. ⁷ O ce tun be ni Sipere jamanatigi ye, min ye Seriyusi Polusi ye; Seriyusi Polusi tun ye moggo hakiritigi ye. A ka Barinabasi ni Soli wele, sabu a tun b'a fe ka Ala ta Kuma men o fe. ⁸ Nka o jinamorce min togo tun ye fana ko Elimasi, gerekikan na, ale ka ke Barinabasi ni Soli soso ye; a tun b'a fe ka jamanatigi kunnacen, janko a kana la Ala ta kuma ra. ⁹ O tuma Soli, min be wele fana ko Poli, ale fanin Nin Saninman na, a ka a ja lo jinamorce ra k'a fle kosebe, k'a fo a ye ko: ¹⁰ «Ele min jusukun fara nanbara ni

juguya suguya bæ ra, ele setanamogo, konuman cenbaga, i te Matigi ta sira terenninw yelemari dabra wa? ¹¹ A fe, Matigi bena a boro la i ja kan, i ja bena fiyen. I bena wagati dama ke, i tena tere yeelen ye.»

O yoronin bæ Elimasi ja finna, ka dibi don a ja ra; a ka ke a boro yaalayaala ye, ka mogo jini k'a boro mina ka sira yira a ra.

¹² O ko minw kera, jamanatigi ka o ye minke, a lara Yesu ra; a ka Matigi ta karan min men, o k'a kononban kosebe.

Poli ni Barinabasi ka waajuri ke Antiyosi Pisidi

¹³ O ko fe, Poli ni a tagamajogonw bora Pafosi, ka don kurun do konon ka taga Perizi, Panfili mara ra. Yuhana, min be wele ko Marika, ale bora o ko o yoro ra, ka seko ka taga Zeruzalemu.

¹⁴ Nka Poli ni Barinabasi koni bora Perizi ka taga Antiyosi, min be Pisidi mara ra. Nenekirilon* na, o tagara don karanso konon ka sigi. ¹⁵ O ka sariya kitabu ni ciraw ta kitabu kuma dow karan ka ban minke, karanso* kuntigiw ka mogo ci k'a fo Poli ni Barinabasi ye ko: «Ne balemaw, ni kuma do be aw fe k'a fo jama ye ka o waaju, aw be se ka kuma.»

¹⁶ O tuma Poli wurira ka lo, ka a boro korota, k'a fo mogow ye ko: «Aw Izirayelimogow, ani aw minw be Ala bato, aw ye lamenni ke! ¹⁷ An ta siya Izirayeli* ta Ala le ka an bemaw panawoloma, ka o caya, wagati min o tun be Misiran jamana ra. O ko, a ka o labo o jamana ra ni a ta sebgaya ye. ¹⁸ A tora o fe kongokolon konon ka o deme, ka o ta kow bæ sonmina fo sanji binaani. ¹⁹ O ko, a ka siya wolonfla halaki, ka o siyaw gben

ka bɔ Kanaana* jamana ra, ka o jamana di an bɛmaw ma, ka a kɛ o ta ye, ²⁰ ka se fɔ san kɛmɛ naani ni san bilooru. O bɛɛ kɔ fɛ, a ka kuntigiw sigi Izirayeli kunna fɔ ka na se cira Samawilu ta wagati ma.

²¹ «O kɔ, an ta siya k'a fɔ Ala ye ko a ye masacɛ di olugu ma. Ayiwa, Boniyaminu ta gbamɔgɔ min tɔgɔ ye ko Kisi, Ala ka o dence Sawuli le kɛ o ta masacɛ ye fɔ san binaani. ²² Ayiwa, Ala nana Sawuli bɔ masaya ra wagati min na, a ka Dawuda kɛ o ta masacɛ ye. Ala ka nin seereyakuma fɔ ale ta ko ra, ko: <Ne ka Yese dence Dawuda sɔrɔ, ne diyanyamɔgɔ lo; a bɛna ne sago bɛɛ kɛ ka na.> ²³ Ayiwa, Ala nana Kisibaga* di Izirayeli ma ka bɔ Dawuda ta duruja le ra, i n'a fɔ a tun ka a layiri ta cogo min na; o le ye Yesu ye. ²⁴ Nka sani o Kisibaga ye na, Yuhana tun kumana Izirayelimɔgɔw bɛɛ fɛ ka o waaju, ko o ye nimisa o ta jurumun na ka batize. ²⁵ Tuma min na Yuhana ta baara tun bɛ jini ka se a dan na, a tun b'a fɔra mɔgɔw ye ko: <Aw b'a bisigi ko ne ye jɔntigi le ye? Aw bɛ min makɔnɔna, ne tɛ o ye dɛ! Nka a fɛ, a bɛna na ne kɔ fɛ; ne man kan hali ka a ta sanbara juru foni ka bɔ a sen na.>

²⁶ «Ne balemaw, aw minw kera Iburahima ta durujaw ye, ani aw minw bɛ Ala bato, nin kisiri kuma fɔra anw le ye. ²⁷ Sabu Yahudiya minw bɛ Zeruzalɛmu, olugu ni o kuntigiw m'a faamu ko Yesu le ye Kisibaga ye; ciraw ta kuma min bɛ karan o ye Nɛnɛkirilon* o Nɛnɛkirilon, o ma o fana faamu. Nka o ka kiti tige Yesu kan, k'a to

13:22 13.22 Nin kuma fɔra Samawilu fɔlɔ 8.5,19; 10.21; 13.14; 16.12.

o ciraw ta kumaw kera can ye. ²⁸ O ma jaraki si soro a ra min be se ka ke a fagasababu ye, o beε n'a ta, o ka Pilati daari ko a y'a faga. ²⁹ Ayiwa, o cogo ra, kuma minw tun sebera Kitabu kono Yesu ta ko ra, o kumaw beε kera can ye. O ko, o k'a lajigi ka bo gbengbenyiri ra ka taga a su don kaburu do kono. ³⁰ Nka Ala k'a lakunu ka bo saya ra. ³¹ A kununin ko ka bo saya ra, minw tun kera a blasirabagaw ye ka bo Galile ka na Zeruzalemu, Yesu k'a yere yira olugu ra lon caman na. O mogow le kera a seerew ye, k'a ta kuma fo Izirayelimogow ye. ³² Ala tun ka o Kibaro Diman* min layiri ta an bemaw ye, anw yere nakun ye aw fe yan ka na o le fo aw ye. ³³ Ala ka o layiri dafa anw ye, anw minw ye an bemaw ta durujaw ye; o le koson a ka Yesu lakunu ka bo saya ra, i ko a sebera Zaburu kitabu flanan na cogo min na, ko:

⟨Den min bora ne ra, ele lo;
ne kera i Fa ye bi.⟩

³⁴ Ala ka Yesu kunu minke ka bo saya ra, ko a te sa tuun fiyewu, a tun ka o le yira a ta kuma ra, ko:

⟨Ne ka layiri saninman minw ta Dawuda ye,
layiri janamanw,
sigiya t'a ra, ne bena o fenw di aw ma.⟩

³⁵ O koson a k'a fo kitabu do were ra ko:

⟨I tena son k'a to i ta mogow saninman su ye tori
kaburu kono.⟩

³⁶ Nka Dawuda min ka o kuma fo, ale ka baara ke a ta wagati ra ka ban tuma min na ka kaja

13:33 13.33 Nin kuma fora Zaburu 2.7. **13:34** 13.34 Nin kuma fora Ezayi 55.3. **13:35** 13.35 Nin kuma fora Zaburu 16.10.

ni Ala sago ye, a sara, a su donna ka taga fara a bɛmaw kan, a su torira. ³⁷ Nka Ala ka Yesu min lakunu ka bɔ saya ra, ale kɔni su ma tori. ³⁸ O le kosɔn, ne balemaw, aw ka kan k'a lɔn ko ale le baraka ra an bɛ jurumun yafa waajuri kɛ aw ye. ³⁹ Aw ma se ka kisi ko minw bɛɛ ma cira Musa ta sariya* sababu ra, ni mɔgɔ o mɔgɔ ka la Yesu ra, o tigi bɛ kisi o kow bɛɛ ma. ⁴⁰ O kosɔn aw ye aw yɛɛ kɔrɔsi, janko ciraw ka kuma min fɔ, o kana na ban ka aw sɔrɔ, ko:

⁴¹ <A flɛ, aw minw bɛ Ala ta kow bɛɛ mafiyɛnya, aw ye kɔnɔnɔban, o kɔ, aw ye halaki; sabu ne bɛna ko dɔw kɛ aw ta wagati ra, hali ni mɔgɔ dɔ nana o ko lakari aw ye, aw tɛna la a ra.> »

⁴² Ayiwa, Pɔli ni Barinabasi bɔtɔ karanso kɔnɔ, mɔgɔw ka o daari ko Nenekirilon* nata, o ye na kuma olugu fɛ o ko kelen na. ⁴³ Jama yɛɛɛɛnin kɔ, Yahudiyaw caman, ani Alapasiranbaga minw tun donna Yahudiyaw ta diina ra, olugu tugura Pɔli ni Barinabasi kɔ. Pɔli ni Barinabasi kumana o fɛ ka o ja gbɛleya ko o ye nɔrɔ Ala ta nɛɛma ra ni kan kelen ye.

⁴⁴ O Nenekirilon kunɔgɔn, dugumɔgɔw fanba bɛɛ nana lajɛn ka Matigi ta kuma lamɛn. ⁴⁵ Nka Yahudiyaw ka o jama ye minke, o pangboya ka o sɔrɔ. O ka Pɔli ni Barinabasi ta kuma sɔsɔ, ka o mafiyɛnya. ⁴⁶ Pɔli ni Barinabasi ka o kun gbɛleya k'a fɔ o ye, ko: «Ala ta Kuma tun ka kan ka fɔ aw Yahudiyaw le ye folɔ, nka i n'a fɔ aw banna a ra, k'a jate ko aw man kan ni janamanya banbari

ye, ayiwa, sisan an bena taga siya were mɔgɔw* fe. ⁴⁷ Sabu Matigi ka o le fɔ an ye, ko:
 <Ne Ala ka i sigi ka i ke siya were mɔgɔw ta yeelen ye,
 janko i ye kisiri kuma lase fɔ dunupa fan bɛɛ ra.>

»
⁴⁸ Kabini siya were mɔgɔw ka o kuma men, olugu bɛɛ ninsɔndiyara, ka ke Matigi ta kuma tando ye. Minw bɛɛ tun panawolomara panamanya banbari kama, olugu bɛɛ lara Yesu ra.

⁴⁹ O cogo ra Matigi ta kuma tun be fɔra ka taga jamana yɔrɔ bɛɛ ra. ⁵⁰ Nka Yahudiyaw ka dugu musotɔgɔbatigi Alapasiranbagaw ni dugu mɔgɔbabaw kɔnɔnɔsu. Olugu ka Pɔli ni Barinabasi tɔrɔ ka o gben ka bɔ o ta mara ra. ⁵¹ Nka Pɔli ni Barinabasi bɔtɔ, o ka o sennabuguri yuguyugu* o kan, ka bɔ ka taga Ikoniyoɔmu. ⁵² Antiyɔsi lanabagaw kɔni jusu tun fara jagari ra, ani Nin Saninman* na.

14

Pɔli ni Barinabasi ka waajuri ke Ikoniyoɔmu

¹ Ayiwa, Pɔli ni Barinabasi sera Ikoniyoɔmu tuma min na, o donna Yahudiyaw ta karanso* kɔnɔ. O kumana, fɔ k'a to Yahudiyaw caman, ani siya were mɔgɔw* caman kera lanabagaw ye. ² Nka Yahudiya minw tun t'a fe ka la Yesu ra, olugu tagara lanabagaw tɔgɔjugu fɔ siya were

13:47 13.47 Nin kuma fɔra Ezayi 49.6. * **13:51** 13.51 Ka sennabuguri yuguyugu: Pɔli ni Barinabasi b'a fe k'a yira ko olugu ta foyi te o dugumɔgɔw ta ko ra tuun (Marika 6.11).

mogow ye, ka olugu kononosu lanabagaw kama. ³ O bee n'a ta, Poli ni Barinabasi tora Ikoniyomu ka wagatijan ke. O tun te siran ka kuma Matigi Yesu ta ko ra; Matigi tun be sebagaya di o ma ka kabakow ni tagamasiyenw ke, k'a yira ko o tun be waajuri min kera Ala ta neema ko ra, ko o ye can ye. ⁴ Jama nana taran dugu konu: dow kera ni Yahudiyaw ye, dow kera ni ciradenw* ye.

⁵ Yahudiyaw, ani siya were mogow, ani o ta kuntigiw tun b'a fe ka ben Poli ni Barinabasi kan, ka o bon ni kabakuru ye ka o faga. ⁶ Poli ni Barinabasi nana bo o ko kala ma tuma min na, o borira ka taga Likahoni mara ra, Lisitiri ni Deribe ni o dafeduguw fan na. ⁷ O ka Kibaro Diman* fo o yorow ra.

Poli ni Barinabasi ka waajuri ke Lisitiri

⁸ Ce do tun signin be Lisitiri, o ce tun te se ka lo a sen kan; a nabaraman le tun worora, a ma tagama ka ye. ⁹ O ce tun be Poli ta kuma lamenna. Poli k'a ja lo a ra k'a fe, k'a ye ko lanaya b'a fe, min sababu ra a be se k'a keneya. ¹⁰ Poli k'a fo a ye ni kanba ye, ko: «I wuri ka lo i sen kan!» A panna ka lo a sen kan, ka ke tagama ye. ¹¹ Kabini jama ka o ye, o bee perenna k'a fo Likahonikan na, ko: «E! An ta alaw yelemana ka ke adamadenw ye ka jigi ka na an fe.»

¹² O ka Barinabasi togo la ko Zesi, ka Poli togo la ko Herimesi*, sabu Poli le tun ye kumafobaga ye. ¹³ Zesi ta batoso tun be dugu donda ra. Mogo min tun ye Zesi ta sonnikebaga ye, ale ka misitoran

* **14:12** 14.12 Gerekiw fe, Zesi le tun ye o ta alaw bee kuntigiba ye; Herimesi tun ye o ta alaw ta daramina ye.

taga Ikoniyomu, ka soro ka taga Antiyosi, Pisidi mara ra. ²² O temeto, o ka lanabagaw ja gbeya, ko o ye jija ka to lanaya ra; o tun b'a fora o ye ko: «An ka kan ka sege caman sonmina folo, sani an ye don Ala ta Masaya* ra.»

²³ O ka namogo dow nanawoloma ka o sigi o jenkuruw bee kelen kelen kunna. O ko, o ka sun don ka Ala daari, ka o karifa Matigi ma, o lara Matigi min na.

²⁴ O ko, Poli ni Barinabasi ka Pisidi mara cetige ka taga Panfili mara ra. ²⁵ O ka Ala ta Kuma fo Perizi, ka soro ka taga Atali. ²⁶ O bora yi, ka don kurunba kono ka taga Antiyosi, Siri mara ra. Lanabagaw tun ka Ala daari o ye ka o karifa Ala ta nema koro o dugu le ra; o tun kera baara min kama, o tun ka o baara le dafa.

²⁷ Ayiwa, o sera Antiyosi minke, o ka lanabagaw lajen. Ala ka ko minw bee ke ni olugu ye, ani a ka lanaya sira dayele siya were mogow* ye cogo min na, o ka o bee lakari o ye. ²⁸ Poli ni Barinabasi tora ni lanabagaw ye ka wagatijan ke.

15

Lanabagaw ka mogonyeba ke Zeruzalemu (Galasikaw 2.1-9)

¹ Ayiwa, mogow dow bora Zude ka na Antiyosi, ka na lanabagaw karan, k'a fo o ye ko: «Ni aw ma kenesigi ka kana ni cira Musa ta sariya ye, aw te kisi.» ² Poli ni Barinabasi ma son o kuma ma; o ko kera sosoriba ye o ni o mogow ce. A laban, o k'a latige ko Poli ni Barinabasi ni lanabaga dow

ye taga Zeruzalemu ciradenw ni pamogow fe, ka taga o ko fo k'a yira o ra.

³ Ayiwa, lanabagaw ta jenkuru ka o ci ka taga. O tagato, o temena Fenisi mara ni Samari mara ra. Siya were mogow sonna Ala ta Kuma ma cogo min na, o ka o lakari o yorow ta lanabagaw ye. O kumaw ka o balemaw ninsondiya kosebe.

⁴ Ayiwa, o sera Zeruzalemu minke, lanabagaw ni ciradenw ni cekorobaw ka o kunben. Ala ka ko minw bee ke ni olugu ye, o ka o bee lakari Zeruzalemu lanabagaw ye. ⁵ Nka Farisiw* ta jenkuru mogow minw tun kera lanabagaw ye, olugu dow wurira k'a fo ko siya were* mogow minw lara Yesu ra, ko jagboya lo olugu ye kenesigi, ani k'a fo o ye ko o ka kan ka Musa ta sariya* sira tagama.

⁶ Ayiwa, ciradenw* ni cekorobaw ka jogon lajen ka sigi ka o ko segesege. ⁷ O kuma kera sosorigbelen ye o ni jogon ce; o ko, Piyeri wurira ka lo, k'a fo ko:

«Ne balemaw, aw yere k'a lon ko Ala ka ne panawoloma aw ce ra kabini wagatijan, janko ne ye Kibaro Diman* fo siya were mogow ye, janko o ye Ala ta Kuma men ka la Yesu ra. ⁸ Ala min be mogow bee jusukunnakow lon, ale k'a yira ko a sonna o ma, o le koson a ka Nin Saninman* di o ma, i n'a fo a k'a di an ma cogo min na. ⁹ O b'a yira ko Ala ma faranfasi si ke anw ni olugu ce; a ka o jusukun saninya lanaya sababu ra. ¹⁰ Ni a be ten, mun koson aw b'a fe ka Ala korobo? An bemaw ni anw yerew ma se doni min korow, mun koson aw b'a fe ka o doni la lanabagaw kunna?

¹¹ Anw lanin b'a ra cogo min na ko an kisira

Matigi Yesu ta neema baraka ra, olugu fana ta be ten le.»

¹² Jama bee jera. O ka Barinabasi ni Poli fana lamɛn; Ala ka kabakow ni tagamasiyɛn minw bee ke o fe siya were mɔgɔw ce ra, o ka o lakari jama ye. ¹³ Poli ni Barinabasi kumana ka ban tuma min na, Yakuba ka kuma ta k'a fo ko: «Ne balemaw, aw ye ne lamɛn. ¹⁴ Ala hakiri tora siya were mɔgɔw ra cogo min na, kabini a damina ra, ka daw panawoloma o ce ra ka o ke a yere ta ye, Simɔn ka o bee lakari aw ye ka ban. ¹⁵ Ayiwa, o kuma ni ciraw ta kuma benna kelen ma, sabu a sebera Kitabu kɔnɔ, ko:

¹⁶ <O kow ko fe, ne bena kɔsegi ka na tuun; Dawuda ta bon min benna, ne bena o lo tuun. Ne bena a tomokɔrɔw bee lawuri ka o lateren, ¹⁷ janko mɔgɔ tow bee ye Matigi jini, o kɔrɔ ye ko ne ka siya were mɔgɔ minw bee wele ka ke ne ta ye.

¹⁸ Matigi ka o le fo. Ale le ka o kow yira kabini wagtijan.>

¹⁹ «Ayiwa, o kosɔn ne ta miiriya ra, siya were mɔgɔ minw sonna Ala ta Kuma ma, an man kan ka gbeleya were la olugu kan tuun. ²⁰ Nka an ye sebe ci o ma k'a fo o ye ko began minw fagara jow kan, o kana o sogo domu, o kana jatɔya ke, o kana jufasogo domu walama k'a jori min. ²¹ Sabu kabini wagtijan, duguw bee ra, karansow kɔnɔ, o kow waajuri le be kera ka kapa ni Musa ta sariya* ye Nenekirilon* o Nenekirilon.»

Sebe min cira siya were lanabagaw ma

²² Ayiwa, ciradenw* ni cekorobaw ni lanabagaw ta jenkuru beε benna a ra ko o ka kan ka mogo dow bo o ce ra, ka olugu fara Poli ni Barinabasi kan ka o ci ka taga Antiyosi. Zude min be wele ko Barisabasi, o ka a le janawoloma, ani Silasi; lanabagaw tun be o ce fla jate kosebe.

²³ Ayiwa, o ka o sebe don olugu boro, k'a fo ko:

«An balema lanabaga minw ye siya were mogow* ye, minw be Antiyosi, ani Siri jamana ra, ani Silisi jamana ra, aw balema ciradenw ni lanabagaw ta jenkuru* cekorobaw le ka nin sebe ci aw ma. An be aw fo. ²⁴ Anw k'a men ko mogo dow bora an fe yan ka taga aw hakiri jagami ni kuma dow ye, fo ka hami bla aw ra, k'a soro anw ma o ci. ²⁵ O koson an benna kelen ma k'a latige ko an be mogo dow bo an ce ra ka olugu ci aw fe ni an balemace kanuninw Barinabasi ni Poli ye, ²⁶ olugu ce fla minw ka o nin bla farati ra an Matigi Yesu Kirisita togo koson. ²⁷ Ayiwa, o koson an ka Zude ni Silasi ci; an ka min fo sebe kon, olugu yere da bena o kuma kelen dantige aw ye. ²⁸ Sabu a diyara Nin Saninman* ye, ani anw fana ye ko an man kan ka doni were la aw kan tuun, ni nin fen dama dama te, an be o min gbeleya aw ma. ²⁹ Ayiwa, began minw fagara jow kan, aw kana o sogo domu, ani aw kana jori min, aw kana jufasogo domu; aw ye faran jatoya ra. Ni aw be se ka faran o kow ra, o ka ni. Ka an ben.»

³⁰ Ayiwa, o ka o mogow ci ka taga Antiyosi; o ka lanabagaw beε lajen, ka o sebe di o ma.

³¹ Lanabagaw ka o sebe karan minke, o kumaw ka o ja gbeleya, ka o ninsondiya. ³² Zude ni Silasi fana tun ye ciraw ye; olugu ka ladirikan caman

fɔ lanabagaw ye, ka o ja gbɛɛya, ka o ta lanaya baraka bonya. ³³ O tora ni o ye ka tere dama ke; o kɔ, lanabagaw ka dugawu ke o ye, ka o blasira ka taga o cibagaw fɛ. ³⁴ [Silasi k'a latige ka to Antiyosi.]

³⁵ Pɔli ni Barinabasi tora Antiyosi. O ni mɔgo do werew tun be to ka lanabagaw karan, ka Matigi ta Kibaro Diman* waajuri ke.

Pɔli ni Barinabasi faranna jɔgɔn na
(Galasikaw 4.13-15)

³⁶ Tere dama temenin kɔ, Pɔli ko Barinabasi ma ko: «An temena dugu minw na ka Ala ta Kuma fɔ, a to an ye seko o yɔrow ra ka taga o yɔrow lanabagaw cogoya fɛ.»

³⁷ Ayiwa, o tagato, Barinabasi tun b'a fɛ Yuhana fana ye taga ni o ye, Yuhana min be wele ko Marika. ³⁸ Nka Pɔli ma son o ma fiyewu; a ko, ko kun t'a ra Yuhana ye taga ni o ye tuun, sabu ka o to Panfili mara ra, a bɔra o kɔ, a ma to ni o ye ka baara laban. ³⁹ O ko kera sɔsɔriba ye o ni jɔgɔn ce; a laban o faranna jɔgɔn na. Barinabasi ka Marika ta, o donna kurun do kɔnɔ ka taga Sipere. ⁴⁰ Pɔli ka Silasi ta ka taga; lanabagaw ka Ala daari o ye, ka o karifa Matigi ta neema kɔrɔ. ⁴¹ O ka Siri jamana ni Silisi jamana yaala, ka lanabagaw karan ka o baraka bonya lanaya ra.

16

Timote farara Pɔli ni Silasi kan

¹ Pɔli ni Silasi tagara Deribe, ka bo yi ka taga Lisitiri. O ka lanabaga do soro Lisitiri, min togo tun ye ko Timote; a bamuso tun ye

Yahudiya lanabaga dɔ ye, a face tun ye Gereki ye. ² Lisitiri ni Ikoniyoŋmu ta lanabagaw tun be Timote tɔgɔnuman fɔra. ³ O koson Pɔli tun b'a fe ka Timote ke a baarakeɲɔgɔn ye. O cogo ra a ka Timote kenesigi* Yahudiyaw koson, sabu o beɛ tun k'a lon ko Timote face ye Gereki le ye. ⁴ Ayiwa, o tagatɔ, o temena dugu minw na, ciradenw* ni Zeruzalemu cekɔrobaw ka ko minw latige, o tun be o fɔ lanabagaw ye janko o ye o sira tagama. ⁵ Lanabagaw ta jenkuruw* baraka tun be bonyara lanaya ra; lon o lon dɔ fana tun be fara o kan.

Ala ka Pɔli wele ka taga Masedoni

⁶ Ayiwa, Nin Saninman ma sɔn Pɔli ni a tagamanɔgɔnw ye waajuri ke Azi mara ra minke, o ka Firizi mara ni Galasi mara cetige. ⁷ O surunyanin Misiya mara ra, o k'a latige ko o be don Bitini, nka Yesu ta Nin Saninman ma sɔn o ma. ⁸ O ra, o ka Misiya mara cetige ka jigi ka taga Torohasi. ⁹ O lon su fe Ala ka fen dɔ yira Pɔli ra: a ka Masedonikace dɔ lonin ye, o b'a daarira k'a fɔ a ye ko: «Sabari ka na Masedoni ka na an demɛ.» ¹⁰ Kabini Pɔli ka o ye dɔrɔn, an k'a latige ka taga Masedoni mara ra, sabu an k'a ye ko sigiya t'a ra, Ala le k'a yira an na ko an ye taga Kibaro Diman* fɔ o mɔgɔw ye.

Lidi lara Yesu ra Filipi (Filipikaw 1.1-11,27-30)

¹¹ An donna kurun dɔ konɔ Torohasi, ka teren ka taga Samotirasi. O dugusagbe an tagara

* **16:3** 16.3 Kenesigiri tun te Gerekiw fe; o koson Timote denmisenman tun ma kenesigi.

Nehapolisi. ¹² An bora yi ka taga Filipi, min ye Masedoni mara dugu fɔɔ ye; o yoro be Romu* masaceba ta fanga koro. An ka tere dama ke o dugu koro. ¹³ Nenekirilon* sera minke, an tagara dugu ko fe, koda ra, sabu an tun k'a men ko Alabatoyoro do be yi. An sera yi minke, an ka muso dow lajennin soro yi; an ka Ala ta Kuma fo olugu ye. ¹⁴ Kelen tun be o musow ra, min togo tun ye ko Lidi. Ale tun be bo Tiyatiri. A tun be fani wulenman songogbelenw le fiyeere. Alapasiranbaga tun lo. A tun be an lamenna; Matigi ka a jusukun dayele k'a to a ka Poli ta kuma faamu. ¹⁵ A batizera minke ale ni a ta lukonmogow, a ka an daari k'a fo an ye ko: «Ni aw lara a ra ko ne sonna Matigi ma can ra, o tuma aw ye na don ne ta so koro ka jigi ne fe.» A ka o fo k'a gbeleya kosebe.

Poli ni Silasi blara kaso ra Filipi

¹⁶ Lon do, an tun be tagara Aladaariyoro ra minke, jonsunguru do ka an kunben. Jina do le tun be o sunguru ra, min sababu ra a tun be lagberi ke, ka wari caman soro k'a di a matigicew ma. ¹⁷ O muso tora ka tugu an ni Poli ko, ka to ka peren k'a fo ko: «Nin mogow ye Ala Korotaninba ta baaradenw ye; kisiri be soro sira min na, o be o le fora aw ye.»

¹⁸ A k'a ke ten le lon caman. A laban, Poli nana dimi, ka yelema k'a fo o jina ye ko: «Ne b'a fo i ye Yesu Kirisita togo ra, ko i ye bo muso ra!» O yoronin kelen bee ra, jina bora. ¹⁹ O jonsunguru matigicew k'a ye ko o ta warisorosira cenna minke, o ka Poli ni Silasi mina ka taga

ni o ye kititigebagaw fe jamalajenyɔɔ ra. ²⁰ O tagara ni o ye Romu* kititigebagaw fe, k'a fo o ye ko: «Nin mɔgɔw be an ta dugu jagamina le. Yahudiyaw lo; ²¹ o be mɔgɔw karanna landa dɔw ra, anw Romukaw man kan ka sɔn landa minw ma, an man kan ka a sira tagama fana.»

²² Ayiwa, jama ka o men minke, olugu fana murutira Pɔli ni Silasi kama. Kititigebagaw ko o ye Pɔli ni Silasi ta deregew sama ka bo o kan na, ka o bugɔ ni gbeɲe ye. ²³ O ka o bugɔ kosebe minke, o ka o bla kaso ra, k'a fo kasobon korɔsibaga ye ko a ye o korɔsi kosebe. ²⁴ Kabini kasobon korɔsibaga ka o kuma men, a ka Pɔli ni Silasi bla fo kasobon kɔnɔnɔyɔɔ ra, ka o senw don yiri ra.

Kasobon korɔsibaga lara Yesu ra

²⁵ Ayiwa, su cemance ra, Pɔli ni Silasi tun be Ala daarira ka donkiri la ka Ala tando. Kasoden tow bee tun be o lamenna. ²⁶ Dugukolo barara ka yereyere kosebe fo ka kasobon jusiginanw yuguyugu; o yɔɔnɔn kelen bee kasobon daw bee yelera o yere ma, kasodenw bee ta negejɔɔkɔw tigetigera. ²⁷ Kasobon korɔsibaga kununa ka bo sunɔgɔ ra; a k'a ye ko kasobon daw bee yelera minke, a ka a ta muru sama ka bo ko a b'a yere faga, sabu a tun b'a miiri ko kasodenw bee borira ka bo. ²⁸ Nka Pɔli perenna ni fanga ye, ko: «I kana kojugu ke i yere ra, an bee be yan!»

²⁹ O tuma ra kasobon korɔsibaga ko o ye fitina mana ka na ni a ye; a teliyara ka don kasobon kɔnɔ. A sirankojugu fe, a yereyere to tagara ben Pɔli ni Silasi sen kɔɔ. ³⁰ A ka Pɔli ni Silasi labo

kenε ma ka o jininka ko: «Ne korow, ne ka kan ka mun le ke, janko ka kisi?» ³¹ Pɔli ni Silasi k'a jaabi ko: «La Matigi Yesu ra, i bena kisi, i ni i ta denbaya.»

³² O ko, Pɔli ni Silasi ka Matigi ta kuma fo a ye, ani a ta somogow bee. ³³ O su wagati kelen yere ra kasobon korosibaga tagara Pɔli ni Silasi ta joriw ko. O yorɔnin bee ale ni a ta sokonomogow bee batizera. ³⁴ O ko fe, kasobon korosibaga tagara ni Pɔli ni Silasi ye a ta bon konɔ ka taga domuni di o ma. Ale ni a ta gbamogow bee nagarira kosebe, sabu o lara Ala ra.

Fagamaw ko o be Pɔli ni Silasi labla dogo ra

³⁵ Ayiwa, dugu gbera minke, kititigebagaw ka sorasi dow ci ka taga a fo kasobon korosibaga ye ko a ye Pɔli ni Silasi labla. ³⁶ Kasobon korosibaga ka o kuma fo Pɔli ye ko: «Kititigebagaw ka mogɔ dow ci ka n'a fo ko ne ye aw labla. Aw ye bo ka taga hera ra.» ³⁷ Pɔli k'a fo o sorasiw ye ko: «An minw ye Romu jamanadenw ye, o ka an bugɔ jama bee na na, k'a sorɔ an ta kiti ma tige; o ko, o ka an bla kaso ra. Sisan o b'a fe ka an labla dogo ra wa? O te se ka ke fiyewu, fo olugu yere le ye na ka na an labo.»

³⁸ O sorasiw sekora ka taga o kumaw fo kititigebagaw ye. Olugu k'a men minke ko Pɔli ni Silasi ye jamanaden dow ye, o siranna. ³⁹ O yere nana yafa jini Pɔli ni Silasi fe ka o labla, k'a fo o ye ko o ye sabari ka bo dugu konɔ. ⁴⁰ Pɔli ni Silasi bora kaso ra minke, o tagara Lidi fe. O ka lanabagaw ladi ka o ja gbeleya ka sorɔ ka taga.

17

Pɔli ni Silasi ka waajuri ke Tesaloniki (Tesalonikikaw fɔlɔ 1; 2.1-16)

¹ Ayiwa, Pɔli ni Silasi temena Anfipolisi, ani Apoloni fe, ka taga se Tesaloniki; Yahudiyaw ta karanso do tun be o dugu ra. ² Pɔli donna o karanso kɔnɔ, i n'a fo a tun be deri k'a ke cogo min na; a kumana ni o yɔrɔ mɔgɔw ye kitabuw kɔnɔkumaw kan, fo Nenekirilon saba. ³ Pɔli tun be a fo o ye k'a yira o ra ko min kera Kisibaga* ye, ko o tun ka kan ka tɔrɔ, ka sa, ka kunu ka bo saya ra. A ko: «Ne be Yesu min waajuri kera aw ye, ale le ye Kisibaga* ye.»

⁴ Yahudiya dow k'a ye ko o kuma ye can ye, olugu fana lara Yesu ra ka fara Pɔli ni Silasi kan. Gereki Alanasiranbaga caman fana lara Yesu ra, ani musotogobatigi caman.

⁵ Nka pangboya ka Yahudiyaw sɔrɔ; o ka dugu mɔgɔkunntan dow nege ka olugu lajen, ka o kɔnɔnɔsu, ka mankan wuri ka dugu bee jagami. O ka jɔgɔn ce ka taga Jason ta so kɔnɔ, ko o be taga Pɔli ni Silasi mina ka na ni o ye jama ja kɔrɔ. ⁶ O ma taga Pɔli ni Silasi sɔrɔ yi minke, o ka Jason ni lanabaga dow mina ka olugu sama ka taga ni o ye fagamaw fe. O perenna ko: «Aw y'a fe, mɔgɔ minw ka jamana bee jagami, olugu le sera an fe yan fana. ⁷ Jason le sonna ka o lajigi a ta so kɔnɔ, k'a sɔrɔ o be ko minw kera, o te ben ni masaceba Sezari ta sariyaw ye, sabu o ko masace were be yi, ko o ye Yesu ye.»

⁸ O kumaw ka jama ni fagamaw bæ hakiri jagami. ⁹ Jason ni tow ka wari le sara, fagamaw ka sorɔ ka o bla.

Pɔli ni Silasi ka waajuri kɛ Bere

¹⁰ Ayiwa, lanabagaw ka Pɔli ni Silasi lataga Bere o lon yere su fɛ. O sera yi minke, o tagara don Yahudiyaw ta karanso* kɔnɔ. ¹¹ Bere ta Yahudiyaw kɔnɔ tun ka ji ka tɛmɛ Tesaloniki taw kan pewu. Ala ta Kuma lamenni tun ka di o ye haali. Pɔli ni Silasi tun bɛ fɛn o fɛn fɔ o ye, olugu yere tun bɛ o sɛgɛsɛgɛ lon o lon k'a flɛ ni a bennin lo ni ciraw ta kuma ye. ¹² O Yahudiyaw caman lara Yesu ra; Gɛrɛkiw cɛ ra, musotɔgɔbatigi caman fana lara Yesu ra, ani cɛ caman. ¹³ Nka Tesaloniki Yahudiyaw nana a mɛn minke ko Pɔli ni Silasi bɛ Ala ta Kuma fɔra Bere, o nana Bere dugumɔgɔw fana kɔnɔnɔsu ka o lawuri Pɔli ni Silasi kama. ¹⁴ Lanabagaw k'a ye ten minke, o yɔrɔnin bæ o tagara ni Pɔli ye kɔgɔjida ra ka taga kurunba dɔ ta; Silasi ni Timote tora Bere. ¹⁵ Dɔw ka Pɔli blasira ka taga se fɔ Ateni. Pɔli blasirabagaw sekɔtɔ ka na Bere, Pɔli ka cira fɔ o ye ko o ye taga a fɔ Silasi ni Timote ye ko o ye teliya ka na ale kɔ.

Pɔli kumana Atenikaw fɛ

¹⁶ Ka Pɔli to Ateni, a bɛ Silasi ni Timote makɔnɔna, a k'a kɔrɔsi k'a ye ko Ateni dugu fanin lo jow ra; o ko k'a jusu tɔɔrɔ kɔsɛbɛ. ¹⁷ O kɔsɔn a tun bɛ to ka taga karanso* ra ka taga kuma ni Yahudiyaw ye, ani siya wɛrɛ mɔgɔ* minw bɛ siran Ala ja. Lon o lon a tun bɛ taga jamalajenyɔrɔ ra, ni a ka mɔgɔ minw

sorɔ yi, a bɛ kuma olugu fɛ. ¹⁸ Epikuri* ta mɔgɔw, ani Sitoyiki† ta mɔgɔw ta lɔnnikebaga dɔw nana kuma damina ni Pɔli ye. Dɔw ko: «Cɛ kumacamantigi nin ko di dɛ!» Dɔw fana ko: «A bɛ i n'a fɔ a bɛ batofɛnkura dɔw ta ko le fɔra.» O ka o fɔ, sabu Pɔli tun bɛ Yesu ko waajuri kera, ka suw kunuko fɔ.

¹⁹ O ka Pɔli wele ka taga ni a ye dugu kititigeyɔrɔ ra, yɔrɔ min ye Areyopazi ye, k'a jininka ko: «I nana ni karankura min ye, yala an bɛ se ka dɔ mɛn o ra i fɛ wa? ²⁰ Sabu an bɛ kuma minw mɛnna i fɛ, o bɛɛ ye kumakura le ye an pa na. O kosɔn an b'a fɛ i ye o kow gbɛya an ye.»

²¹ Ateni dugumɔgɔw, ani lonan minw bɛ o cɛ ra, olugu tun bɛ o ta wagati fanba bɛɛ kɛ kokuraw fɔri ni kokuraw lamenni le ra.

²² Pɔli lɔnin tora kititigeyɔrɔ ra k'a fɔ mɔgɔw ye ko: «Aw Atenikaw, ne k'a kɔrɔsi k'a ye ko batofɛnw ko ka bon aw ma cogoya bɛɛ ra kosebɛ.

²³ Sabu ne yaalayaalatɔ aw ta dugu kɔnɔ, ne ka aw ta sɔnnikeyɔrɔw bɛɛ kɔrɔsi; ne ka aw ta sɔnnikeyɔrɔ dɔ yɛɛ ye, a sebera min kan ko: «Mɔgɔ tɛ batofɛn min suguya lɔn, o sɔnyɔrɔ le bɛ nin ye.» Ayiwa, aw bɛ min batora k'a sorɔ aw m'a lɔn, ne yɛɛ nakun ye ka na o le ko fɔ aw ye.

²⁴ Ala min ka dunuɓa ni a kɔnɔfɛnw bɛɛ dan, ale min ye sankolo ni dugukolo Matigi ye, ale tɛ sigi adamaden boro ta batoso lalaganin kɔnɔ.

* **17:18** 17.18 Epikuri ta mɔgɔw: Olugu tun b'a fɛ ka o yɛɛ tanga tɔrɔ ma, ka dunuɓa diyabo. † **17:18** 17.18 Sitoyiki ta mɔgɔw: Olugu ta namɔgɔ tɔgɔ tun ye ko Zeno. Olugu fɛ, adamaden ka kan ka a yɛɛ kɔrɔsi, ani ka tɔrɔ kun a yɛɛ ra.

²⁵ Mɔgɔ boro fana tɛ baara kɛ a ye, k'a kɛ i n'a fɔ a mako b'a ra ko mɔgɔ ye a demɛ; sabu ale yere le bɛ panamanya ni nenekiri ni fen bɛɛ di danfenw bɛɛ ma. ²⁶ A ka siyaw bɛɛ dan ka bɔ mɔgɔ kelen na, ka o sigi dugukolo fan bɛɛ ra, ka o ta wagati dantige, ka o sigiyɔrɔw danw yira o ra. ²⁷ A ka o kɛ janko mɔgɔw ye ale yɔrɔɔini, ka jija k'a mɔmɔ ka a jini fɔ k'a sɔrɔ; o bɛɛ n'a ta, a yɔrɔ man jan an si ra. ²⁸ Sabu <ale le ka an dan, ka an panamanya, k'a to an bɛ se ka lamaga.> Aw ta donkirilabaga dɔw fana ka o le fɔ ko: <An ye Ala ta denw le ye fana.>

²⁹ «Ayiwa, ni an ye Ala denw ye, o tuma an man kan k'a miiri ko Ala bɛ i n'a fɔ batofen tɔw, mɔgɔ yere boro ka o minw lalaga ni sanin ye, walama warigbɛ, walama kabakuru, ka kɔpa ni o yere ta miiriya ye. ³⁰ Ayiwa, Ala tɛ aw ta kolonbariya wagati ta kow jate tuun; nka sisan a b'a fɔ mɔgɔw bɛɛ ye yɔrɔ bɛɛ, ko o ka kan ka nimisa ka o kow dabra. ³¹ Sabu Ala ka lon dɔ sigi, lon min na a bɛna dunɔpa bɛɛ lajennin ta kiti tige terenninya kan, ale yere ta mɔgɔ panawolomani sababu ra; Ala ka ale le lakunu ka bɔ saya ra, janko mɔgɔw bɛɛ ye a lon ka la a ra ko Ala ka ale le panawoloma.»

³² Ayiwa, mɔgɔw nana suw kunuko kuma men Pɔli da ra minke dɔrɔn, dɔw ka kɛ yereko ye a ma, k'a logɔbɔ. Dɔw fana ko: «Lon were an bɛna a tɔ lamɛn i fɛ.» ³³ Pɔli bɔra o cɛ ra ka taga. ³⁴ O bɛɛ n'a ta, mɔgɔ dɔw lara Yesu ra, ka fara Pɔli kan. Dugu kititigejama mɔgɔ kelen tun bɛ o ra, min ye Denisi ye, ani muso dɔ, min tɔgɔ tun ye ko Damarisi, ani mɔgɔ dama dama.

18

*Poli sera Korenti
(Korentikaw folo 1.1-9; 2.1-5; Korentikaw
flanan 11.5-12; 12.12-13)*

¹ O ko, Poli bora Ateni ka taga Korenti. ² A ka Yahudiyace do soro yi, min togo tun ye ko Akila; ale tun worora Pon mara ra. A naninkura tun lo ka bo Itali, ani a muso Pirisili, sabu masaceba Kolodi tun k'a fo ko Yahudiyaw bee ye bo Romu*. Poli ka jehrogonya don ni o ye. ³ I n'a fo o bee tun be baara kelen le ke, Poli tora ni o ye, o ka baara ke jagon fe; o tun be fanibonw le lalaga. ⁴ Nenekirilon* o Nenekirilon, Poli tun be taga karanso* ra ka taga kuma ni Yahudiyaw ni Gerekiw ye, janko ka o ta miiriya yelema, o ye son Matigi ma.

⁵ Nka kabini Silasi ni Timote nana ka bo Masedoni, Poli k'a ta wagati bee ke Ala ta kuma waajuri le ra. A tun b'a fo Yahudiyaw ye k'a gbeya ko Ala ka Yesu le panawoloma k'a ke Kisibaga* ye. ⁶ Nka Yahudiyaw banna Poli ta kuma ma, k'a neni. Poli ka a ta derege yuguyugu o kan, k'a fo o ye ko: «Ni aw halakira, o ye aw yere no le ye, o te ne ta sira ye tuun. Sisan ne be taga siya were mogow* le fe.»

⁷ Poli bora o yoro ra ka taga ce do ta so, min togo tun ye Titusi Yutusi; Alapasiranbaga tun lo. A ta bon tun be karanso* kere fe. ⁸ Ayiwa, karanso kuntigi Kiripusi lara Matigi ra, a ni a ta gbamogow bee. Korentika minw tun ka Poli ta kuma men, olugu caman lara Yesu ra fana; o ka o batize.

⁹ Ayiwa, lon dɔ su fɛ Matigi kumana Pɔli fɛ siko ra, k'a fɔ a ye ko: «I kana siran! Kuma, i kana je, ¹⁰ sabu ne bɛ ni i ye; mɔgɔ si tena i mina ka kojugu kɛ i ra, sabu ne ta mɔgɔw ka ca nin dugu kɔnɔ.»

¹¹ O ra, Pɔli tora Korenti ka mɔgɔw karan Ala ta Kuma ra fɔ san kelen ni karo wɔɔrɔ.

¹² Nka ka Galiyɔn to Akayi jamanatigiya ra, lon dɔ Yahudiyaw benna kelen ma ka wuri Pɔli kama k'a mina ka taga ni a ye kititigeyɔrɔ ra. ¹³ O ko: «Cɛ nin bɛ mɔgɔw hakiri yelemana, ko o ye Ala bato cogo wɛrɛ ra, min ni an ta sariya* tɛ bɛn.»

¹⁴ Ayiwa, sani k'a to Pɔli ye a da yeɛ ko a bɛ kuma dɔrɔn, Galiyɔn ko Yahudiyaw ma ko: «Ni a tun kɛra ko nin cɛ tun ka ko bɛnbari, walama kojuguba dɔ le kɛ, ne tun bɛna sigi ka aw Yahudiyaw ta kuma lamɛn kosebɛ. ¹⁵ Nka i n'a fɔ aw bɛ jɔgɔn sɔsɔra kumaw le kosɔn, ani mɔgɔtɔgɔw, ani aw ta sariyaw ta kow, o tuma aw yerɛ le ka kan ka o ko janabɔ. Ne tɛ sɔn ka nin ko jɔgɔn kiti tigɛ.» ¹⁶ Galiyɔn ka o labɔ kititigeyɔrɔ ra. ¹⁷ Kabini o kɛra, o bɛɛ ka Sɔsiteni mina, min ye karanso kuntigi ye, ka ale bugɔ bɛrɛbɛrɛ kititigeyɔrɔ ja fɛ; Galiyɔn k'a kɛ i n'a fɔ ale yerɛ ma o ye.

Pɔli sekɔra ka taga Antiyɔsi

¹⁸ Pɔli tora Korenti ka wogatijan kɛ belɛn. O kɔ, a ka sira daari lanabagaw fɛ; ale ni Pirisili ni Akila donna kurun kɔnɔ ka taga Siri jamana fan fɛ. Nka Pɔli tun ka dajuru ta Ala fɛ; o ra, a k'a kun li Sankere, o ka sɔrɔ ka taga. ¹⁹ O tagara se Efesi minke, Pɔli ka a tagamajɔgɔnw to o yɔrɔ

ra. Ale yere tagara karanso* ra, ka taga kuma ni Yahudiyaw ye. ²⁰ Olugu ka a daari ko a ye to ni o ye ka wagati dama ke; nka Poli ma son. ²¹ A ka sira jini o fe k'a fo o ye ko ni Ala sonna, ale bena seko ka na o fe tuun. O ko, a bora Efesi ka don kurun konon ka taga.

²² O tagara se Sezare minke, a bora ka taga Zeruzalemu ka taga lanabagaw fo; o ko, a tagara Antiyosi. ²³ A tora Antiyosi ka wagati dama ke yi. O ko, a tagara Galasi mara ra, ka bo yi ka taga Firizi mara ra, ka lanabagaw karan, ka o baraka bonya lanaya ra.

Apolosi ka waajuri ke Efesi ani Korenti

²⁴ O wagati ra Yahudiyace do nana Efesi, min togo tun ye ko Apolosi; a tun bora Alesandiri. O ce tun be se kuma ra kosebe; a fana tun be kitabu kumaw lon kosebe. ²⁵ A tun karanna Matigi Yesu ta sira ko ra. A tun be jija ka Yesu ko fo mogow ye ka o karan ka ja ni a jusukun bee ye, nka a ta lonniya tun danna Yuhana Batizerikebaga ta karan doron le ma. ²⁶ A tun be kuma karanso* konon mogow bee ja na. Pisisili ni Akila ka a ta karan lamem minke, olugu k'a wele ka taga Matigi Yesu ta ko lalaga k'a fo a ye.

²⁷ Ayiwa, Apolosi tun b'a fe ka taga Akayi mara ra. Lanabagaw ka a ja gbeleya ko a ye taga; o ka sebe do ke k'a ci Akayi lanabagaw ma, ko o ye a minako ja. A sera yi minke, mogow minw lara Yesu ra Ala ta neema baraka ra, a ka olugu dema kosebe; ²⁸ sabu a tun be Yahudiyaw ta firiyow yira o ra mogow bee ja na; a tun b'a yira o ra

k'a gbeya, ko ka kapa ni kitabuw ta kuma ye, Ala ka Yesu le panawoloma ka a ke Kisibaga* ye.

19

Poli ka waajuri ke Efesi

¹ Ayiwa, ka Apolosi to Korenti, Poli ka Azi mara kuruyorow cetige ka taga se Efesi. A ka lanabaga dow sorow yi. ² Poli ka o lanabagaw jininka ko: «Yala aw lara Yesu ra wagati min na, aw ka Nin Saninman* sorow wa?» O ka Poli jaabi ko: «An yere m'a men ban ko Nin Saninman be yi.» ³ Poli ka o jininka tuun ko: «O tuma aw batizera batizeri* juman le ra?» O ka Poli jaabi ko: «Yuhana ta batizeri.» ⁴ Poli k'a fo o ye ko: «Yuhana ka mogow batize k'a yira ko o nimisara o ta jurumunw na; nka a tun b'a fo o ye ko min bena na ale ko fe, o ka kan ka la o ra; o ye Yesu le ye.»

⁵ O mogow ka o kuma men tuma min na, o ka sorow ka batize Matigi Yesu togow ra. ⁶ O ko, Poli ka a boro la o kan minke, Nin Saninman jigira o kan; o ka ke kuma ye kan werew ra; Ala ka kuma don o da ra ka mogow waaju. ⁷ O bee tun be mogow tan ni fla jogon bo.

⁸ Poli tun be to ka taga karanso* ra ka taga Ala ta Masaya* Kibaro Diman* fo mogow ye k'a gbeya. A tun be cogo bee ke janko ka mogow ta miiriya yelema ka son Matigi ta kuma ma; a ka o ke ka se fo karo saba. ⁹ Nka o mogow dow ka o kun gbeleya, ka ban Poli ta kuma ma, ka to ka Matigi ta sira ko mafiyenya jama na korow. O ra, Poli ka lanabagaw wele ka bo o korow, ka taga ni

o ye Tiranusi ta karanso ra, ka to ka o karan o yoro ra lon o lon.

¹⁰ Poli ka o ke fo san fla. O koson mogow minw bee tun be Azi mara ra, Yahudiyaw ni siya were mogow, olugu bee ka Matigi ta kuma men. ¹¹ Ala tun be kabakoba caman kera Poli sababu ra. ¹² Hali fani, walama fanikunkurun minw tun magara Poli fari ra, o tun be o la banabagatow kan; banabagatow tun be keneya, jinatow ta jinaw fana tun be bo o ra.

Seva dencaw ta ko

¹³ Ayiwa, Yahudiya dow tun be yaalayaala, ko o be jinaw gben ka bo mogow ra; olugu nana a fo ko o be jinaw gben ka bo mogow ra ni Yesu togo ye. O tun b'a fora ko: «Ne b'a fo aw ye ko aw ye bo Yesu togo ra, Poli be Yesu min ko waajuri kera!» ¹⁴ Yahudiyaw ta sarakalasebagaw* kuntigi min togo tun ye ko Seva, o dence wolonfla le tun be o baara kera. ¹⁵ Lon do, jina do ka o jaabi ko: «Ne ka Yesu lon, ne k'a lon fana Poli ye mogow min ye. Nka aw ye jontigiw le ye?»

¹⁶ O jina tun be ce min na, o ce benna o kan. Ale kelen fanga gbiriya o bee ta ma. A ka o bugo fo ka o mandimi; o fari lakolon le borira ka bo bon kon. ¹⁷ O ko kibaroya sera Efesi dugumogow bee ma, Yahudiya ni siya were mogow bee; siranya ka o bee mina, mogow fana ka Matigi Yesu togo bonya. ¹⁸ O koson minw tun lara Yesu ra, olugu caman nana lo o ta kewalejuguw ra, ka o fo kene kan. ¹⁹ Minw tun be subagaya ke, olugu fana caman nana ni o ta sebaw ye ka na o jeni mogow bee na na. O ka o sebaw songo jate mina k'a ye ko

a benna warigbe waga bilooru le ma. ²⁰ O cogo ra, Matigi ta sebgaya baraka ra, Ala ta Kuma waajuri tun be tagara na ni baraka ye.

Mankanba wurira Efesi

²¹ O kow bee ko fe, Poli k'a latige Nin Saninman* baraka ra, ko a be teme Masedoni jamana ni Akayi jamana ra ka taga Zeruzalemu. A tun b'a fora fana ko: «Ni ne sera yi, ne na ka kan ka taga la Romu* fana kan.» ²² A ka a ta baarakepogon fla bla a na ka taga Masedoni, minw ye Timote ni Eratusi ye. Ale yere tora Azi mara ra ka wagati dama ke belen.

²³ Ayiwa, o wagati ra mankanba do wurira Matigi ta sira ko ra. ²⁴ Saninfagabaga do tun be yi, o togo tun ye ko Demetirisi; ale tun be Efesikaw ta jo musoman Aritemisi ta jobon bisigiyaw le lalaga ni warigbe ye, ka o fiyeere. Ale ni a ta baaradenw tun be wari caman soro o sababu ra. ²⁵ Ayiwa, o ce ka a ta baaradenw ni saninfagabaga werew lajen, k'a fo o ye ko: «Ne teriw, aw k'a lon ko an be an ta baro sorora nin baara le ra. ²⁶ Nka nin Poli be min kera, aw yere be o yera, aw fana b'a menna; Efesi dugu doron te, nka a be jini ka ke Azi mara bee ta ko le ye. A ka mogo caman le hakiri yelema, ka o kunnacen, k'a fo o ye ko mogo boro be batofen minw lalaga, ko o te batofen ye. ²⁷ Ayiwa, nin ko be se ka ke sababu ye ka an ta baara cen, nka o doron te; an ta jomusoba Aritemisi ta jobon ta ko le bena ke ko gbansan ye. Ni o kera, Azi mara ni dununa to bee be jo musoman min batora, o ta bonya bee bena bo a kan.»

²⁸ O kumaw fɔra minke, a lamenbagaw dimina; o ka ke peren ye ko: «Efesikaw ta jo musoman Aritemisi le ka bon!»

²⁹ O mankan ka dugu bee jagami; Poli tagamanogon fla minw tun ye Gayusi ni Sitariki ye, minw tun ye Masedonikaw ye, o bee girinna olugu kan ka o mina ka taga ni o ye jamalajenyoro ra. ³⁰ Poli yere fana tun b'a fe ka taga jama ko, nka lanabagaw ma son. ³¹ Azi mara mogoba dow fana tun be yi, olugu tun ye Poli teriw ye. Olugu fana ka mogoo dow ci Poli fe, k'a daari ko a kana taga jamalajenyoro ra.

³² O wagati ra mankan cayara jamalajenyoro ra. Dow tun be min fo, o ni tow ta tun te kelen ye. Jama fanba tun ma o lajenkun yere lon.

³³ Mogoo ka o kow lakari ce do ye, min togo tun ye ko Alesandiri. Yahudiyaw ka ale noni ka taga jama na fe ko a ye kuma. Alesandiri ka a boro korota ko a be kuma jama fe. ³⁴ Nka o k'a ye ko Yahudiya lo minke, o bee jenna ka ke peren ye ko: «Efesikaw ta jo musoman Aritemisi le ka bon!» O tora o ra ka wagatijan ke.

³⁵ Dugu seberikebaga le nana jija ka jama mala; a k'a fo o ye ko: «Efesikaw, jontigi le m'a lon ko Efesi dugu le ye jomusoba Aritemisi ta jobon korosibaga ye, ani jo musoman yere ja min bora san fe ka ben? ³⁶ Mogoo si te se ka o kow soso. O ra, aw ka kan ka aw jusu suma, aw kana foyi ke aw yere kun fe! ³⁷ Sabu aw bagara nin ce fla ma ka o mina ka na ni o ye, k'a soro o ma foyi sonya jobon konoo, o fana ma kumajugu fo an ta jomusoba ma. ³⁸ Ayiwa, ni Demetirisi ni a ta baarakepogonw b'a fe ka mogoo do jaraki ko

dɔ ra, o tuma kititigelonw bɛ yi, fagamaw fana bɛ yi; o ye na ni a ko ye olugu fɛ. ³⁹ Walama ni ko wɛrɛ lɛ bɛ aw fɛ, aw bɛ sɛ ka na o ko yira an ta nɔgɔnyelon na. ⁴⁰ Ni o tɛ, an ka mankanba min lawuri bi, o bɛ sɛ ka an jaraki o ra ko an b'a fɛ ka jama lamuruti; sabu ni o ka an jininka, an tena sɛ ka jama lajenkun fɔ mɔgɔ ye.»

⁴¹ Ayiwa, dugu seberikebaga ka o kuma fɔ, ka jama labla.

20

Pɔli ka tagama min kɛ Masedoni ni Gɛrɛsi (Kɔrentikaw fɔlɔ 16.1-7; Rɔmukaw 15.25-27)

¹ Ayiwa, mankan nana mala tuma min na, Pɔli ka lanabagaw wele ka o lajen. A kumana o fɛ ka o ladi, ka o ja gbɛleya, ka sɔrɔ ka sira jini o fɛ ko o bɛ taga Masedoni. ² Pɔli tɛmɛtɔ o yɔrɔw ra, a ka lanabagaw ja gbɛleya ni ladirikan caman ye, ka sɔrɔ ka taga Gɛrɛsi jamana ra. ³ A ka karo saba kɛ yi. A nana labɛn ko a bɛ kurunba dɔ ta ka taga Siri jamana ra; nka a nana a mɛn ko Yahudiya dɔw ka janfa siri a kama o yɔrɔ ra yi minke, a k'a latigɛ ka seko ka na Masedoni. ⁴ Mɔgɔ minw tun bɛ Pɔli blasirara, olugu flɛ nin ye: Pirusi dence Sopateri, ale tun bɔra Bere; Sitariki ni Sekundusi, olugu tun bɔra Tesaloniki; Gayusi, min tun bɔra Deribɛ; Timote ni Tisiki ni Torofime, olugu tun bɔra Azi mara ra. ⁵ Olugu blara an ja ka taga an kɔnɔ Torohasi. ⁶ Burufunubari janagbɛ* tɛmɛnin kɔ, an donna kurunba dɔ kɔnɔ Filipi; an ka tere looru kɛ tagama ra, ka taga o sɔrɔ Torohasi. An ka lɔgɔkun kɛn kɛ yi.

Pōli ta tagamalaban ka taga Torohasi

⁷ Lōgokun tere fōlō, an tun lajenna ka Matigi ta domuni ke jōgōn fe. Pōli tun b'a fe ka taga o lon dugusagbe; a kumana lanabagaw fe ka mēen fō ka taga se su cēmance wagati ma. ⁸ An tun lajenna sankaso min kōnō, fitina caman tun mananin lo o bon kōnō. ⁹ Kanbelen dō tun be ni an ye, min tōgō tun ye ko Etiyusi; ale tun siginin be bon finetiri dakun kan. Ale tora o yōrō ra ka sunōgō fō ka jina a yere kō. Pōli kumana k'a mēen minke, sunōgō nana a magaya. A bōra fō sankaso bon sabanan kunna ka na ben dugu ma. O nana a ta k'a ye ko a sara. ¹⁰ Pōli jigira ka taga biri a kunna, k'a mina a boro fla ma, k'a fō an ye ko: «Aw hakiri kana jagami, a nin sekōra a ma.»

¹¹ O kō, Pōli yelenna; a ni lanabagaw ka Matigi ta domuni ke jōgōn fe. O kō, Pōli kumana o fe tuun fō ka na teresun bō, ka sōrō ka taga. ¹² Etiyusi ta mōgōw k'a mina ka taga ni a ye so kōnō, a panaman. O ko ka lanabagaw jusu suma.

Pōli bōra Torohasi ka taga Mile

¹³ Ayiwa, anw donna kurun kōnō ka bla Pōli ja ka taga se Asōsi. An tun ka kan ka taga Pōli ta kurun kōnō o yōrō le ra, sabu ale yere tun k'a latige ko a be taga Asōsi a sen na. ¹⁴ A tagara an sōrō Asōsi wagati min na, an k'a ladon an fe kurun kōnō ka taga Mitileni. ¹⁵ An bōra o yōrō ra lon min na, an nana se Kiyōsi kere fe o lon dugusagbe. O dugusagbe flanan an sera Samōsi. O dugusagbe sabanan an sera Mile. ¹⁶ Pōli tun b'a fe ka teme Efesi kere fe; a tun t'a fe ka lo yi

tuun, janko a kana na μεεν ka τεμε Azi mara ra. A tun korotora ka se Zeruzalemu, janko ni a be se ka ke, a ye taga Pantekoti* lon kunben yi.

Poli ka Efesi lanabagaw ta cekorobaw ladi

¹⁷ Poli tora Mile ka cira bla ka taga Efesi lanabagaw ta jenkuru cekorobaw wele ka na.

¹⁸ O nana minke, a k'a fo o ye ko: «Kabini lon folo min na ne ka ne sen bla Azi mara ra, ne tun be tagama cogo min na aw ce ra wagati bee, aw yere ka o lon. ¹⁹ Ne ka ne yere majigi wagati bee ka baara ke Matigi ye, ka tɔɔɔ fo ka naji bo; Yahudiyaw fana ka janfa siri ne kama wagati caman, ka sege caman lase ne ma. ²⁰ O bee n'a ta, aw ta nafa be fen o fen na, ne ma o si dogo aw ma; ne ka aw karan jamayorow ra, ka aw karan aw yere ta sow konɔ, ²¹ k'a fo mogow bee ye k'a gbeleya, Yahudiya fara siya were mogɔ* kan, ko o ye nimisa o ta jurumunw na ka son Ala ma, ka la an Matigi Yesu ra.

²² «Ayiwa, sisan a fle, Nin Saninman be ne jagboya ka taga Zeruzalemu; nka min bena taga ne sorɔ yi, ne te o lon. ²³ Ne be teme dugu o dugu ra, Nin Saninman yere b'a yira ne ra ko kasorabla ni tɔɔɔw be ne ja. ²⁴ Nka ne te ne ta saya, walama ne panaman jate fenba ye. Min ka gbelen ne ma, o ye ko ne ye ne ta tagama ke ka se a dan ma, ani Matigi Yesu ka baara min karifa ne ma, ne ye o ke ka dafa, ka Ala ta neema Kibarɔ Diman* ko fo mogow ye.

²⁵ «Ayiwa, ka a ta bi ra, ne ka Ala ta Masaya* waajuri ke aw min o min ce ra yan, ne k'a lon ko aw si ja tena la ne kan tuun. ²⁶ O koson ne b'a

fɔ aw ye k'a gbɛɛya bi, ko aw ra ni min firira, o ye o tigi yere nɔ le ye. ²⁷ Sabu Ala sago ye min ye aw ta kisiri ko ra, ne ka o bɛɛ fɔ aw ye, ne ma foyi dogo aw ra.

²⁸ «Ayiwa, aw ye aw yere kɔrɔsi; Nin Saninman ka aw bla sagakuru min kunna, aw ye o fana kɔrɔsi ka ja; aw ye aw janto Ala ta jenkuru ra, a ka min kunmabɔ ni a yere jori ye. ²⁹ Ne yere k'a lɔn ko ni ne tagara, mɔgɔlafiribaga dɔw bɛna don aw cɛ ra i ko warajuguw bɛ don sagaw cɛ ra cogo min na; o tɛna sagaw to. ³⁰ Mɔgɔ dɔw bɛna wuri hali aw yerew cɛ ra yan ni faninyakuma dɔw ye, ka lanabagaw lafiri, ka o tugu o yere kɔ. ³¹ O ra, aw ye aw yere cogoya lɔn; aw ye aw hakiri to a ra ko ne ka san saba kɛ aw cɛ ra, ka aw bɛɛ kelen kelen ladi su ni tere, fɔ ka naji bɔ aw kosɔn.

³² «Ayiwa, sisan ne bɛ aw karifa Ala ma, ani a ta nɛɛma kuma ma. Ale le bɛ se ka aw baraka bonya lanaya ra; a ka fɛn min layiri ta aw ye, a bɛna o di aw ma, ani a ta mɔgɔ janawolomaninw bɛɛ.

³³ «Ne ma nabɔ mɔgɔ si ta wari fɛ, walama mɔgɔ ta sanin, walama mɔgɔ ta faniw. ³⁴ Aw yere k'a lɔn ko ne yere boro le ka baara kɛ ka ne ni ne tagamanɔgɔnw bɛɛ mako ja.

³⁵ «Ne k'a yira aw ra cogo bɛɛ ra ko an ka kan ka baara kɛ ten le, ka dɛɛɛbagatow demɛ, ani ka an hakiri jigi Matigi Yesu ta kuma ra, ko: <Dugawu bɛ sɔnni le ra ka tɛmɛ sɔrɔri kan.> »

³⁶ Ayiwa, Pɔli ka o kuma fɔ ka ban minke, a ka a kinbiri gban ka Ala daari ni lanabagaw bɛɛ ye.

³⁷ Lanabagaw bɛɛ kasira kɔɛɛɛ Pɔli tagako ra; o

ka a fo ni kanuyafori ye. ³⁸ Pɔli tun k'a fo minke ko o si ja tena la ale kan tuun, o kuma le tun ka o jusu kasi kosebe. O ko, o tagara Pɔli blasira kurunda ra.

21

Pɔli tagacogo Zeruzalemu

¹ Ayiwa, an ni lanabagaw nana faran jɔgɔn na tuma min na, an donna kurun kɔnɔ, ka teren ka taga Kɔsi. O dugusagbe an sera Rodi, ka bo yi ka taga Patara. ² An ka kurunba do soro yi, o tun be tagara Fenisi mara ra; an donna o kɔnɔ ka taga. ³ An surunyara Sipere jamana ra; an tun be o jamana yera, nka an k'a to an numanboroyanfan fe ka taga Siri jamana fan fe. Kurunba tagara lo Tiri, sabu doni minw tun be kurun kɔnɔ, o tun ka kan ka jigi o dugu le ra.

⁴ An ka lanabaga dow soro Tiri; an ka tere wolonfla ke ni olugu ye. Tɔɔro minw tun bena Pɔli soro Zeruzalemu, Nin Saninman tun ka o yira o lanabagaw ra, o koson o k'a fo Pɔli ye ko a kana taga Zeruzalemu. ⁵ An tun ka kan ka tereda minw ke, o dafara minke, an ka sira mina; lanabagaw bee bora, o ni o ta musow ni o ta denw, ka taga an blasira, ka bo ni an ye fo dugu kɔnɔ. An bee ka an kinbiri gban jida ra yi, ka Ala daari. ⁶ O ko, an ka fori di jɔgɔn ma minke, an donna kurun kɔnɔ; olugu sekora ka taga o ta so.

⁷ An bora Tiri ka taga Pitolemasi; o kera an ta tagama dan ye. An tagara o yoro lanabagaw fo, ka tere kelen ke ni o ye. ⁸ O dugusagbe an tagamana ka taga Sezare. An tagara Kibaro

Diman fobaga Filipe ta so konɔ; lanabagaw tun ka ce wolonfla minw janawoloma Zeruzalemu, ale tun ye o ra kelen ye. An jigira ale ta so. ⁹ Denmuso sunguru naani tun be Filipe fe, Ala tun be kuma don olugu da ra ka mogow waaju. ¹⁰ An ka tere dama ke Filipe ta so; lon do, cira do nana ka bo Zude; o togo tun ye ko Agabusi. ¹¹ O ce nana an fe, ka na Poli ta kurusijara ta ka a yere senw ni a borow siri ni o ye, k'a fo ko: «Nin Saninman ko: <Nin kurusijara ye mogow min ta ye, Yahudiyaw bena o tigi mina Zeruzalemu k'a siri nin cogo le ra, ka a don siya were mogow* boro.> »

¹² Kabini an ka o kuma men, an ni o yoro lanabagaw bee ka ke Poli daari ye ko a ye sabari a kana taga Zeruzalemu. ¹³ Poli ko: «Aw kana kasi ten, ka ne jusu kasi. A kana dan kasorabla dama ma, hali ni ne ka kan ka sa Zeruzalemu, Matigi Yesu togo koson, ne sonna o ma.»

¹⁴ An k'a ye ko Poli t'a fe k'a ta miiriya bo Zeruzalemu taga kan minke, an jera. An ko: «Min ye Matigi sago ye, o ye ke.»

¹⁵ An ka o wagati ke Sezare minke, an ka an yere laben ka taga Zeruzalemu. ¹⁶ Sezare lanabaga dow tagara an blasira. O tagara ni an ye ce do ta so, min togo ye ko Minason. Ale be bo Sipere; lanabaga lo kabini wagatijan. An tun ka kan ka jigi o ce ta so.

Poli tagara Yakuba fe Zeruzalemu

¹⁷ An sera Zeruzalemu minke, lanabagaw ka an kunben ni ninsondiya ye. ¹⁸ O lon dugusagbe Poli tagara ni an ye Yakuba fe; lanabagaw ta

cekorobaw bee nana fana. ¹⁹ Poli ka mogow fo ka ban tuma min na, Ala ka ko o ko ke siya were mogow* ce ra a ta waajuri baraka ra, a donna o bee ra ka o jafɔ o ye kelen kelen. ²⁰ O mogow ka o men minke, o ka Ala tando. O ko, o ko Poli ma ko: «An balemace, i m'a ye, Yahudiya waga caman le lara Yesu ra yan, nka hali bi o bee cesirinin be cira Musa ta sariya* ko ra. ²¹ Ayiwa, mogɔ dow nana a fo o ye ko Yahudiya minw be siya were mogow ce ra, ko ele le k'a fo olugu ye ko o ye cira Musa ta sariyaw* bla, ko o kana o ta denw kenɛsigi tuun, ko o kana landaw si ke fana. ²² Ayiwa, an bena nin ko mina cogo di? Sigiya t'a ra, o bena a men ko i nana. ²³ O ra, an bena min fo i ye, i ka kan ka o le ke. Ayiwa, ce naani be an fe yan, olugu tun ka dajuru ta Ala fe. ²⁴ I be don ni o ye Alabatosoba konɔ, ka i yere saninya ni o ye ka kana ni sariya ye. I yere ye o bee ta kunlisara bo janko o ye o kun li. Ni o kera, Yahudiyaw bena a lon ko mogow ka ko o ko fo i ta ko ra, ko o si te can ye. O bena a ye fana ko ele yere be tagamana sariya kan. ²⁵ Nka siya were mogɔ minw lara Yesu ra, an ka sebe ci olugu ma ka an ta miiriya yira o ra; an k'a fo o ye ko sogo o sogo fagara jow kan, o kana o domu, o kana a jori min, o kana jufasogo domu, o kana jatɔya ke.»

²⁶ Ayiwa, Poli farara o ce naani kan. O dugusagbe, a ka a yere saninya ni o ye. O ko, o tagara don Alabatosoba lu konɔ jɔgon fe, Poli ka o ta saninyarilonw dafawagati yira, o korɔ ye lon min o bee kelen kelen ta saraka ka kan ka bo.

Mogow ka Poli mina Alabatosoba konɔ

²⁷ Tere wolonfla tun bena dafa wagati min na, Azi mara Yahudiyaw ka Poli ye Alabatosoba konɔ. O ka jama bee kononɔsu; o ka Poli mina, ²⁸ ka ke peren ye ko: «Izirayelimogow, aw ye na o, aw ye na! Ce min be yaala ka mogow bee karan yoro bee, ka an ta siya mangboya, ka an ta sariyaw mangboya, ani ka yoro saninman mangboya, ale le ye nin ye. Sisan a yere ka siya were mogow* dow ladon Alabatosoba konɔ, ka an ta yoro saninman lanogow.»

²⁹ O ka o fo, sabu o tun ka Efesikace Torofime ni Poli ye jagon fe dugu konɔ. A kera o ja na ko Poli donna ni a ye Alabatosoba konɔ le.

³⁰ A kera ten, dugu bee jagamina. Mogow tun borira ka bo dugu fan bee ra ka na. O ka Poli mina k'a sama ka bo Alabatosoba konɔ, ka Alabatosoba daw datugu. ³¹ I n'a fo o tun b'a fe ka Poli faga, o kuma sera sorasiw kuntigiba ma, ko Zeruzalemu dugu bee jagaminin lo. ³² O yoronin kelen bee sorasiw kuntigiba ka sorasi dow ta, ani sorasikuntigi dow; o borira ka don dugu konɔ. Yahudiyaw ka sorasiw kuntigiba ni a ta sorasiw ye minke, o ka Poli bugori dabra. ³³ Sorasiw kuntigiba nana Poli mina. A k'a fo sorasiw ye ko o ye Poli siri ni negejoroko fla ye. Poli sirinin ko, a ka jininkari ke ko Poli ye jon ye, ko a ka mun le ke? ³⁴ Jama bee tun be perenna, nka dow tun be min fo, o ni tow ta tun te kelen ye. Sorasiw kuntigiba nana a ye ko a te kuma kelen sorora k'a men mankan bonyakojugu fe minke, a k'a fo sorasiw ye ko o ye taga ni Poli ye bonba konɔ. ³⁵ Poli tagara se donda yelenyoro

ma minke, sorasiw ka Poli ta, jama ta fariya koson; ³⁶ sabu jamaba tun tugura a ko, o bee be perenna ko: «Aw y'a faga!»

Poli kumana jama fe

(Kewalew 9.1-19; 26.9-20; Galasikaw 1.11-16; Timote folo 1.12-17)

³⁷ Poli donto bonba konɔ, a ko sorasiw kuntigiba ma ko: «Yala ne be se ka kuma i fe wa?» Sorasiw kuntigiba ko: «I be gerekikan men wa?

³⁸ O tuma Misirankace min murutira yan, ni a wagati ma men, fo a tagara ni mogɔ waga naani ye kongo konɔ mogɔfaga kama, ele le te o ye wa!»

³⁹ Poli ka jaabi ko: «Ne ye Yahudiya le ye, ne bora Tarisi, Silisi jamana ra. Ne ye dugu min mogɔ ye, o dugu ka bon. Sabari k'a to ne ye kuma jama fe.»

⁴⁰ Sorasiw kuntigiba sonna ko Poli ye kuma. Poli lonin tora bon donda yelenyoro kan ka a boro korota mogow fe ko a b'a fe ka kuma o fe. Mogow bee jera; Poli kumana o fe aramekan na; a ko:

22

¹ «Ne balemaw, ani ne faw, ne bena kuma min fo sisan k'a yira aw ra ko ne ma kojugu si ke, aw ye o lamen!»

² Mogow k'a ye ko a be kumana o fe aramekan na minke, o bee jera, ka mankan bee dabra. Poli ko:

³ «Ne ye Yahudiya le ye, ne worora Tarisi, Silisi jamana ra. Nka ne lamona Zeruzalemu yan. Ne ta karamogofa tun ye Gamaliyeli ye; ale le ka ne karan ka ja, ka kapa ni an bemaw ta sariya* kow

bɛɛ ye. Ne fana tun cɛsirinɪn lo Ala ko ra kosebɛ, i n'a fɔ aw bɛ cogo min na bi. ⁴ Mɔgɔ minw bɛ nin sira kan, ne ka olugu tɔɔɔ fɔ ka dɔw faga, ka o siri ka o bla kaso ra, cɛ fara muso kan. ⁵ Sarakalasebagaw kuntigiba*, ani cɛkɔɔɔbaw ta jamɔgɔw ta jɛnkuru ye ne seerew ye o kow ra. Ne yɛɛ tun ka sɛbɛ sɔɔɔ o fɛ ka taga a di Damasi Yahudiyaw ma, janko ni ne tagara lanabaga dɔw sɔɔɔ o yɔɔɔ ra, ne ye olugu mina ka o siri ka na ni o ye Zeruzalemu, janko ka o tɔɔɔ.

⁶ «Ayiwa, ka ne tagatɔ to sira ra, ne surunyara Damasi ra minke, teregbɛn fɛ, yeelenba dɔ barara ka bɔ sankolo ra ka manamana ka ne lamini. ⁷ Ne benna dugu ma; ne ka kumakan dɔ mɛn, ko: <Soli, Soli, mun kosɔn i bɛ ne tɔɔɔɔra?> ⁸ Ne k'a jɪninka ko: <Ele ye jɔn ye, Matigi?> A ko ne ma ko: <Ne ye Yesu Nazaretikacɛ le ye; i bɛ ne le tɔɔɔɔra.> ⁹ Ayiwa, mɔgɔ minw tun bɛ ni ne ye, olugu ka yeelenba ye, nka min tun bɛ kumana ne fɛ, o ma o tigi kan mɛn. ¹⁰ Ne ka jɪninkari ke, ko: <Ne ka kan ka mun le ke, Matigi?> Matigi ko ne ma ko: <Wuri ka taga Damasi; Ala b'a fɛ i ye min ke, o bɛna taga o fɔ i ye.> ¹¹ I n'a fɔ yeelen bonyakojugu kosɔn ne tun tɛ foyi yera tuun, mɔgɔ minw tun bɛ ni ne ye, olugu ka ne boro mina ka taga ni ne ye Damasi.

¹² «O y'a sɔɔɔ cɛ dɔ tun bɛ Damasi, a tɔgɔ ye ko Ananiyasi. Alapasiranbaga tun lo, ani sariya siratagamabaga; Damasi Yahudiyaw bɛɛ tun bɛ a tɔgɔɔuman fɔ. ¹³ A nana ne fɛ ka na lo ne kɔɔɔ k'a fɔ ne ye ko: <Ne balemacɛ Soli, i ja yeɛ ka fleri ke.> O yɔɔɔnɪn kelen bɛɛ, ne ja yelera, ne k'a ye. ¹⁴ A k'a fɔ ne ye ko: <An bɛmaw ta

Ala ka i janawoloma, janko i ye a sago lon. Min kelenpe terennin be, a k'a to i ye o ye, ani ka a yere kumakan men. ¹⁵ Sabu i ka min ye, ani i ka min men, i bena ke a seere ye mogow bee ja korɔ, ka o bee fo o ye. ¹⁶ Ayiwa, sisan i kana sigi ka fen were makono tuun. Wuri ka batize k'a to i ta jurumunw ye yafa i ma Matigi Yesu togo baraka ra*.>

¹⁷ «O ko, ne sekora ka na Zeruzalemu minke, lon do, ka ne to Aladaari ra Alabatosoba kono, Ala ka fen do yira ne ra. ¹⁸ Ne ka Matigi ye, a k'a fo ne ye ko: <I teliya ka bo Zeruzalemu dugu kono, sabu i bena kuma min fo ne ta ko ra, mogɔ si tena son o ma yan.> ¹⁹ Ne ko: <Matigi, ne tun be donna karansow* kono cogo min na ka lanabagaw mina ka o bugɔ ka o bla kaso ra, o yere ka o lon. ²⁰ Hali o tun be i ta seere Etiyeni fagara wagati min na, ne yere tun be o yoro ra. Ne tun sonna Etiyeni fagari ma; ne ka a fagabagaw ta deregew mina o ye.> ²¹ Nka Matigi ko: <Taga, sabu ne bena i ci ka taga yorojan, siya were mogow* le fe.> »

Poli ko ale ye Romu jamanaden ye

²² Ayiwa, jama bee tun jera ka Poli lamen fo ka na se nin kumaw ma. Nka kabini Poli ka nin kumaw fo minke, jama ka ke peren ye ko: «Nin mogɔ suguya ka kan ka faga ka bo dunupa kono, a panaman man kan ka to!»

²³ O tun be perenna, ka o ta deregew bo ka o fifafifa, ka buguri ce ka o seri san fe ka gbangban lawuri. ²⁴ Sorasiw kuntigiba k'a fo sorasiw ye ko

* **22:16** 22.16 Poli k'a ta seereya fo (Kewalew 9.1-16; 26.12-18).

o ye don ni Pɔli ye bonba kɔnɔ, ka a bugɔ ni gbɛɛ ye, k'a jagboya ka kuma. A ka ko min ke k'a to mɔgɔw bɛ pɛrɛnna a kunna, a ye o fɔ. ²⁵ Wagati min o ka Pɔli siri ko o b'a bugɔ, sorasikuntigi min tun bɛ Pɔli kɛrɛ fɛ, Pɔli ko o ma ko: «Ka kaɲa ni sariya ye, yala a bennin lo ko aw ye Rɔmu jamanaden dɔ bugɔ ni gbɛɛ ye k'a sɔrɔ kiti ma ben a kan wa?» ²⁶ Sorasikuntigi ka o mɛn minke, a tagara o fɔ sorasiw kuntigiba ye, ko: «Ele tun b'a fɛ ka mun le ke tan? Cɛ nin ye Rɔmu jamanaden le ye dɛ!» ²⁷ Sorasiw kuntigiba yɛrɛ tagara Pɔli pininka ko: «Yala can lo ko ele ye Rɔmuka le ye wa?» Pɔli ko: «Ōnhɔn.» ²⁸ Sorasiw kuntigiba ko: «Ne ka wariba le sara ka sɔrɔ ka ke Rɔmuka ye dɛ!» Pɔli ko: «Ne worora a ra le!» ²⁹ O yɔrɔnin bɛɛ ra minw tun b'a fɛ ka Pɔli bugɔ k'a jagboya ka kuma, olugu bɔra a kɔrɔ. Sorasiw kuntigiba yɛrɛ siranna, sabu ale le k'a to o ka Pɔli siri, k'a sɔrɔ Rɔmuka lo.

Pɔli bɛ kuma kititigejama mɔgɔw fɛ

³⁰ Ayiwa, Pɔli jarakikun yɛrɛ tun ye fɛn min ye Yahudiyaw fɛ, sorasiw kuntigiba tun b'a fɛ ka o lon. O le koson o lon dugusagbɛ, a ka nɛgɛjɔrɔkɔ bɔ Pɔli ra, ka sarakalasebagaw* kuntigiw ni kititigejama bɛɛ wele ka o lajɛn. O kɔ, o tagara ni Pɔli ye ka taga a lo o cɛ ma.

23

¹ Pɔli ka a na lo kititigejama ra k'a fɔ ko: «Ne balemaw, fɔ ka na se bi ma, ne ka ne tagamacogo ke ka kaɲa ni Ala sago ye; ne jusukun tɛ ne jaraki o ra.» ² Pɔli ka o fɔ minke, sarakalasebagaw

kuntigiba* Ananiyasi k'a fɔ Pɔli kerɛfɛmɔɔ dɔw ye ko o ye Pɔli bugɔ a da ra. ³ Pɔli ko a ma ko: «Ele flankafu, Ala fana bɛna i bugɔ. Ele siginin bɛ yan ka kiti tige ka kaɲa ni sariya* ye, nka i ko o ye ne bugɔ, k'a sɔrɔ sariya ma o fɔ.» ⁴ Mɔɔ minw tun bɛ Pɔli kerɛ fɛ, olugu ko Pɔli ma ko: «I bɛ Ala ta sarakalasebagaw kuntigiba le nɛnina kɛ!» ⁵ Pɔli ka o jaabi ko: «Ne balemaw, ne m'a lɔn ko sarakalasebagaw kuntigiba lo. Sabu a sebera Kitabu kɔnɔ, ko: <I kana kumajugu fɔ i ta jamana ɲamɔɔ dɔ ma.> »

⁶ Ayiwa, Pɔli tun k'a lɔn ko kititigejama mɔɔ dɔw tun ye Sadusiw* ye, dɔw tun ye Farisiw* ye. O kosɔn, a pɛrɛnna kititigejama cɛ ma, k'a fɔ ko: «Ne balemaw, ne ye Farisi yɛrɛworo le ye. Ne lanin b'a ra ko suw bɛna kunu lahara minke, o le kosɔn kiti bɛ tigera ne kan bi.»

⁷ Kabini Pɔli ka o fɔ, sɔsɔri donna Farisiw ni Sadusiw cɛ; jama kan taranna. ⁸ Sabu Sadusiw ko, ko suw tena kunu lahara, ko mɛlɛkɛ tɛ yi, ko nin wɛrɛw si tɛ yi fana; k'a sɔrɔ Farisiw lanin bɛ o kow bɛɛ ra. ⁹ Mankan bonyara kosebɛ; Farisiw ta jɛnkuru sariya karamɔɔ* dɔw wurira ka muruti k'a fɔ jama ye ko: «An kɔni ma kojugu si sɔrɔ nin cɛ ra. A bɛ se ka kɛ ko nin dɔ, walama mɛlɛkɛ dɔ le kumana a fɛ.»

¹⁰ Sɔsɔri nana bonya ka taga a fɛ; sorasiw kuntigiba nana siran ko o kana na ban ka Pɔli samasama fɔ k'a faga. O kosɔn, a ka sorasi dɔw ci ko o ye jigi ka taga Pɔli bɔsi o boro ka taga ni a ye sorasiw ta bonba kɔnɔ.

11 O lon dugusagbe su fe, Matigi ka a yere yira Pɔli ra k'a fo a ye ko: «I ja gbɛleya; i ka seereya bo ne ta ko ra Zeruzalemu yan cogo min na, i ka kan ka ne ta ko seereya ke Romu* o cogo kelen na fana.»

Yahudiyaw ka janfa siri Pɔli kama

12 O dugusagbe sogomada fe, Yahudiya dow ka janfa siri Pɔli kama. O karira jogon ye ko olugu tena domuni ke, o tena ji min, fo ni o ka Pɔli faga. 13 Yahudiya minw tun ka o janfa siri, o tun ka ca ni mogɔ binaani ye. 14 O mogow tagara sarakalasebagaw* kuntigiw ni cekorobaw fe, ka taga a fo o ye ko: «An k'a latige ka kari jogon ye ko an si tena domuni ke, walama ka ji min, fo ni an ka Pɔli faga. 15 O koson, aw ni kititigejama mogɔ tow beɛ, aw ye ben a ra ka taga sorasiw kuntigiba daari ko a ye Pɔli di aw ma k'a ke i n'a fo aw b'a fe ka a ta kɔna segesege le ka ja. An kɔni labennin lo k'a kɔno sira ra k'a faga sani a ye se aw ma yan.»

16 Nka Pɔli balemamuso dence ka o janfa ko men. Ale borira ka taga bonba kɔno ka taga o fo Pɔli ye. 17 O tuma, Pɔli ka sorasikuntigi do wele k'a fo a ye ko: «Taga ni kanbelennin nin ye sorasiw kuntigiba fe; kuma do b'a fe k'a fo a ye.»

18 O sorasikuntigi tagara ni kanbelennin nin ye sorasiw kuntigiba fe ka taga a fo a ye ko: «Kasoden Pɔli le ka ne wele k'a fo ne ye ko ne ye na ni kanbelennin nin ye i fe, ko kuma b'a fe k'a fo i ye.» 19 Sorasiw kuntigiba ka kanbelennin mina a boro ma ka gbara ni a ye kere fe ka a jininka ko: «Mun le be i fe k'a fo ne ye?»

²⁰ Kanbelennin k'a fɔ a ye ko: «Yahudiyaw le benna a ra ko o bɛna i daari sini, ko i ye Pɔli bla ka taga kititigejama fɛ. O ko o b'a fɛ ka a ta kɔpa sɛgɛsɛgɛ le ka ja tuun. ²¹ Nka i kana la o ra! Sabu o ta mɔgɔ dɔw bɛna dogo sira ra ka Pɔli kɔnɔ. O ka ca ni mɔgɔ binaani ye. O k'a latige ka kari Ala ra ko o tena domuni kɛ, o tena ji min fɔ ni o ka Pɔli faga. O labennin lo ka ban. O bɛ ele ta kuma le makɔnɔna.»

²² Sorasiw kuntigiba k'a fɔ kanbelennin ye k'a gbɛleya ko a kana a to mɔgɔ wɛrɛw ye o kuma mɛn. Kanbelennin bɔra ka taga.

Sorasiw kuntigiba ka Pɔli lataga jamanatigi Felisi fɛ

²³ O kɔ, sorasiw kuntigiba ka sorasikuntigi fla wele k'a fɔ o ye ko: «Aw ye sorasice kɛmɛ fla fara jɔgɔn kan, ani sotigi biwolonfla, ani cɛ tamantigi kɛmɛ fla. O bɛɛ ye labɛn; ni su kora, o bɛ taga Sezare. ²⁴ Aw ye so dɔ labɛn Pɔli ye fana, janko a ye se jamanatigi Felisi fɛ yi, foyi kana a sɔrɔ.»

²⁵ A ka sɛbɛ kɛ k'a ci Felisi ma, ko: ²⁶ «Ne Kolodi Lisiyasi bɛ nin sɛbɛ ci jamanatigijuman Felisi ma; ne ta fori bɛ i ye. ²⁷ Yahudiyaw tun ka nin cɛ mina, o tun bɛ jini k'a faga. Wagati min na ne k'a mɛn ko Rɔmuka lo, ne ka ne ta sorasi dɔw ci ka taga a bɔsi o boro. ²⁸ A tun ka ko kelen min kɛ k'a to Yahudiyaw b'a jarakira, ne tun b'a fɛ ka o lɔn. O kosɔn ne tagara ni a ye o ta kititigejama fɛ. ²⁹ Nka ne nana a kɔrɔsi k'a ye ko o bɛ a jarakira kun min na, o ye olugu yɛrɛ ta sariyaw* ko le ye; ni o tɛ, a tun ma kojugu si kɛ min ka kan ni fagari ye walama kasorabla.

³⁰ O kɔ fɛ o ka ne lasɔmi minke ko Yahudiyaw ka janfa siri a kama, o yɔronin bɛɛ, ne k'a bla ka taga i fɛ, k'a fɔ Yahudiyaw ye ko o b'a jarakira kun min na, ko o ye taga o fɔ ele yere ye. [Ka an bɛn.]»

³¹ Min fɔra sorasiw ye, o ka o ke; o ka Pɔli ta o su fɛ ka taga se fɔ Antipatirisi. ³² O dugusagbe, sorasi minw tun bɛ o sen na, olugu sekɔra ka na o ta bonba kɔnɔ. Minw tun bɛ so kan, olugu tagara ni Pɔli ye. ³³ O sera Sezare minke, o ka sɛbɛ di jamanatigi ma, ka Pɔli yira a ra. ³⁴ Jamanatigi ka sɛbɛ karan ka ban minke, a ka Pɔli jininka ko: «I bɔra mara juman le ra?» Pɔli k'a fɔ a ye ko ale bɔra Silisi. ³⁵ A ko Pɔli ma ko: «Ni i jarakibagaw nana se yan tuma min na, ne bɛna i lamɛn.» A ko o ye Pɔli bla Herodi* ta bonba kɔnɔ k'a kɔrɔsi.

24

Yahudiyaw ka Pɔli jaraki Felisi ja kɔrɔ

¹ Ayiwa, tere looru temenin kɔ, sarakalasebagaw kuntigiba* Ananiyasi nana Sezare, ale ni cɛkɔrɔba dɔw, ani cɛ kumalɔnɔbagaba dɔ, min tɔgɔ ye ko Terituli. Ko min donna o ni Pɔli cɛ, a nana o ja fɔ jamanatigi Felisi ye. ² O ka Pɔli wele ka na. Terituli k'a damina ka Pɔli jaraki; a ko: «Jamanatigijuman, an bɛ heraba min na jamana kɔnɔ bi, ele le baraka ra an ka o hera sɔrɔ. Ele ta hakiritigiyaba le kosɔn fana, yelemanin caman kɛra jamana kɔnɔ, ka jamana lataga ja fɛ. ³ An bɛɛ bɛ i walejumanlɔn o kow bɛɛ ra wagati bɛɛ, ani yɔrɔ bɛɛ, jamanatigijuman Felisi. ⁴ Nka i n'a fɔ ne t'a

fε ka i lasigi ka mεεn, o koson ne bε i daari i ye sabari ka an lamεn dōonin.

⁵ «Ayiwa, an k'a ye ko nin cε ye cεnrikebaga le ye, min ka kerε lawuri dunuƚa Yahudiyaw bεε cε ra; ale le ye Nazaretikaw ta diina ƚamogō ye.

⁶ A tun bε ƚini ka an ta Alabatosoba yerε lanogō, o le koson an k'a mina. [An tun b'a fε k'a ta kiti tige ka kaƚa ni an ta sariya* ye; ⁷ nka sorasiw kuntigiba Lisiyasi nana a bōsi an boro fanga ra, ⁸ ko an ye na a ƚarakikun fō ele yerε ye.] Ni i yerε ka a ƚininka ka ƚa, an b'a ƚarakira ko minw na, i bεna o lōn.»

⁹ Yahudiya tōw fana lōra o kuma kelen kan, ko Terituli ka min fō, ko o ye can ye.

Pōli kumana jamanatigi ƚa kōrō

¹⁰ Ayiwa, jamanatigi k'a fō Pōli ye ko a ye a ta fō. Pōli ka kuma ta k'a fō jamanatigi ye ko: «Ne k'a lōn ko ele bε an ta siya ta kiti tigeria kabini san caman. O le koson ne tε siran ka kuma k'a yira i ra ko ne ma kojugu si kε. ¹¹ Ne nana Zeruzalemu ka na Ala bato, a ma tεmε tere tan ni fla kan fōlō. Ni i ka o ko segeεge, i bεna a ye ko can lo. ¹² O wagatiw bεε kōnō, o ma ne ye sōsori ra ni mōgō si ye, walama ko ne bε jama lamuruti ra Alabatosoba kōnō, walama karanso* dō kōnō, walama dugu kōnō yōrō dō ra. ¹³ Nin mōgōw tε se ka foyi si fō k'a yira ko o bε ne ƚarakira kun min na ko o ye can ye.

¹⁴ «Ayiwa, ne kōni bε lō min na k'a fō i ƚa na, o ye ko, ne bε an bεmaw ta Ala le batora ka kaƚa ni nin sira ye, olugu ko o min tε can ye. Nka fεn o fεn sebera sariya* kitabuƚ ni ciraw ta kitabuƚ kōnō, ne lara o bεε ra. ¹⁵ Ne ƚigi bε Ala kan ko

min na, olugu fana jigi be a kan o ko kelen le ra, ko mɔgɔɔɓumanw ni mɔgɔɔjuguw bee su bena kunu lahara. ¹⁶ O le kosɔn ne be jija, janko ne jusukun gbenin ye to, ne jarakibari ye ke Ala ja kɔrɔ, ani mɔgɔw ja kɔrɔ.

¹⁷ «Ayiwa, san caman temenin kɔ, ne nana Zeruzalemu ka na ne ta siyamɔgɔ dɔw deme ni wari ye, ani ka sarakaw bo Ala ye. ¹⁸ O nana ne sɔrɔ o kopaw le ra Alabatosoba kɔnɔ; ne tun saninyanin lo, jama tun te yi, sɔsɔri tun te yi. Azi mara Yahudiya dɔw le tun be ni ne ye. ¹⁹ Ni a kera ko ne tun ka kojugu do le ke, olugu le tun ka kan ka ke yan ka ne jaraki i ja kɔrɔ. ²⁰ Ni o te, wagati min na ne ta kiti tun be tigera kititigejama ja kɔrɔ, ni a kera ko ne ka kojugu do ke yi, mɔgɔ minw be yan, olugu ye o fo i ye. ²¹ Ka ne lonin to o ja fe, ne kumana ni kanba ye, ka nin kuma kelen le fo ko: <Ne lanin b'a ra ko suw bena kunu ka bo saya ra lahara, o le ka ne bla kiti ra aw ja fe bi.> »

²² Ayiwa, i n'a fo Felisi tun ka lanaya ko faamu, a ka kiti bla lon were ra, k'a fo o ye ko: «Aw ye taga; ni sorasiw kuntigiba Lisiyasi nana na, ne bena aw ta kɔɓa janabo.» ²³ O kɔ, a ko sorasikuntigi do ma ko a ye Poli to kaso ra, k'a kɔrɔsi, nka a y'a to a ye laganfiyayɔrɔ sɔrɔ; ni a teri dɔw b'a fe ka na bo a ye ka fen do di a ma, a ye sɔn o ma.

Poli kumana jamanatigi ni a muso ja kɔrɔ

²⁴ Tere dama temenin kɔ, jamanatigi Felisi nana ni a muso ye, min ye Durusili ye; o muso tun ye Yahudiya ye. O ka mɔgɔ ci ka taga Poli wele ka na. Mɔgɔ be la Yesu Kirisita ra cogo min

na, Pōli ka o jafō o ye. ²⁵ Nka Pōli kumana ka se terenninya ma tuma min na, ani mōgō ka kan ka a yeɛ mina jurumun ma cogo min na, ani lahara ta kiti, Felisi siranna; a ko Pōli ma ko: «Taga fōlō; ni ne nana wagati sōrō, ne bēna i wele tuun.» ²⁶ A tun b'a hakiri ra fana ko Pōli bēna wari le di ale ma, o kosōn a tun bē to ka Pōli wele ka na kuma a fē tuma caman.

²⁷ O ka san fla kē o ra ten. Pōrisusi Fētusi nana sigi jamanatigiya ra Felisi nō ra. Felisi tun b'a fē ka a yeɛ ko diya Yahudiyaw ye, o kosōn a ka Pōli to kaso ra yi.

25

Pōli ko a ta kiti bē tige masaceba le fē

¹ Fētusi sigira jamanatigiya ra Zude mara ra minke, a tere sabanan, a bōra Sezare ka taga Zeruzalēmu. ² A sera yi minke, sarakalase-bagaw* kuntigiw, ani Yahudiyaw ta jamōgōw tagara a fē ka taga Pōli jaraki. ³ O ka Fētusi daari ko a ye sabari ka Pōli bla ka na Zeruzalēmu; nka o tun ka janfa le siri Pōli kama janko ka na a nato faga sira ra. ⁴ Fētusi ka o jaabi ko Pōli bēna to kaso ra Sezare, ko sani wagati dōnin ale yeɛ bēna sekō ka taga yi. ⁵ A ko o ma ko: «Aw ta kuntigiw ka kan ka taga ni ne ye Sezare; ni o sera yi, aw bē Pōli jarkira kun min na, o yeɛ bēna o fō.»

⁶ Fētusi ma tēmē tere seegi walama tere tan kan Zeruzalēmu. O kō, a sekōra ka taga Sezare. O dugusagbē a tagara sigi kititigeyōrō ra, ka mōgō dō ci ko o ye na ni Pōli ye. ⁷ Pōli nana minke, Yahudiya minw tun nana ka bō Zeruzalēmu,

olugu lora ka Pɔli lamini k'a jaraki ni kojugu caman ye, k'a sɔrɔ o tun tɛ se ka o kow si can yira. ⁸ O kɔ, Pɔli ka kuma ta; a ko: «Ne ma kojugu si kɛ Yahudiyaw ta sariya* kama, walama Alabatosoba kama, walama masaceba Sezari kama.» ⁹ I n'a fɔ Fɛtusi tun b'a fɛ ka a yere ko diya Yahudiyaw ye, o kosɔn a ka Pɔli jininka ko: «I b'a fɛ ka taga Zeruzalɛmu, janko i ta kiti ye taga tige ne na kɔrɔ o yɔrɔ ra nin ko ra wa?» ¹⁰ Pɔli ko: «Ne lɔnin bɛ masaceba Sezari yere ta kititigeɣɔrɔ ra ka ban. Ne ta kiti ka kan ka tige yan le. Ne ma foyi kɛ Yahudiyaw ra; ele yere ka o lɔn kosebɛ. ¹¹ Ni a tun kɛra ko jo tɛ ne fɛ, walama ko ne ka ko dɔ kɛ min ka kan ni fagari ye, ne tun tɛna ban fagari ma. Nka o bɛ fɛn o fɛn fɔra ne kama, i n'a fɔ can tɛ o si ra, o tuma mɔgɔ si tɛ se ka ne labla o ye. Ne b'a fɛ ne ta kiti ye taga tige masaceba Sezari le na kɔrɔ.»

¹² Ayiwa, Fɛtusi ni a jɛnɔgɔnɔw ka ɔgɔn ye wagati min na ka ban, a ka Pɔli jaabi ko: «I ko i ta kiti bɛ tige masaceba Sezari le na kɔrɔ, ayiwa, i bɛna taga masaceba Sezari fɛ.»

O nana ni Pɔli ye Agiripa na kɔrɔ

¹³ Tere dama tɛmenin kɔ, masace Agiripa ni Bɛrɛnisi nana Sezare, ka na Fɛtusi fo. ¹⁴ Ayiwa, o ka tere caman kɛ Sezare. Fɛtusi nana Pɔli ta kopaw yira masace ra. A ko: «Fɛlisi ka cɛ dɔ to kaso ra yan. ¹⁵ Wagati min na ne tagara Zeruzalɛmu, sarakalasebagaw* kuntigiw, ani Yahudiya ta cɛkɔrɔbaw ka o cɛ jaraki, ka ne daari ko ne ye kiti ben a kan. ¹⁶ Ne ka o jaabi ko Rɔmukaw fɛ, fagama man kan ka mɔgɔ labla

ko a ye faga, ni o tigi ni a jarakibagaw ma jɔgɔn ye kititigebaga ja kɔrɔ, janko a fana ye kuma k'a ta fɔ a jarakibagaw ja kɔrɔ. ¹⁷ Ayiwa, o mɔgɔw nana ni ne ye yan, ne fana ma a ko bla ka mɛɛn; o dugusagbɛ yɛɛ, ne tagara kititigeyɔrɔ ra, ka mɔgɔ ci ka taga cɛ wele ka na. ¹⁸ O cɛ jarakibagaw wurira ka lɔ ka kuma. Nka ne tun bɛ kojugu minw miirira a ta ko ra, a jarakikun ma taga kɛ o si ye. ¹⁹ O tun bɛ jɔgɔn sɔsɔra o yɛɛw ta sariya* ta kow le ra, ani Yesu tɔgɔ dɔ, o min tun sara, nka Pɔli ko a janaman lo. ²⁰ Ne tun ma a lon ne bɛna a kɛ cogo min na ka nin ko jɔgɔn janabɔ. O le kosɔn ne ka Pɔli jininka ni a bɛ sɔn ka taga Zeruzalɛmu, a ta kiti ye taga tige o yɔrɔ ra. ²¹ Nka Pɔli k'a jini ko masacɛba Sezari yɛɛ le ye ale ta ko janabɔ. O ra ne k'a fɔ ko o y'a mara sani ne ye na a bla ka taga masacɛba Sezari fɛ.» ²² Agiripa ko Fɛtusi ma ko: «Ne yɛɛ b'a fɛ ka o cɛ lamɛn.» Fɛtusi ko: «Sini i bɛna a lamɛn.»

²³ Ayiwa, o dugusagbɛ, masacɛ Agiripa ni Bɛrɛnisi mɔgɔbaraman le nana don kititigeyɔrɔ ra, ani sorasiw kuntigibaw, ani dugu jamɔgɔw. O kɔ, Fɛtusi ko o ye na ni Pɔli ye. ²⁴ O tuma Fɛtusi ko: «Masacɛ Agiripa, ani aw minw bɛɛ bɛ ni an ye yan, aw ka nin cɛ ye; Yahudiyaw ta jama bɛɛ nana ne fɛ ka na ale le jaraki Zeruzalɛmu, ani yan, ka pɛrɛn ko a janaman man kan ka to. ²⁵ Ne kɔni fɛ a ma kojugu si kɛ min bɛ se ka kɛ a fagasababu ye. I n'a fɔ ale yɛɛ ko a ta kiti ka kan ka tige masacɛba le fɛ, o ra ne k'a latige k'a bla ka taga masacɛba fɛ. ²⁶ Nka ne ma kuma gbɛnin si sɔrɔ a ta ko ra, ne bɛ

se ka min seɓe k'a ci masaceɓa Sezari ma; o le koson ne k'a wele ka na aw ja korɔ, ele yere masace Agiripa ja korɔ, janko ni a pininkara, ne ye fen do sorɔ k'a seɓe k'a ci masaceɓa Sezari ma. ²⁷ Sabu ka kasoden bla ka taga masaceɓa Sezari fe, k'a sorɔ jarakikun si ma sorɔ a ta ko ra k'a fo, o ye hakirintanya le ye.»

26

Poli kumana masace Agiripa ja korɔ (Kewalew 9.1-30; 22.1-21)

¹ Ayiwa, Agiripa ko Poli ma ko:

«Min be i fe, o fo.» O tuma, Poli ka a boro korɔta, ka kuma, k'a ta fo; a ko: ² «Masace Agiripa, a diyara ne ye ka ne yere sorɔ ele ja korɔ bi, ka a yira i ra ko Yahudiyaw be ne jarkira ko minw bee ra, ko o si te can ye. ³ Sabu ele yere be Yahudiyaw ta landaw ani o ta sosoriw bee lon kosebe. O koson, ne be i daari ko i ye mupu ka ne lamɛn.

⁴ «Ayiwa, kabini ne denmisenman, ne tagamacogo tun ye min ye ne ta siyamogow ce ra Zeruzalemu, Yahudiyaw bee ka o lon. ⁵ Ni o b'a fe ka can fo koni, o ka ne lon kabini wagatijan; ne tun be Farisiw* ta jen le ra, o min ye an ta diina siraw bee ra gbelenman ye. ⁶ Nka sisan, Ala tun ka layiri min ta an bemaw ye, ne jigi be o kan minke, o le ka ne bla kiti ra bi. ⁷ An ta siya gba tan ni fla jigi tun be o layiri kan. O koson o tun be Ala bato su ni tere. O jigi min be ne fe, masace Agiripa, Yahudiyaw be ne jarkira o le koson! ⁸ Aw Yahudiyaw, mun koson aw b'a miiri ko Ala te se ka suw lakunu wa?

9 «Ne fana tun b'a miirira ko can ra ne tun ka kan ka Yesu Nazaretikace tɔgɔ kere le kosebe. 10 Ne ka o le ke Zeruzalemu; ne tun ka fanga sɔrɔ sarakalasebagaw* kuntigiw fe, ka lanabaga caman mina ka o bla kaso ra. Ni o tun be lanabagaw fagara fana, ne tun be fara o fagabagaw kan. 11 Wagati caman ne tun be o tɔrɔ karansow* bee kɔnɔ, ka o jagboya ko o ye ban lanaya ma. Ne dimikojugu o kɔrɔ, ne tun be taga fɔ dugu werew ra ka taga lanabagaw tɔrɔ yi.

12 «O cogo le ra, lon dɔ, sarakalasebagaw kuntigiw ka ne ci ni sebe dɔ ye ka taga Damasi lanabagaw kama. 13 Ka ne tagatɔ to Damasi, masace Agiripa, tuma min na tere tun be kuncɛ, ne barara ka yeelenba dɔ ye, a bɔra sankolo ra, ka manamanana ka ne ni ne tagamanɔgɔnw lamini. O yeelen tun ka bon ni tere yeelen ye. 14 An bee bɔra ka ben dugu ma; ne ka kumakan dɔ men, a ko ne ma Aramekan na ko: <Soli, Soli, mun kosɔn i be ne tɔrɔra? Ni senekemisi ka muruti ko a be bere tan, o te ja misi ma de!> 15 Ne k'a jaabi ko: <Ele ye jɔn ye, Matigi?> Matigi ko: <Ne ye Yesu le ye, i be min tɔrɔra. 16 Wuri ka lo sisan, sabu ne ka ne yere yira i ra, janko i ye ke ne ta baarden ye. I ka ne ye cogo min na bi, i bena o seereya ke ka o fɔ dɔ werew ye, ani ne bena ko minw yira i ra, i bena o bee fɔ o ye fana. 17 Ne bena i ci Yahudiyaw ni siya were mɔgɔ* minw fe, olugu bena tɔrɔ minw la i kan, ne bena i bɔsi o bee ma. 18 Ne be i ci o fe, janko i ye taga o ja yeɛ, ka o labɔ dibi ra ka o lana yeelen na, ka o labɔ Setana ta fanga kɔrɔ k'a

to o ye sɔn Ala ma, janko o ye la ne ra ka o ta jurumunw yafa sɔrɔ, ani ka o ninyɔrɔ sɔrɔ ni Ala ta mɔgɔ saninyaninw ye.»

¹⁹ «Ayiwa, o cogo ra, masace Agiripa, ne ka fɛn min ye ka bɔ sankolo ra, ne ma ban o ma. ²⁰ Ne ka o kow waajuri ke Damasi dugumɔgɔw le ye fɔlɔ, o kɔ, Zeruzalemukaw, ani Zude mara bɛɛ, ani siya were mɔgɔw. Ne k'a fɔ bɛɛ ye ko o ka kan ka nimisa o ta jurumunw na ka kɔsegi Ala ma, ka kewale ke, kewale min b'a yira ko o nimisara can ra. ²¹ O le kosɔn, Yahudiyaw ka ne mina Alabatosoba kɔnɔ ko o be ne faga. ²² Nka Ala ta demeri baraka ra ne panaman tora fɔ ka na se bi ma. Ne ka min lɔn Ala ko ra, ne be o seereya ke mɔgɔ fitiniw ni mɔgɔbaw ye. Cira tɔw ka min fɔ, ani cira Musa ka min fɔ, ko a ka kan ka ke, ne te foyi fɔ ka temɛ o kan. ²³ O k'a fɔ ko Ala ta mɔgɔ panawolomanin bena tɔrɔ; ko ale le bena ke mɔgɔ fɔlɔ ye ka kunu ka bɔ saya ra, ka kisiri yeelen bɔ an ta siya ye, ani siya were mɔgɔw ye.»

²⁴ Ka Pɔli to o kuma ra, k'a yira ko ale ma jaraki, Fɛtusi perenna k'a fɔ ko: «Pɔli, fa be i ra! I ta karanba ka fa bla i ra!» ²⁵ Nka Pɔli ko: «Jamanatigipuman Fɛtusi, fa te ne ra de! Ne be kuma minw fɔra, o ye cankumaw le ye, ani kuma panamanw. ²⁶ Masace yere ka o kow bɛɛ lɔn, o kosɔn ne be sɔn ka lɔ a na kɔrɔ ka kuma ni jagbeleya ye. Ne lara a ra ko a ka o kow bɛɛ lɔn, sabu o kow si ma ke dogo ra. ²⁷ Masace Agiripa, ele lara ciraw ta kuma ra wa? Ne k'a lɔn ko i lara a ra!»

²⁸ Agiripa ko Pɔli ma ko: «Pɔli, a tora dɔɔnin i

bena ne hakiri yeɓema ka ne fana ke lanabaga do ye de!» ²⁹ Poli k'a jaabi ko: «Ni a kera wagatisurun ko ye o, walama wagatijan ko o, Ala m'a kera ko a kana dan ele kelen ma, nka ele ni mogo minw bee be ne lamenna bi, aw bee ye ke i n'a fo ne be cogo min na, nka aw kana siri ni negejoroko le ye i ko ne.»

³⁰ O tuma, masace wurira ka lo, ani jamanatigi, ani Berenisi, ani mogo minw tun siginin be ni o ye. ³¹ O boto, o tun be a fora ye jagon ye ko: «Ce nin ma foyi le ke, min ka kan ni fagari ye, walama kaso.»

³² O ko, Agiripa k'a fo Fetusi ye ko: «Ni ce nin tun ma a ta ko don masaceba Sezari boro, a tun be se ka bla.»

27

Fetusi ka Poli bla ka taga Romu (Korentikaw flanan 11.25-26)

¹ Wagati min na a latigera ko an ye don kurun konɔ ka taga Itali, o ka Poli ni kasoden dama dama di sorasikuntigi do ma, min togo ye ko Zuliyusi; ale tun be Romu* masaceba ta sorasikuru le ra. ² An donna kurunba do konɔ, o kurunba tun bora Adaramiti, a be tagara Azi mara fan fe. Sitariki tun be ni an ye; ale ye Masedonika ye, a be bo Tesaloniki. ³ O dugusagbe, an sera Sidon; Zuliyusi tun ka Poli minako ja kosobe. A tun b'a to Poli ye taga bo a teriw ye, janko a mako be fen minw na, a ye o sorɔ. ⁴ An bora o yoro ra minke, an temena Sipere jamana konkonda ra, ka o dugukolo to an ni fono ce, sabu fono tun be an kunbenna. ⁵ O

ko, an ka Silisi mara ni Panfli mara ta kogoji cɛtigɛ, ka taga se Mira dugu ma, Lisi mara ra. ⁶ Ayiwa, sorasikuntigi ka kurunba do ye o yoro ra, o bora Alesandiri, a be tagara Itali. A ka an ladon o kono.

⁷ An ka lon caman ke ji kan, kurun tun be tagara donin donin. An sɛgera kosebe ka soro ka se Kinidi dugu na fe. I n'a fo fono tun be an barira ka taga na fe, an temena Kereti jamana kere fe ka taga Salamoni dugu fan fe. ⁸ An sɛgera ka soro ka teme o yoro ra, ka taga se yoro do ra, min togo ye ko «Kurunloyorɔnumanw». Lase dugu be a yoro kere fe.

⁹ An tun ka wagatijan ke tagama ra ka ban. Kurunbori tun be kera farati le ye, sabu nenɛba wagati tun sera, sundonwagati tun temena ka ban. O le ra, Poli ka mogow lasomi ko: ¹⁰ «Ne teriw, ne na b'a ra ko an ta kurunnatagama tena laban ni cenri ma bo a ra. A tena dan kurunkonominanw ni kurunba yere cenri ma de, nka an minw be kurun kono, an fana be se ka to a ra.»

¹¹ Nka sorasikuntigi tun lara kurunboribaga ni kurunkuntigi le ra; a ma Poli ta kuma jate. ¹² O yoro kurunloyoro tun man ji nenewagati ra. O koson mogo caman benna a ra ko o ye bo o yoro ra; ni a be se ka ke, o ye jija ka se Fenikisi, Kereti jamana kurunloyoro ra, janko o ye nenewagati ke o yoro ra. O yoro nasinna terebenyanfan ma.

Fɔnoɔba wurira ji kan

¹³ O wagati ra fono fitini do bora woroduguyanfan fe; a kera o na na ko o ka min latige ko o bena se ka o ke. O ka kurun labla, kurun ka ke taga

ye Kereti jamana kere fe. ¹⁴ Nka doonin kera, fojɔba do bora Kereti jamana fan fe, ka na ke an kan; o fojɔ togo ye ko «Erakilon.» ¹⁵ O fojɔba ka kurun ta. An ma se ka fojɔ bari; an ka an yere to fojɔ boro a ka ke taga ye ni an ye. ¹⁶ An tagara teme dugukolo do woroduguyanfan fe kogoji ce ma, o dugukolo togo ye ko Koda. O yoro donna an ni fojɔ ce. Kurundennin min tun be an fe, an jijara ka o bo ji ra, nka o ke ma diya. ¹⁷ An ka kurundennin ladon tuma min na, o ka kurunba yere siri ni juru ye janko a kana cen. O ko, o ka kurun ta faniba lajigi, sabu o tun be siranna ko fojɔ kana na taga kurunba sigi kenken kan Libi jamana fan fe. An ka an yere to fojɔ boro, a ka ke taga ye ni an ye. ¹⁸ Fojɔ tora ka an fifa kosebe; a ma ja, o lon dugusagbe, o ka kurunkonodoni dow firi ji ra. ¹⁹ O tere sabanan, kurunboribagaw yere ka kurunboriminanw firi ji ra. ²⁰ An ka lon caman ke, an ja te tere ye, an te lolow fana ye su fe. Fojɔ koni tun be juguyara ka taga a fe, fo an jigi bee tigera, an ko an tena kisi fiyewu.

²¹ Kurunkonmogow si tun ma domuni ke kabini wagatijan. Poli nana wuri ka lo o ce ma k'a fo o ye ko: «Ne teriw, aw tun ka kan ka ne ta kuma men, ka to Kereti; o ra aw tun tena segeba nin la aw yere kan, ka bono kurunkonominanw na fana. ²² Nka sisan ne b'a fo aw ye ko aw ye aw ja gbeleya. Aw si nin tena to nin ko ra; aw bena bono kurun doron le ra. ²³ Ne ye Ala min ta ye, ani ne be baara kera min ye, o ta meleke do nana ne fe bi su fe. ²⁴ A ko: <Poli, i kana siran, jagboya lo ko ele ye taga lo masaceba Sezari ja fe. O koson, mogow o mogow be ni i ye kurunba

kɔnɔ, Ala bɛna ele ni olugu bɛɛ kisi nɔgɔn fɛ a ta nɔmanyɛ kɔsɔn.»²⁵ O ra, ne teriw, aw ye aw ja gbɛlɛya, sabu ne lanin bɛ Ala ra ko mɛlɛkɛ k'a fɔ ne ye cogo min na, ko a bɛna kɛ o cogo le ra.²⁶ Nka kurun bɛna taga cɛn ni an ye dugukolo dɔ le kan ji cɛ ma.»

²⁷ Ayiwa, o su tun ye an su tan ni naaninan ye ji kan, fɔnɔ belɛn bɛ an fifara Adiriyatiki Kɔgɔjiba kan. Su cɛmance wagati ra, kurunboribagaw k'a bisigi ko an bɛ surunyara dugukolo ra.²⁸ O ka juru jigi ji ra ka ji dunya flɛ. O k'a ye ko ji dunya ye mɛtɛrɛ bisaba ni wolonfla. Kurun gbarara na fɛ dɔɔnin, o ka juru jigi ji ra tuun, a kɛra mɛtɛrɛ mugan ni seegi.²⁹ O tun bɛ siranna ko kurun kana na taga gbasi farakuru dɔw ra ji jukɔrɔ. O kɔsɔn, nɛgɛ gbiriman minw bɛ kurun lalɔ, o ka o naani bla ji ra kurun kɔfɛyɔrɔ ra, ka sigi ka kɛ dugugbɛ kɔnɔ ye, o kɔrɔtɔninba.³⁰ Kurunboribagaw tun b'a fɛ ka bori ka kurun to; o ka kurun fitini bɔ k'a bla ji kan, k'a kɛ i n'a fɔ o b'a fɛ ka nɛgɛ gbiriman dɔ bla ji ra kurunba nafɛyɔrɔ ra.³¹ Pɔli ka o ye minke, a ko sorasikuntigi ni sorasi tɔw ma ko: «Ni nin mɔgɔw ma to kurunba kɔnɔ yan fiyewu, aw tena kisi.»³² Sorasiw ka kurundennin juruw tige, k'a ben kɔgɔji ra.

³³ Ayiwa, ka mɔgɔw siginin to o bɛ dugugbɛda makɔnɔna, Pɔli ka o ja gbɛlɛya ko o bɛɛ ye domuni kɛ. A ko: «Bi ye a tere tan ni naani ye, aw si hakiri ma sigi, aw si ma domuni kɛ.³⁴ O ra, ne bɛ aw daari, aw ye jija ka domuni kɛ. O le bɛna kɛ sababu ye ka a to aw ye kisi. Aw ra

mogo si tena bono hali a kunsigiden kelen na.»

³⁵ Poli ka o fo minke, a ka buru ta ka baraka la Ala ye o bee ja na, ka do tige k'a jimi. ³⁶ Tow ka o ye minke, o bee ja gbelayara, o fana ka domuni ke. ³⁷ An bee lajennin tun ye mogo keme fla ni biwolonfla ni woro, kurun konu. ³⁸ O ka domuni ke ka fa tuma min na, simankise min tun be kurun konu, o ka o firi kogoji ra, ka kurun fiyanya.

Kurun cenna ji kan

³⁹ Ayiwa, dugu nana gbe minke, o tun be yoro min na, kurunboribagaw ma cogoya kelen soro o yoro ko ra. O ka jisiranin do ye; dugukolojalan tun be o yoro ra. O ko o be taga ni kurun ye o yoro ra k'a fe. ⁴⁰ O ka nege gbirimanw foni ka bo kurun na, ka o bla ji ra, ka kurunborinan juru fana foni. O ko, o ka faniba wuri k'a lo kurun nafeyoro ra, janko fono ye kurun joni ka taga dugukolo fan fe. ⁴¹ Nka donin kera, kurun barara ka taga sigi kenken kan jiwoyo fla ce ma. Kurun nafeyoro donna kenken na, a ma se ka bo. O y'a soro jikurubaw tun be kurun kofeyoro gbasira fo k'a cen.

⁴² Sorasiw tun b'a fe ka kasodenw faga, janko o do kana na ben ji ra ka nomu ka bori ka taga. ⁴³ Nka sorasikuntigi tun t'a fe o ye Poli faga; o koson a banna o ma. Minw ka ji lon, a ko olugu ye kon ka ben ji ra, ka nomu ka taga dugukolojalan kan. ⁴⁴ Ko tow ye yiriferen dow, walama kurun yiri dow mina, ka jija ni o ye ka bo. A kera ten mogo bee sera kogojida ra dugukolojalan kan, foyi ma ke mogo si ra.

28

Poli sera Maliti jamana ra

¹ Ayiwa, an kisira ka bo kogoji ra wagati min na, o k'a fo an ye ko o yoro togo ye ko Maliti. ² O yoro mogow ka an mina ka na kosebe. I n'a fo sanji tun be benna, nene fana tun be yi, o ka tasumaba do mana ka an bee wele ka na o tasuma koro. ³ Poli nana logomisen caman ce ko a b'a ke tasuma ra minke, sajugu do bora o ra tafundenin koson ka noro Poli boro ra. ⁴ O yoro mogow ka sa noronin ye Poli boro ra minke, o k'a fo jagon ye ko: «Sigiya t'a ra, i b'a soro nin ce koni ye mogofagabaga yere le ye; sabu a kisira ka bo kogoji ra, o bee n'a ta, an ta jo cantigi ma son a ye janamanya.»

⁵ Nka Poli ka a boro yuguyugu ka sa ben tasuma ra; Poli yoro si ma a dimi. ⁶ K'a soro o mogow tun b'a miirira ko Poli fari bena funu o yoronin kelen bee ra, walama ko a bena ben ka sa. Nka o nana makononi ke ka men, k'a ye ko foyi ma ke Poli ra minke, o ta miiriya yelemana; o ko, ko Poli ye ala do le ye.

⁷ Ce min tun ye o yoro namogo folo ye, min togo ye ko Pubilusi, ale ta sigiyoro tun be an kere fe. A ka an bonya kosebe ka an lajigi a ta so konfo tere saba. ⁸ Pubilusi face tun man kene, sumaya ni togotogoni tun b'a ra. Poli tagara a fe ka taga Ala daari a ye ka a boro la a kan; a keneyara. ⁹ Kabini o kera, o yoro banabagatow bee nana Poli fe; o bee keneyara fana. ¹⁰ O mogow ka bonya suguya bee la an kan. An tagawagati nana

se ka taga kurun ta minke, o ka an makorafenw beɛ di an ma.

Pɔli sera Rɔmu
(*Rɔmukaw 1.9-15*)

¹¹ An tun ka karo saba le ke o yɔrɔ ra. An tagalon, an donna Alesandiri kurun dɔ le kɔnɔ. O kurun tun lɔra o yɔrɔ ra ka nenɛba banwagati kɔnɔ; o kurun tɔgɔ tun ye «Flaninw». ¹² An tagara se Sirakusi; an ka tere saba ke o dugu ra. ¹³ An bɔra o dugu ra, an temena kɔgɔji konkonda fe ka taga se Rezo. O dugusagbe, an tagato, foɔɔ dɔ bɔra an numanboroyanfan fe ka na ke an kan. An ka tere fla le ke ka sɔrɔ ka se Puzɔli. ¹⁴ An ka lanabaga dɔw ye o dugu kɔnɔ; olugu ka an daari ko an ye logokun kelen ke ni o ye. An nana bɔ o yɔrɔ le ra ka taga se Rɔmu*. ¹⁵ Ayiwa, Rɔmu lanabagaw tun ka an nako kibaroya men minke, olugu nana an kunben fo Apiyusi logofiye ra, ani Lonanjigiyɔrɔ saba yɔrɔ ra. Kabini Pɔli ka olugu ye, a ka baraka la Ala ye, a jigi sigira. ¹⁶ An sera Rɔmu minke, sorasikuntigi ka kasodenw di sorasiw kuntigiba ma. Nka o sɔnna ko Pɔli ye taga to yɔrɔ dɔ ra a danna; o ka sorasice kelen bla ni a ye k'a korɔsi.

Pɔli ka Rɔmu Yahudiyaw waaju

¹⁷ Ayiwa, tere saba temenin kɔ, Pɔli ka Rɔmu* Yahudiyaw ta pamɔgɔw wele ka na. O nana lajen tuma min na, Pɔli ko o ma ko: «Ne balemaw, hali k'a sɔrɔ ne ma kojugu si ke an ta siyamɔgɔw ra, ne ma kojugu si ke an bemaw ta landakow kama fana, o beɛ n'a ta, o ka ne mina Zeruzalɛmu ka ne di Rɔmu fagamaw ma. ¹⁸ Olugu nana ne pininka

tuma min na, o tun b'a fe ka ne labla, sabu o ma foyi si soro ne ta ko ra min be ne fagakun bo. ¹⁹ Nka Yahudiyaw ma son ko o ye ne bla. O koson, a tun kera ne fe jagboya ye ko ne ye ne ta konaw to masaceba Sezari boro. Nka o t'a yira ko ne b'a fe ka ne ta siya jaraki de! ²⁰ O le koson, ne ka aw wele ka na yan ka kuma ni aw ye; sabu Izirayelimogow jigi be Kisibaga* min kan, ne sirinin be ni negejoroko ye o le koson.»

²¹ O ka Poli jaabi ko: «Anw ma sebe si soro ka bo Zude, ele ta ko ra; an balema si ma bo yi fana ka na kuma do fo an ye, walama ka i togajugu fo an ye yan. ²² Nka an b'a fe ka i yere lamem, ka i ta miiriya lon; sabu an k'a lon ko mogow wurira nin sira kama yoro bee ra.»

²³ Ayiwa, o ka lon do sigi; o lon na o caman nana Poli fe a ta bon konon. Poli kumana o fe, ka Ala ta Masaya* ko nafa o ye. A tun be cogoya bee kera janko o ye Yesu ta ko lon ka kana ni cira Musa ta sariya* ni cira tow ta kitabuw kumaw ye. O tora o ra k'a ta sogoma fo wula fe. ²⁴ Dow sonna Poli ta ma, nka dow ma son ka la a ra. ²⁵ O mogow tun ma na ben kelen ma; o tagato Poli ka nin kuma kelen le fo o ye; a ko: «Cira Ezayi tun ka kuma min fo aw bemaw ye Nin Saninman* baraka ra, o tun ye can yere le ye! ²⁶ A ko:
<Taga a fo nin siya mogow ye ko:

Aw bena menni ke kosebe, nka aw tena foyi faamu.

Aw bena fleri ke kosebe, nka aw tena foyi ye.

²⁷ Sabu nin siya mogow ka o jusukun gbeleya; o ka o torow gberem, ka o padenw datugu,

janko o padenw kana yeri ke,
o jusukunw kana faamuri ke;
ni o te, o tun bena na yelema ka son ne ma,
janko ne ye o kisi.> »

²⁸ Poli k'a fo o ye tuun ko: «Aw ka kan ka a lon ko kisiri min bora Ala fe, ko o nana siya were mogow fana kama; olugu koni bena a lamene!»

²⁹ [Poli ka o fo minke, Yahudiyaw tagara; o ka ke jagon soso ye kosebe.]

³⁰ Poli ka san fla dafanin ke a ta bon kono; a tun ka o bon ta sara ra. Mogo minw bee tun be na bo a ye, a tun be sigi ka olugu bee lamene. ³¹ A tun be Ala ta Masaya ko waajuri ke, ka mogow karan, ka Matigi Yesu Kirisita ta ko yira o ra. A tun be o ke, siranya tun t'a ra, mogo si tun t'a bari fana.

Biblu Ala ta Kuma
Jula: Biblu Ala ta Kuma Bible

copyright © 2013 Wycliffe Bible Translators, Inc.

Language: Julakan

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

0c9588de-99ac-53f9-aa9b-6885106dcde8